

聖明亦必罪臣等擅廢而不赦。前日臺諫只爲各處之論。亦未免削職。今若有此事。而日後或有請罪臣等者。則聖慈必不得赦之。況今領府事臣李恒福左議政臣鄭仁弘在外。前右相臣鄭昌衍杜門不出。今右相臣韓孝純呈病有日。大臣之中。獨臣在京。黽勉行公。如此莫重莫大之事。豈能獨自善處。且癸丑年間諸大臣啓辭時。臣亦隨叅其中。有雖不慈等語。則不可前後異議也。頃年李元翼被譴時。三司以爲朝廷本無此心。而元翼老悖妄言。歸惡名於聖上。故元翼雖庚子年間盡忠於殿下之人。而猶且不免得罪以去。中外之人皆言。聖上有虞舜之行。莫不欽仰大聖人之盛德也。以諸疏之意見之。則臣既曾叅於癸丑年間大臣啓辭。臣乃負罪之人。而忝叨相職。今已四年。極爲未安。且常見該曹傳關及下吏請。則問安等事。循例爲之。臣罪爲大。臣曾在先朝。見大學衍義張九齡當見樹時。有臣不敢奉詔之語。乃是抵死不奉之意。真德秀美之。妄意欲效九齡。嘗曰。百官書臣字肅拜。若易之則是教人以逆也。因料此事

與此一樣。恐或致亂。不知自觸於罪。臣之罪至此尤大。諸疏汗漫。雖不能詳記。玆實無前之事。驚惶罔措。不知所以處之。然後乃可服人心而有辭於天下後世也。如姜氏武后事。未知其果一一相類。而晉惠帝時楊太后事。似是妄發。豈可擬議於聖明之世乎。其時張華以爲宜處別宮以全終始。此則只如前日各處之論而已。王冕等專主廢之。朱熹修綱目時。取董養之言而書之。不可盡書。其後果有五胡亂華之事。真德秀大學衍義略書曰。董養遊太學。升堂歎曰。朝廷建斯堂。將以何爲。天人之義既滅。大亂將至矣。真德秀論曰。至於母后。亦罹廢辱。母乃已甚乎。天人之義。於是一滅。此識者所以知大亂之將作也。今不可援以爲例明矣。張后則朱熹以李輔國之殺特書。而顏真卿則肅宗時貶蓬州長史。代宗初除利州不拜。則其時固未嘗還朝。而贊成楊綰亦無言及張后之事。未知此言出於何書也。閻后始焉殺帝之母。中焉廢帝立北鄉侯。終焉北鄉侯薨後又欲立他人。其凶慘之事至此。而司馬光資治通鑑取周舉謂李邵之言而書

之曰。昔瞽瞍常欲殺舜。舜事之愈謹。鄭武姜謀殺莊公。莊公誓之黃泉。秦始皇怨母失行。久而隔絕。後感穎考叔茅蕉之言。復修子道。書傳美之。今諸閹新誅。太后幽在離宮。若悲愁生疾。一朝不虞。主上將何以令於天下。宜密表朝廷。令奉太后。率群臣朝覲如舊。以壓人心。以答人望。卻即上疏陳之。明年順帝朝之云。其時周舉之言。非但不罪。又能從之。其亦可尙也。己。陳瓘太極之言。亦是不爲意也。如神德之事。身後以空言處置之事。今則每年寒食祭之。亦非今日可擬之事也。况諸疏結語。多在於天朝。壬辰以後。我國凡事。天朝無不照管。况若尙書。丁應泰。趙楫。李成樑等族黨。亦必猶有存者。若聞我國有事。則不無意外之患。其疏中恐有詰問之一款。則大抵與臣所憂略同。天朝之人。志欲無窮。若乘此機。恐不以數萬兩爲足也。若或有如董養真。德秀言者。可不懼哉。近年逆屬譯官。不送於天朝。是爲先見遠慮也。疏中有郡縣之請。言之氣塞。鎮江遊擊可畏之言。不無所見。其曰咨禮部。其曰告天子者。正似蹈睡虎之尾。而生事於無

事中也。伏願殿下臨事而懼。深思熟計焉。臣雖無狀。忠國愛君之誠。必不在疎遠之下也。臣意見昏塞。欲納吾君於無過之地。而不能自爲立論。謹拾司馬光朱熹真德秀等論人之語。敢此先爲獻議。此事至重至大。極爲難處之事。疏者以推諉非臣。殿下亦知人情矣。以近日之所見言之。則推諉者。恐非獨臣而已也。若臣議虛妄。雖加黜戮。亦所不辭。諸大臣其敢曰在家不知。請問于李恒福。鄭仁弘。鄭昌衍。韓孝純等。且廣收廷議。而處之。必有爲國家獻善策者。今二十二日。自夜達晝。連有大雷之變。當此六陰既極。一陽未生之時。雷怒之聲。如是勃勃。移時大震。則災異之甚。近古所無。荆南十月之雷。古今傳說。况今至月之雷。忽發於連旬陰霧之中乎。變不虛生。必有所召。臣未知將有何應。徐義中疏。指爲大臣等失職。則是天之怒。在於臣等身也。如臣無狀。久叨非據。不能變理陰陽。致此大異。將焉用彼相哉。責免改卜。實合事宜。伏乞聖明。爲先重律。愚臣以答天譴。臣今獨當。不得已瀆撓天聽云云。○李恒福議。臣八月初九日。始得中

風身雖不死。精神已脫。瞻天望日。分死自決。今垂半載。尚在床褥。凡干公事。勢難仰對。此則國家大事。餘命未絕。何敢以病為辭。嘿然而已乎。不審誰為。殿下畫此計者。先廢後君父之前。非堯舜不陳。古之明訓。虞舜不幸。頑父生母。常欲殺舜。浚井塗廩。危逆極矣。號泣怨慕。不見其不是處。誠以父雖不慈。子不可以不孝。故春秋之義。子無讐母之道。况為伋也。妻者是為白也。母誠孝之重。夫焉有間也。今欲以孝治國家。一邦之內。將有漸化之望。此言奚為至於。絀續之下哉。為今之道。體舜之德。克諧以孝。烝烝以乂。回怒為慈。愚臣之望也。議進。與自獻俱。謫咸鏡道北青。臨行謂餞僚曰。明年八月。當復還來。其時相見。不相遲也。因吟詩曰。雲日蕭蕭晝晦迷。北風吹破遠征衣。遼東城郭應依舊。祇恐令威去不歸。途中相與詼諧。以消憂勞。見出站大噓曰。若知待候。可以早來。奇乘謂奇曰。令公是。城騎浮擔。一厄。을 맛 나 너. 奇曰. 令公은 到處의 浮談이 多다. 在北靑有 詞曰. 鐵嶺第一. 峰의 자고 가노저. 子음 아孤臣 淚을 비사 마가저. 다가 남겨 신九重. 宮闕의 實對. 光海愁然. 不樂猶不有. 召還之命. 嗚呼. 人心一誤. 難悟. 至此.

鰲城實是曠世大賢東方名相。生於季世不能容可恨。明年八月。果卒于謫所。有士子吟詩曰。鰲柱擎天天妥帖。鰲亡柱折奈天何。北風吹送囚山雨。我淚多於此雨多。○承旨鄭弘翼議。古昔帝王。遭人倫之變者。無如虞舜。而能盡處變之道者。亦莫如舜。當其囈母煽禍。欲害舜者百端。而舜共為子職而已。馴致烝烝之美。此其所以為人倫之至也。惟我聖上。自在儲宮。仁孝振聲。舉國臣民咸仰錫類之至化。而不幸值人倫之變。群臣佐下風者。不敢贊揚聖化齊美。帝舜而乃議此無前之事。臣窃惑焉。伏願聖明。遠法堯舜。克盡誠孝。兩宮之間。和氣藹然。則一國臣民咸囿仁孝之化。而聖德光于萬世矣。臣雖愚陋無識。叨荷聖恩。位躋三品。愛君憂國之誠。恒切于中矣。今當獻議。若愛惜微命。不盡所懷。則是負聖上洪造。而自陷於不忠之罪矣。倘蒙聖明不以人廢言。特賜裁擇。則臣雖萬死。亦無憾矣。議進。竄北道。明年移配光陽。癸巳蒙宥以。大司諫還朝。○軍器正金德誠議。臣意大槩。與李恒福相同。別無他議云。議進。謫泗川。出都門語人曰。大舜欺人矣。癸亥蒙恩以。執義還朝。○時

宮役疊劇。宮闕木結收布。疊生層出。民窮財盡。怨苦朋興。不得已劫民賣官。銀綿鹽鐵。家基熟石納而崔烈者甚多。金腰玉頂。連續道路。市井謠曰。金者玉者銀耶石耶。錦衣紬衣土耶木耶。搢紳者耻之。

戊午萬曆四十六年

奴以撫遠使

春二月。長水人安處仁投密書于監營。籍近邑士民二百餘人。與朴致義往來謀逆。因監司啓并拿鞠。申卞蒙宥。處仁與其兄好仁。反坐皆死。○奴賊寇遼東。撫遠鎮殺鎮將及軍人數萬。擄掠人畜而去。皇帝震怒。命大舉北伐。因制下本國。發兵為援。朝廷遣校理李垓于經畧軍門。時楊鎬以經畧來鎮遼陽探聽軍機。又以朴鼎吉赴京定奪。垓到遼東見軍門。鎬移帖曰。照得蠢茲奴夷逆天犯上。六師九伐。四海一心。本部院恭承特遣經畧軍事。所奉勅書內開。有鼓舞朝鮮之旨。豈非以貴國往罹倭奴之患。曾勞上國之援。徵水陸之兵。至十數萬。轉本圻之餉。至數百萬。兩番數年。纔得底定。於是本部院叨任經畧。身在戎行。雖未成勞。頗竭思慮。今茲之役。正欲咨請

貴國。共效同誓。以副欽旨。適逢弘文校理李垓賫到王之咨。督撫者辭若觀望。意不堅正。而李垓又自以為仰陳危懼。呈不曰腹背支。則曰中外不遑。不曰生聚未敷。則曰端幾明。捨原額支糧之軍士。但調荷鋤耒之農夫。既憂狡倭之乘虛。又憂奴賊之奔突。談虎便已失色。穴外何能得子。此等情形。聞知朝內。必有縷數王之臣之不忠者。故將摠督咨文。暫煩賚咨。另勞相議。竊為勦虜之非止為本朝。亦為王國也。王曩者數以奴酋侵陵入告。邊官屢亦責讓不悛。今且逆我。行。又何有於王之北乎。倘助順成犄角之勢。即王封享安枕之樂。而又有忠義之名。亦何憚而不為之。况北闕金白兩酋。金台石白羊古守北闕二城尙且備兵馬一萬。扼奴之喉。貴國豈難於拊其背乎。或者以數萬難據盈一面。難獨當。今與王約止。預選一萬精兵。兼備旬月糧糗。出王之境上。臨時拒賊酋東衝。以防逃逸。候冬月進兵之日。仍以遼鎮銳一全前攻二。過二三百里之遙。數路齊擣。旬日畢事耳。為此合咨貴國。煩為查照。先後咨文事理。作速計議。停當。先以選過何處

兵丁數的若干。總領大將某人。分領編裨某人。扼何水陸要衝。並圖畫近
 酋地理形勢。因煩李塔來。以便入奏。須有擊揖斫案之圖。勿為首鼠狼跋
 之慮。兵機貴密。尤貴速。廷咨於眾。內斷於心。一朝決矣。須至咨者。○以叅
 判姜弘立為京畿兩湖兩西等五道都元帥。平安兵使金景瑞。應世兼副
 元帥李民安李挺男鄭應井文武從事。調發五道兵馬二萬餘名。送西邊。
 慶尙江原道送北道。

判姜弘立

慶尙江原道送北道。

秋七月。諸道先調砲手各數千赴西。十三日。本道監司礪山犒軍。資木十

後軍○十六日。奴酋又攻拔遼東清河堡。守兵死者無數。○大舉武科三

收拾

千。添送西邊。○許筠陰使徒黨。夜夜登南山呼曰。西賊已渡鴨綠。琉球之
 兵。來藏海島。城中人何不避出。又作謠曰。城不如野。野不如越。城中洵懼。

日夜奔散。市井將虛。八月。諸道調送二運射手三千。十八日。監兵使益山

犒軍。資木十五正○叅贊許筠謀反伏誅。逮其黨金闔河仁俊金宇成黃廷

弼金胤黃禹慶邦立應旻等。皆誅之。盡行孥戮緣坐之律。朝野鼓舞。都中

晏然。筠早年構作讖記。累千言。秘傳于世。皆凶慘之不之意也。近日科舉
 之弊。南山夜呼之事。皆出於此賊屬。勸上西臨龍船。欲售射日之謀。天神
 默佑。事跡敗露。

九月初六日。教中外臣民。王若曰。亂賊稔兇。禍方成於夾日。常刑致戮。賀
 爭展於清朝。肆頒梟圍之章。式楊雞幡之典。逆魁許筠。性稟梟獍。行類狗
 彘。瀆倫縱淫。無復人理。蔑紀廢喪。自絕子道。鬪椒能忍。知若敖之鬼餒。叔
 魚無厭。識羊舌之族滅。拔身操觚之小技。竊祿超級之濫爵。藏奸蒐慝。長
 惡不悛。貪亂樂禍。逞怨罔極。締結弘老。始謀危於東郊。指揮悌男。期握權
 於要宮。挾璫之計。未成垂簾。立珰之策。又出連門。乘先王之昇遐。敢構六
 尺之孤。入中朝而上變。擬行萬金之賂。託秘記而造讖。潛動遷都之說。依
 慶運而作詩。竊綻蕭牆之禍。軍器橋頭。傳箭檄於胤黃。崇禮門外。付謗書
 於仁俊。詆天罵日。是可忍乎。負國背日。吁亦慘矣。假托大論。若助朝廷討
 逆之義。誘脅雜類。欲售管澤聚軍之謀。二品宰臣之請訊。蓋據讐家之告。

三司臺侍之爭劾亦爲王獄之嚴。益肆不軌之圖。荐投無賴之疏。請斬請竄。大臣以下。殆將不免。自贊自譽。叅贊之職。猶爲不足。兇徒寔繁。晝夜密議。逆節彌滋。朝夕禍迫。遼界征虜之役。反謂回軍。琉球復讐之兵。誑傳藏島。登山而呼。驚惑都城。舉火以應。驅出土女。舟師僧徒。要爲其用。平安全羅。各有所領。矯稱內意。脫劇賊於捕盜。暗傳私書。結黨與於同死。木刻甲字。已約舉軍之號。冊書軍目。更定分隸之名。推戴有地。固路人之所知。左右無忌。宜親臣之欲除。炳幾燭微。豈乏察影之先見。默佑陰隲。幸免噬臍之後悔。臺憲避嫌。詰日時之早晚。禁府請囚。發心腹之形跡。神鏡高懸。泣魑魅於莫逃。天網廣張。讐狐狸於畢捕。黃紗丹筆。審言色而按律。栢府薇垣。並論思於請討。玄應旻之的供。奸情難掩。黃廷弼之直招。兇狀盡露。三日滯囚。譎語已窮。九月論功。猾計何施。官爵件記。有同惡者必多。嚴刑鞠問。其伏辜者幾何。乃於八月二十四日。逆魁許筠及其黨河仁俊。金闔金胤。黃禹慶。邦玄。應旻。同月二十六日。黃廷弼等。並凌遲處死。籍沒家產。破

家瀦澤。一依法律施行。自本月初六日。昧爽以前云云。於戲罪人斯得。既加東市之誅。申命用休。幸布南郊之赦。

冬十月十四日傳旨。今者蚩尤之變。經月不滅。太白經天。彗星疊見。光芒孛孛。景象愁慘。人心洵懼。此莫非由予失德之致。而上天之警告。至深切矣。予中夜不寐。仰視天象。深用憂惕。罔知攸濟。古昔人君遇災之日。側身求言。以答天譴者。蓋出於恐懼修省之意。豈非今日之所當遵行者乎。寡昧之有過。朝廷之闕失。可言者必多。諸大臣及儒生軍民等。其各直言不諱之意。遍諭中外。咸使聞知。時彗孛見東方紫赤氣狀如虹者。彗字見東方紫赤氣狀如虹者。彗字見東方紫赤氣狀如虹者。彗字見東方紫赤氣狀如虹者。○發遣戶曹叅判尹守謙于西路。叅議李昌庭于兩湖。調度兵糧。船運安州。

己未萬曆四十七年

春正月。楊鎬與諸將議定北伐之計。分付各鎮。姜弘立等在昌城。十二日。率諸將領軍渡遼。行二日。至炭峴下。與天兵相會。時凍雪嚴凝。山路阻塞。諸將相議曰。今此遼邊積雪如是。况於深入。定無行師交戰之理。莫如姑

明世宗

一旦可とむる退諸軍。徐待雪消。更定師期。於是大軍還退。劉綎自炭峴直到昌城。試才砲射。各賞銀兩。留一日。還遼陽。

明字大奴姜

以三賊の所

手安定の所

三月初四日。提督劉綎等敗沒于胡中。姜弘立等被執。左營將宣川郡守金應河力戰死之。先是大軍回自炭峴。楊鎬改發分付。月初一日為師期。去二十一日行軍。分三道擬達建州。劉綎兵由東路。杜松兵由西路進兵。俱被敗沒。詳見下弘○初八日丑時。成貼平安監司朴燁狀啓。當日午時。都元帥處有旨。宣傳官南宮律回來言內。初四日行到牛毛嶺。則左營千總黃延出身。申忠業自戰鬥出言曰。初四日喬遊擊先鋒至和好君部落。焚蕩左右山谷中。賊兵多數埋伏挾擊。劉提督亦為進兵。與之搏戰。而賊騎無數突出。喬劉大軍盡為敗沒。元帥令左右出兵繼援。左右亦被掩襲。只餘中營兵馬無抵當之勢。退屯山上云。而亦不知去處云。宣傳官不得進去。還來于守陴。亦為中箭出來云。臣即遣昌城府譯學李承尹。詳問戰敗曲折。則與忠業所言相符。敗軍之說。大槩不虛。而彼中消息未能的知。

十日の監司の所

事係緊急。為先馳啓。○初十日成貼平監狀啓。當日中營屬龍岡砲手金忠男招內。初二日接戰時。賊兵僅三百餘名。天兵與我軍勝捷。初三日休兵。初四日與天兵一時行軍。天兵先入。我國左營次之。右營又次之。中營在後行。二十里許廣野中。賊兵大至。天兵未及成陣。賊兵衝突。天兵先為

明字及は(四)

敗沒。我國左右營次次繼援。賊兵衝敗。亦為盡沒。中營則登高結陣。以拒馬柞設營。與敗兵相持五里許。彼皆不戰。天兵被劒者十餘人。投入中營之際。賊兵督令出送。賊兵盡殺唐兵。申時賊騎圍我中營。勢莫抵當。遣滿浦鄉通事河世國請和。少頃回來。先數日弘立等送世國于胡中。今言賊一名隨至。請大將出來。金景瑞脫甲改着豹皮衣。往賊陣。初更還來。賊饋

初四の所

酒送之。來宿中營。初五日曉。唐兵數百屯聚高阜。賊將言于我陣曰。若唐兵在此。無遺搜出。使入唐兵中。不得已。出三十餘名。喬一騎得脫而入。送唐陣。又令唐軍曰。此中有朝鮮人。一一搜出云云。唐兵即出我軍三名。送中營之後。麾兵亂殺。不遺一名。賊酋又請都元帥弘立穿草綠道袍。戴毛冠

而去。未時還營。送旗手使我兵一一解下兵器。即令兩元帥從事官中營將文希聖等及軍兵。皆許騎馬先行。右營將順川郡守被劒帶傷。來在中營。我兵在中。賊兵回下挾行如驅羊。是日三十里止宿。初六日行軍到一嶺。樹木甚盛。即與同里人鄭希國李南俊等逃來。中路遇賊。各各分散。是如云云。○十一日平監狀啓。元帥從事官李挺男報督府。行軍到深河。奴賊遮絕糧途。士卒飢餓。月初三日。使別將柳大瞻領騎步三百餘名。以輸糧出送。行到十五里許。賊騎無數結陣。衆寡不敵而退。即以從事官改定其代。與士卒約。未及二十里。賊騎步數百。多張旗幟結陣遮絕。與軍卒一時齊馬突進。放砲發矢。賊死甚衆。載屍馬上而去。哨官前萬戶金桂英前部將白而廣。大呼先登。力戰追殺。斬級上使云云。○問安使成時憲啓。初九日。鎮江地唐人自寬。奠出來。問接戰形止。則與忠男所言無異。經畧恐賊兵驅出。守城計料。平壤砲手金景立等八名。自西路杜松戰所生還。問其戰敗曲折。則杜松等三總兵。爭先進兵。渡水未半。賊兵四面突至。斫伐

如麻。唐兵未發一矢。自相顛仆。大半赴水死。渠輩入崑穴間生還。馬摠兵自開元入戰。不爲深入。全軍引還。李如栢。嶺防守事入去云云。○平監狀啓。都元帥以下。既失臣節。各其家屬道內分囚。以待朝廷處置。弘立妾子朔州。移囚云。○以張晚爲都元帥。禹致績爲平安兵使。○弘立等至虜中。滿住諭帖云。汗諭朝鮮將帥知悉。今爾度之。爾國王將終棄爾耶。抑索爾耶。爾國王復助南耶。此事後來如何。爾今願速回家耶。願在茲過日乎。爾可明白說來。特諭。弘立答。伏奉諭帖。感荷盛意。數千人命。本國豈有終棄之理。今者出兵。迫不得已。有何兵力。得以更助。回家遲速。人情所同。猶在汗度中。不敢陳達。○再諭。汗諭朝鮮將帥。休說前日些須間失禮。助兵南朝。豈非大事乎。大事尙不計較。不忍誅戮。是圖名譽傳揚也。今以小過失。而朕不能容。復欲計較。則初意欲揚名四海。流芳後世。何益之有。朕終始如一。爾勿得胡愁亂想。負朕盛意也。特諭。弘立答。謹再拜奉書。天生兩國。自前親厚。小無仇怨。汗國之贈。我國之報。年年不絕。今者出兵。實非本

國之意。中朝以壬辰救倭之功。徵督嚴。故調兵不滿萬人。隨唐兵陣後。若實心助兵。如何先送通事傳報。又使會寧府使傳言於小弄耳。北道藩胡之往來彼我者乎。前日陣上等已知無生路矣。以到將軍們。皆肖汗之大德。全活至此。但接見汗時。敗軍之將不可及禮。誤犯汗威。追悔無及。伏願汗益加隣好。使兩國和氣萬世無窮。豈徒等知感。弊邦之人。皆知汗之大德云云。夏四月。巡邊使啓。譯官李承尹回自經略軍門。探聽事情。楊經略揭帖云。建賊逆天。王師行討。貴藩守維屏之義。效同仇之舉。徵發萬重。濟江而西。忠節昭然。可揚日月。方期一鼓蕩平。不謂兩軍失利。傷存悼沒。疾首痛心。則皆不肖節制無方。經略無術之罪也。經略已經自劾。席藁于外。恭念賢殿下無宵旰之慮。謹馳一介。仰慰事懷。惟勝負亦兵家之常。在封疆無忽防禦之策云云。

後金河書

初四日。元帥武從事官鄭應井及許依李長培景瑞子得振通事河世國等。自胡中持胡書出來。差胡二名。留在滿浦。越邊以待回答。胡書。後金國汗奉書于朝鮮國王。汗於南朝。有七宗惱恨。因此我傷痛不已。不過被王院察等復奪邪之。我料南朝必不我養。故犯昔大金大元。併吞三吳。意欲獨存。到底其後無永也。不得其志。此樣之事。我皆詳知。昨犯之事。不是我昏昧之致。乃有犯大國皇王之意。青天豈不鑑察。天何佑我。况我臉面。豈大於南朝皇帝臉面乎。天至公。是其是非其非。我今料。朝鮮助兵南朝。非出於本意。必被南朝救倭之功。徵督之甚。故不得已助之也。昔大金世宗皇帝時。朝鮮趙注罷以四十餘城投之。世宗却之曰。我朝與宋徽欽相戰之時。朝鮮兩國都不助也。是忠厚之國。是以却之。今我逆念兩國自前和好之情。故將朝鮮將帥十餘員。活捉來此。看看國王之情。姑留之。而今後之事。專在國王定奪。然後天下何樣之國獨存。而盡滅小國之理乎。所謂大國南朝與天地同法。而今違天施謬。屈害天情。諒國王豈不知過也。况南朝要撥他兩箇兒子。我國兩爲主。此南朝期我兩國之甚。今國王或念我兩國。自前無絲毫之怨。因修前好。同恨南朝。或脫我而助南朝。何必復

姜弘立啓

棄之。故奉書以埃國王回音。天命三十六年。萬曆十二年甲申。彼賊稱帝。改元潛懷。犯上之志。而中原我國皆不知之。姜弘立啓。臣等俱以無狀。統率萬衆。二月二十一日渡江。而知亦無益矣。二十六日。劉提督及諸將自寬奠路過亮馬佃。先行。臣等追及榛子頭。麟等候軍兵盡涉二十四日行軍。宿鶯兒溝。二十五日。偕喬游擊到亮馬佃。二十六日。劉提督及諸將自寬奠路過亮馬佃。先行。臣等追及榛子頭。麟次下營。往見都督于帳中。從容談話。本國軍餉在後。士卒所賣將乏。欲待軍餉前進云。都督答稱。師期已定。器械已整。軍律甚嚴。不可遲留云。二十七日。都督先行八十里。至樂項山下營。臣等隨後。催趨步卒。行五十餘里。日暮到拜東江葛嶺寨下營。于守陣持喬游擊令票來示。有曰。朝鮮軍非無糧也。逗留觀望。畏縮太甚云。于守陣至於拔劍催促。二十八日。不得已。盡卸步卒所賣行李。令肅川府使李寅卿領六百名留設老營。兵書住營之稱。冒曉督發行八十餘里。宿牛毛寨嶺。與天將連營。臣往見都督。力言士卒飢餒。連糧未至。一向深入。繼糧極難。艱得一日留住。連糧四十餘石始到。升合分給。而臣等詳度事勢。則彼中情形。全然不知。輕易進兵。必有意外之

言。我國自來無怨。今者出兵。迫不得已云云。以待其回報如何。三月初一日。行四十五里。到馬家寨。胡騎出沒。喬游擊祖叅將前行。略得斬級。頗多。輕敵貪功之意。初二日行軍。午時到深河。胡兵三百餘騎。結陣以待。喬游擊祖叅將江副摠及都督票下劉守陣等。先登廝殺。斬級頗多。賊敗走。登山據險自固。催進我軍炮射。丸矢所及。賊多斃路。向東邊高山。胡兵千餘騎。屯聚觀望。終不下敵。日暮下營。夜中胡騎再次衝突。連放火砲。仍即退去。我軍絕糧已數日。運糧絕無聲息。必是爲零騎所遮。右別將柳大瞻領軍三百餘名。與浙兵四百出送。行未十里。遇賊而返。往見都督。力言糧盡。士疲。不可前進。西路進兵之奇。阻隔未聞。決不可輕進云。則都督以爲近處部落頗盛。埋穀甚多。放兵搶掠。足可因敵爲糧。師期有限。不可退止。西路則山谷阻隔。道路不通。無從得聞。不如前進。以及期會云。再三力陳艱難。挽留一日。初四日曉頭。令武從事李挺男加率軍兵出送。使之押糧。

辰時行軍。喬游擊江副摠祖叅將先行。都督次之。張都司次之。我軍左營繼之。中營右營連續進發。觀其道路平坦山谷連接。必有奴兵之埋伏。三營各荷拒馬柞前進。行纔廿里。到富車地。傳報賊至。左營即於路上排營。臣等將中營右營登山下營。其間相距千餘步。胡兵五百餘騎衝突。左營連放大砲。敵暫退住。都督票下相公及喬游擊。單騎走到。說唐軍盡爲覆沒。都督亦不免云云。數食頃。胡騎連續出來。約可數萬餘騎。一齊衝突。放砲數次之後。胡騎已入陣中。左右廝殺。俄頃之間。兩營盡沒。左營將宣川郡守金應河。千摠永柔縣令李有。右營千摠雲山郡守李繼宗。皆被殺。右營將順川郡守李一元。脫身走入中營。胡騎因即馳來。圍迫中營。臣等以死中求生。激勵士卒。巡督防備。則士卒目覩左右營之敗。况奴騎蔽野。無不恇懼。不可鎮定。涉遠小峯。無水無糧。且無援兵。無可奈何之際。聞右營逃生之卒來云。胡騎一人。先到陣外。呼通事云。意必彥春等回來。即令通事答之。則賊亦樂應。因送通事。付言于胡將。我國與貴國。小無嫌怨。今此

唐可覆沒

金不河等殺

和好的

出兵。原非本國之意。曾送河世國等傳報。今必欲相戰。則我軍已分必死。貴軍有何所利。不如講好云。則胡將亦多肯許之意。仍遣差胡到陣。即送軍官朴東溟。稱以中軍。往見胡將。則要見大將。再三往復。不得已令副元帥金景瑞往見胡將。則馬上相接。牢約和好。許令回還。且要見都元帥。時已昏黑。初五日。朝臣弘立往見陳說兩國無怨。今者出兵。迫不得已。昨自和好之約。敢自相見云。則胡將答說如誓。已時我軍始得下山飲水。胡將因言。此軍當到城中。見滿住後。許令還家。仍以鉄騎四面圍行。不得已發向胡城。所過都督諸將戰敗之地。三十餘里。僵屍如麻。仍見淅江數千。登山據險。蓋昨日分散之時。逃走之軍也。胡騎馳突以上。瞬息之頃。廝殺無餘。目覩之慘。不可勝言。唐將之輕敵貪功。疾馳先行。至於三十里。前後之陣。不相連接。胡騎橫衝。無人得脫。臣等到胡城。即令來見。入其庭。則左右被水銀鎧。三行排列。引臣等以入。臣等登階行再揖。則滿住怒噴。責以無禮。臣答以朝鮮例。不得見。有一人能解華語者名大海。以滿住之言告

入三唐底

臣等曰。若責君臣之禮。則設交倚欲坐爾等乎。爾國之人。見揚經略。亦行再拜禮。何爲到此。反不如見楊老爺之禮乎。臣等更無詰約以辭退。後仍行再拜。階東設二交倚。加紅氈。令臣等坐。滿住先飲以飲臣。三行而罷。滿住終有憤懣之色。引出臣等。寓於一舍。頓無許退之語。且令軍士圍守。翌朝委送諭帖。欲通書本國。見其回報後出送云。滿住麾下之人。及六鎮藩胡能解本國之語者。皆言滿住怒其行禮。不即許還云云。且臣等所送金彥春來言。初到胡城。滿住往撫順路。故世國囚禁。彥春押送滿住所往。三月初二三日。連敗唐陣。積屍如山。搃兵等官多數被殺。其夜滿住移東路云云。臣等臨陣。目見其用兵。則其鋒甚銳。有進無退。矢不及連發。炮不及再藏。此胡之不可與野戰。難以形言。開撫兩鎮及此東。一去覆沒。至於我國萬餘名。經年暴露。終至敗衄。此無非臣等無狀之所致。而迫於天將。深入重地。債事至此。當此富居嶺上。欲活累千人命。且慮日後橫侵之患。約以和好。至此城中以行揖禮。發怒拘留。口糧柴水。并有禁限。甚於囚繫。而

新迎金會所
使とくは生
の喜ををぬ
宿りまひし

如前初到之初
しとくは生

臣等未敗前一日。小酋自威鏡受祿俸而來。言於滿住曰。會寧府使言。我國爲中朝所迫。發兵而送。當在唐陣之後。須知此意云云。滿住頗以爲然。且彥春等先送之後。兩事相符。以此生活。臣等云云。我軍分置城內外。令其家主供食。昨聚我軍於教場。胡將親自黜視。手持麤豹皮細膩。兩班常人周回號令曰。今當通書爾國。待其回報。當許以還。今日所謂大海者。持其國書。來示臣等。其意專在通和。而許多說話。別無要素難從之請。謹差虞侯臣安汝。訥昌城府使臣朴蘭英。敗軍臣李長培。吾又浦萬戶金得振。出身許依。偕胡差出送。前後諭帖。呈書草並書上送。許多此中耳目所及之事。難盡枚舉。伏願廟堂詳問于安汝訥等。急速差官。偕胡書入送。則和好可成。而彼此息兵。專在於此。被留將卒。庶有生還之路。臣等亦將免異域之鬼。瞻天望日。不勝隕越之至。惟在廟堂商量善處。詮次善處。○鄭應井。招當初左右營盡敗之後。勇兵進逼中營。弘立令軍士整齊以待。一賊忽出呼通事。通事答曰。我國與爾。本來無讎。何必相戰乎。賊曰。若然則不

必相戰。請見將帥一人。弘立則令出身朴東溟往見。請見大將景瑞往來。
初五日。弘立與景瑞俱往。即令軍中盡去兵器。因被驅去。止宿十五里地。
翌日。老酋傳言曰。聞爾等之來。吾親自出送。初六日。始到虜穴。老酋坐於
三間廳上。着黃袍錦衣。左右姬妾三十餘人。珥環羅列者二千餘人。盛設
宴具。先招兩帥。立於五層階下行禮。弘立曰。吾等我國官高之人。不可階
下行禮。往復再三。始許上階行禮。弘立等行揖。酋怒曰。爾若使臣來。則可
以行揖於廳中。爾是投降之人。待我反不如經略。此不過侮我。弘立等遂
行再拜禮。因行酒杯。設男樂。三爵罷。是夜接置兩帥於城內董姓家。董乃
遼東人。犯罪舉家逃來者也。十一日。北道胡人來言曰。今日酋出往教場。
以其俗制之。兩帥不從。則當殺云云。老賊果出教場。招兩帥。李永芳董大
海等相接。弘立指大海所佩刀曰。此劔利乎。大海變色曰。何以問之。弘立
曰。當初輕從汝之和好出送之言。隱忍至此。試觀今日氣色。殊異曩日。吾
生則九族受刑。死則九族得全。吾之一死何關。欲借汝劔而引決。永芳聽

之。畫地而書曰。我是不忠之人。汝看吾面。必以爲醜。弘立亦畫地以答。地
步稍遠。不得見其答矣。東路領兵將老酋長子貴永介。與其弟直來弘立
處。○弘立胡中日記。奴賊東路大將貴永介阿斗李永芳五六人。軍馬約
可三萬餘騎。皆被鎧甲。大槩馬兵五萬。步兵三萬。內城高可五丈。外城多
有頽破。可以騎馬出入。人物之盛。頗似平壤。一門外。弓匠家。一門外。甲冑
匠家。一門外。有倉庫十六楹。可七八間。或言清河倭近處築石城。廣設屯
田。爲久住之計。來時見男負女戴移住撫順。近處云云。當初世國到胡城
被囚。初三日夜。滿住回來招問。初四日。再次招問。而其前日小弄耳自咸
鏡傳言之故。即放世國。我國軍卒到胡城。留屯城外。翌日鐵騎自城中執
槍出去。四面圍抱。城中男女登城望見。有頃刻廝殺之狀。忽有一騎出去
散其圍。莫知所由。後因劉海聞。滿注怒行揖禮。決意盡殺。貴永介入來力
言不可。終至救解云。○近日滿與諸子諸將。曰。往教場試閱城中家家精
鍊器械。聞不久犯遼東云。胡兵之在城出入者。三四萬騎。而其餘則防守

外處云。未能的知其數。國中之兵八分。曾與貴永介各領四分云。此間文書。遼人大海劉專掌。而短於文字。殊甚草草。我軍到此之後。來問解文識事之人。答以不來云。大海來問日本通和事。答云。平秀吉與我爲仇敵。今則家康盡滅秀吉之族。願從舊好。我國許之。日本稱我國。必曰大國。文書亦甚恭謹。大海曰。去年白氣。貴國亦見之否。曰。見之。海曰。滿初見白氣曰。朝鮮日本兵必來云。果是貴國兵來。答曰。我國知天文者曰。西方大有殺戮云。海曰。今者來兵之敗。足以當之。答曰。今番乃小小事。後必有大段殺戮云。知彼如此何。海等亦蹙額無語。仍曰。日本兵我國可以借來。而今之出兵。實非本意。故不爲云。小弄耳來言。差胡往來咸鏡。言北道諸部落。小無朝鮮之侵犯云。滿以爲朝鮮出兵。始知其非本意也。滿之妻妾及諸子諸將。皆勸通好於我國。我國之物。最以爲珍者。綿布白苧布白紙。畫席。獺皮。粧刀子。食鹽。大米云。當初分四路進兵。來此聞見。則撫順兩陣見敗之後。更無進兵。故胡兵大勢專移於東路。懸軍深入。猝遇大敵。故以至於

此。我軍則唐將先行。例鍊炮手及兵馬七八百。日日招出帶率而行。以此三營兵殆不成部伍。力請都督。終不肯許。糧盡士疲。催趲不已。終至覆沒。即聞滿問朝鮮使臣之所率如何。諸將以爲軍官則紅衣羽笠。太平簫大角云。蓋藩胡之見我國使命之行。而有此云云。兩海文筆至拙。回書中須用尋常文字。才可解見。而且其書末端二款說。以是結末。南朝以兩皇子分立兩國云者。苟答以此事。則本國時無所聞。我已助南朝爲何棄之云者。今之出兵。亦迫於不得已也。豈有更助之理乎。此海之密言者○當日戰所胡人來言。左營中有一將。終始力戰。依於一樹下。手劒打殺。不可勝數。身被重鎧。矢集如雨。終不能傷。有一賊。以槍刺之。手把大刀而仆。終不捨棄云。云。其時同見軍士所傳。左營將宣川郡守金應河之狀也。胡中亦皆稱說矣。事聞。贈資憲大夫戶曹判書。記其一生所行及舉朝輓辭。名曰忠烈錄。印行于世。朴鼎吉詞曰。百丈深河萬仞山。至今沙磧血痕斑。英魂且莫招江上。不滅凶奴定不還。○天朝累遣差官。祭于龍灣館。本國立廟義州其後辛酉

答胡書
如公也
之曰同
曉の疏

贈遼東伯祭文不錄○命製答胡書。爾瞻疏。伏以。一自降虜賊。鄭應井等持胡書入來。舉國之人咸謂。殿下雷霆之威。奮正大之義。斬使焚書。奏告天朝。而反以羈縻一策。下詢于備局。則大臣及諸宰。叅以經略。各獻其議。又於再昨。牌招諸臣。使之更加詳議。朴燁所答書辭。備局已以遵奉。聖教中旨意。兼採諸臣獻議。令承文院善為措辭。急急撰出事啓下矣。夫和者。兩國相好之謂也。或稱以婚媾。齊之於吳。漢之於匈奴是也。或托以兄弟。宋之於遼金是也。今者建州逆天犯順。建號稱朕。僭亢無忌。我國為好。既不可以婚媾。兄弟舅甥為名。則渠將以北胡自處。責我以如事上國。其果謂交隣之比乎。此今日之和。固異於古之和。而難從之事。無厭之求。必至之禍。不待智而已可知矣。為和之說者。以為兩帥敗衄。虜氣益驕。若不為講和。則鉄騎長驅。非朝非夕。是大不然。天朝之覆育我國。眷顧拯濟。無所不至。宜諭建酋。勿使侵犯。亦非一再。則我國之有所恃。渠所貫知。今此求和。必欲使我獲罪於天。見絕於父母之邦。然後操縱梃闔。當在渠

手。不幾於楚君臣見欺於張儀。齊交北絕。秦患西起者乎。今之所答。雖不滿渠心。渠方與大國為讐。必不忘遼薊之議後。而先肆其橫噬於我。天朝將官致疑於我國者甚多。經略所謂助順左袒。劉都督所謂貳奴背德。鎮江游德所謂上年徵兵終始低回。胡文挂所謂爾軍不即進救。因涕淚如雨。軍門票下人所謂朝鮮元帥既為降賊。相與痛愕憤罵。韓將所謂汝元帥不戰降賊。其情叵測。又曰降將家屬果囚係否。常差官所謂朝鮮兩將率三營全不開營。于守陴所謂爾元帥率軍降賊。兩元帥嚮導胡兵。將攻遼陽。又使其侄探其囚降將妻孥虛實。漢人沈姓者所謂弘立等結縛喬一琦。投降奴賊。然則弘立等既負大國。又負君父之事。天朝人聞之已詳。於我國宜乎起怪生訝。騰謗積毀。乃至於此。豈我國信而見疑。忠而為戮之時乎。今若虜使纔回。和事便透。朴燁一尺和書。傳作附賊之左卷。皇朝峻論嚴彈。雷喧霜烈。公議所激。天意難測。其將巧言利說。容卞於其間乎。抑將以輿金輦璧行賂而得免乎。今以虛喝之虜書為怵。而不以必

加之天討爲懼。此臣之所未曉者也。壬辰之亂。先王痛斥倭奴假途之請。八方魚肉。三都灰燼。匹馬西塞。國命將絕。請和之倭書繼至。據義之大節。彌確終致。天朝興師大援。使無國而有國。則豈非殿下之家法。而今日之所當體行者乎。今果盡自強之道。勉圖存之策。飭令邊臣嚴其辭說。以答奴使。又將奴書奏聞天朝。然後如前日。聖教所謂務去雜事。一意征繕。養兵選將。收用人才。寬恕民瘼。慰悅人心。大開屯田。造鍊器械。城池瞭候。無不整理。則群情自礪。士氣百倍。守邊有禦暴之固。衛邦有備患之實。父母孔邇。益虔候度。內外罔間。永保藩維。將有辭於天下。而垂聲於萬世矣。無狀小臣。一心徇國。所許者忠貞。所期者名節。忝文衡之任。殫翰墨之技。其於事大之文。交隣之書。絲綸之命。讚頌之作。莫不焦思悴神。六年于茲矣。不幸今者遇此不經。憤惋之志。慷慨之情。自倍於他人。則交趾之草檄。頡利之露布。臣能竊比於古人。蹈襲於前軌。若使奪其本性。拂其素心。則負天朝忘宗社。陷我君上。辱我臣民。做數行之文字。致一言之喪。

邦。臣寧攬指斷腕。毀硯焚筆。而不敢從命也。此書所關。非但臣之身名。汚蟻我國二百年事。大至誠。至此掃地。三韓文物。至此左衽。列聖基業。至此將絕。生民倫紀。至此將滅。天地之閉。山河之羞。尙可忍言哉。夫秉彝所存。人理所在。孰不有此憤。孰不知此痛。上自卿相大臣。下至士庶軍卒。憂危驚愕。氣像慘惻。實舉國之同然。而頃日備局獻議諸臣。雖未盡吐。其間一二措語。則皆有執經據義之大旨矣。臣獨愚妄。乃敢罄臆披腹。極言大呼者。此身雖可惜。而吾君不可負。此心雖可欺。而天理不可誣也。雖在危亡。民亂之國。尙有直臣。況此明良際會之日。臣何不言乎。聖明平日以高官厚祿待臣者。只欲使臣榮侈於一世。炫耀於衆目乎。將欲脂掌於末路。從史於周行乎。臣恩寵旣極。涯分已溢。一死之外。更無所報。其不忍背天朝者。即不敢背聖明之意也。其不忍通此奴者。即不敢忘國家之心也。臣非不知將順奉承之可微安享。蹇諤違拂之自速咎戾。而如是強項驟諫。轉喉觸諱者。固非有一毫爲身之謀。則區區本情。聖明亦必洞

燭而下察矣。臣遭遇 聖明。每以堯舜期待。而今 殿下反以麗季之主。明臣良。善於策應自分。臣尤不勝痛哭焉。臣請以高麗之與遼金和事始末言之。高麗成宗五年。契丹遣使請和。而高麗未之報也。十二年。契丹侵破蓬山郡。高麗乃請和。翌年。奉行契丹年號。睿宗十一年。金主阿骨打遣使來。又十二年。金主寄書自稱爲兄。謂高麗爲弟。十四年。金主稱朕。下詔于高麗。仁宗四年。告太廟。筮事金可否。遣使稱臣上表。然則高麗兩被遼金侵逼。不肯甘心。遽知。至八年之久。而方許於契丹。至十四年之久。而方許於女真。乃復稽疑於太廟。其遲難慎至觀勢度時之意。固可見也。焉有凶札一至。奴墨未乾。惶惑罔措。唯恐失意。即與之修好乎。且高麗始以講和爲名。而終未免率服於彼。奉朔上表。貢琛不暇。金之於高麗。初以兄弟爲約。而不數年。遽有下詔賜馬之賜。視以臣僕。賤辱無紀。 聖明以爲今之後金。不踵前金之遺跡乎。備忘中有一如前朝之教。故臣敢歷數備陳如右矣。 聖明且以弘立等不幸陷賊。凡所聞見密書以啓。有何不可爲

教。含血之類。莫不氣塞。弘立屈膝。讎庭。伏奉賊諭。回呈則稱汗。別錄則稱滿。其委質歸命之計。已著於先。送通事。亦無戰意之日矣。至如渠所狀啓。不得自由。必經奴眼。定其可否。然後送之。亦不敢書萬曆年號。持書人渡江填書以達云。是則弘立虜塞中一俘囚。毳幕中一厮役耳。與 殿下君臣大義已絕。其爲 殿下悉爲盡誠。如古之傳送蠟書者乎。觀其所報。無非恐脅指揮假息全軀之語而已。弘立之負 殿下如此。而 殿下之望弘立尙如此。臣竊悶鬱焉。 聖明若不以力請 兵罪臣。而以不能謀國罪臣。不以不作答書罪臣。而以不能匡君罪臣。則臣猶含笑而入地矣。臣年今已六十。雖或須臾無死。與其苟且於禽獸之域。廁迹於披髮之俗。無寧力爭而死。庶作結草厲賊之鬼也。噫。不從君命。是爲不忠。見義無勇。是爲非人。惶恐伏地。以竢嚴譴。伏願 聖上。亟下鈇鉞之誅。以彰違慢之罪云。批曰。卿以一張笥子。能禦長驅之賊乎。爾瞻以忠節自許。而非何薄於大妃也。如見肺肝。無非詐也。

○答胡書。朝鮮國平安道觀察使朴燁。奉書于建州衛馬法足下。惟我兩

國境土相接。俱是帝臣同事。天朝者二百年于茲。未嘗有一毫嫌怨之意矣。不圖今者建州與天朝構釁。兵連禍結。以致生民塗炭。四郊多壘。豈但隣國之不幸。其在貴國亦非好事。天朝之於我國。猶父之於子也。父之有命。子敢不從乎。大義所在。不得不然而事在既往。今不必言之。鄭應井等先為出送。致款之意。亦可見於此也。隣好之情。亦豈無之。來書有曰。以我初來。若有犯大國皇上之心。青天豈不監察。此心足以保有世業。而永荷天庥者也。自今以後。復懷好音。偕之大道。則天朝寵綏之典。不日誕降。兩國各守封疆。相修舊好。豈不美哉。惟此意轉告幸甚。○體副使兼元帥書狀。月十五日。自安州巡審江邊。到昌城。走回人口。傳奴酋軍兵。以天兵防禦事出去。恐我國軍卒作亂。兩班出身以下。諸軍六百餘名。盡殺之云。兼五道都體察副使張為分送事。該道軍兵之赴戰。明分死亡者。衣服裝具之留在防所者。所當一一搜出。還送其家。使其父母妻子作為虛葬。以憑祭奠事。而各其防所該官。道未下來前。處治不明。太半無置處。極

為痛恨。道以此事委來邊上。十分明覈。時存者覈出。各其隊內人名。并錄物件開數。赴防人中有馬人。抄出載送為去乎。在此雖不知某物之為某人所留。若使其妻子見之。必認其為己物。物雖不重。國家之不以存亡。二視各軍之意。不可不明白處之。故送去為去乎。令賚去軍士。一分給于其家。使知國家德意。施行云。全羅各官本道哨官李福命准授南原戰亡申億均等十八人本府軍死者百餘人只舉左右營殺手而已。各道三軍諸運發送。本道監兵司十七日。益山犒軍。都中失火。自鍾樓銅峴至南別宮。延燒數千餘家。人畜死者甚多。○二十三日。有虛驚倭賊。或犯古阜金溝。或到任實南原。避亂者滿道。○天朝宮殿樑上有大蛛。蔓絲成字。十國歸盡後。申犬是英雄。青丘與赤土。遑遑守空城。未詳其義六月初三日。觀象監啓。日上有黛色。內赤外青。報朝答胡差官梁諫。○書到建州。奴酋又遣書曰。後金國汗。奉書于朝鮮國王。今見來書曰。四郊多壘。其在貴國非好事。我國之于天朝。猶父之于子也。今後偕之大道。則天朝寵綏之典。不日誕降等語。諒必南朝所言也。且夫南朝素常禡言

上の文書に對して
の如く書

嚇論孤甚厭之。昨孤奉書于國王。是伸孤素日之惱。以聞國王也。並不回答。去書之言。何據南朝之言。而差朝鮮之人也。今國王或意欲靜坐。而問看變。則在不欲看變。主定一心。要與孤斷然同機。則我兩國當寫盟言之書。殺白馬祭天。烏牛祭地。當天歃血。焚書盟誓。方可爲信耳。況此盟書。是爲子孫世世永遠相好太平之機。除非如此盟誓。何有信也。昨日陣上留住十員將帥二員。奉書而去。見留八員云云。今國王差大官來。不好空回。以十名降人給去。○大旱累月。○姜弘立別錄。前日安汝訥等送去之事。出於急迫。凡干聞見。不得詳細陳達矣。小弄耳在滿浦。先通我國差官鄭忠信入來云。藩胡及忽溫來此者。皆知忠信之名。曾令一路部落。優厚接待。至於迎逢之軍。先期整齊。臨時定送云。胡中相傳。我國多送信物。大小胡人無不喜悅。曾謂諸將曰。朝鮮送物。我豈獨用。當分爾云。大小胡人皆言。差官入來。汝當出去云云。差官未到前數日。我軍分置外村者。皆聚城中。付差官歸云。五月二十六日。小弄耳先到言。差官鄭忠信不來。文書平

安監司爲之云。曾即令停止迎逢之事。翌日曾令管文書者彥加里大海劉海李相介等。出迎差官於中路。出其文書。謄抄以來云。文書若好。則椎牛設宴以待。若不好。則只給孩鴨供饋。其日昏。彥加里回來。臣使通事親聽於劉海。則文書一無好語。又曰。差官當日城外還送云云。自外村來聚軍卒。並爲還送。臣等悶其無可奈何之際。通事言于彥加里等曰。彼此文字不同。措語恐有未盡知見之處云。是夕曾始送兩胡人。迎來差官寓於外城。而翌日阿叱耳大海劉海等。偕差官來。臣等所寓。仍出文書。置於臣前曰。貴國文書。恐有未盡解見。請一一解釋。臣即展書謂大海曰。此文書何語不好乎。阿叱曰。此文書何以平安監司爲之乎。臣曰。我國待隣國規例。本以其道監司主之。故日本則慶尙監司爲之。又曰。馬法者指汗乎。臣曰。指汗。左右之人以轉告二字看之可知矣。又曰。何不書金後號。而只稱建州乎。必不以隣國待之也。臣曰。我國之稱建州。自前已熟。下文稱貴國云。則其不以隣國待之而然耶。又曰。四郊多壘者。以東西南北圍抱聚國

之說乎。臣曰。此乃古文字。是中朝四面防守之事。非指圍抱爾國之謂也。又問。鄭應井等出送之事。百無致謝之語。又無求索將帥之語何也。臣曰。應井等先爲出送四字。是乃後日出送之請。而隣好之情等語。豈非致謝之意乎。又曰。與南朝相好之言。何自而發乎。南朝通于貴國而云云乎。臣曰。前日貴文中。有犯大國之心。青天豈不鑒察等語。故聚國發此言也。阿叱耳頗解顏色。大海赧然曰。小的粗知文字。不得解見云。阿叱曰。當告汗前。因即起去。俄而復來。以酋言致謝於差官曰。有失迎接之事。甚愧之。即令移寓於臣所寓近處。封送牛酒以待。而文書還給差官。四五日後始受之。蓋終始以非國書不快之。酋與諸將會議我國之事。第三子曰。朝鮮與南朝同父子。而不欲相和。又無送物。當速盡殺其將士。仍舉兵以擊可也。長子貴永介即怒而起。酋呼問之曰。與南朝相戰。不可不與朝鮮相和。陣上之約。不可負也。盡殺將士。決不可爲。酋曰。當從汝言云。差官之來。無一送物。酋之妻妾及諸子諸將家屬。無不失望。小弄耳之所得於滿浦者。

如高の三子ハ
相引と成らば
長子貴永介ハ
を石と云

西古里の事知考

紙束牛隻等物。酋盡取之。只給綿布云。潼關土兵之女。爲忽濕所捉。轉來于此。爲酋愛妾之婢。故其傳如此。初九日。西古里。哥男女七千餘口。來到奴城外。此胡種類。居此胡城上。今十二日。酋與諸將出去郊外。仍請臣等及差官相會。再三懇請。臣等與差官出去。酋令將迎接于小帳。使阿叱耳傳言曰。和好得成。則相與握手。同坐以語。而今無可信之人。故遠處各坐。無以爲恠。頗示慙懃。設酒飯而罷。十三日。酋盡軍馬出去。傳聞甲騎六萬步卒三萬。而未能的知。向開元。使其中軍舍胡名貴永守城以待。差官十六日。開元遼東堡名見陷。總兵鄭郎中被害。男女殺死可至六七萬。搶來女子及向化蒙古。連絡四五日。慘不可言。酋姪子列於八將者。一人戰死。軍兵之死亦多云。而例甚秘之故。不知其數。酋與諸將。領兵留屯者。片城名舍使小弄耳問于臣等。癸巳年間。南坡堡人物三十餘口。還送滿浦。而貴國不爲回答。辛亥年間。河世國等被執還送。而亦不回答何也。前者忽濕恐陷貴國堡。而今與相和。又給祿米。聚國則不犯貴國。今來將士。好待如

此貴國何無致謝之意乎。臣等答曰。癸巳辛亥年間事。不過邊將之不稟朝廷。忽温既知其死。懇乞和好。不得不應也。貴國相好之事。豈忽温之比哉。曾在者片城。成送文書。使舍傳于差官。舍來見差官及臣等。示其文書曰。何如。臣等曰。上面說非聚國之意。如是言之可怪。舍曰。雖非貴國意。我國所見不過如此。故如是言之。然已往事。不須言之。臣等曰。我國若靜坐兩間。則豈遣差官到此乎。盟約之事。自古有之。而我國本無祭天之規。恐有所難也。舍曰。不然。則兩國以何事爲信乎。貴國使到此。與大奴盟。我國使上貴國京。與政丞盟云。臣等力爭其不可。再三詰卞。始言境上送大奴與監司相盟云。且謂差官曰。此後回書。非我國御印文字。則不須更來。而書中之意。不過不復助兵。而和好之後。子子孫孫不可相背云。差官曰。俺以此意回報。舍謂彥春曰。和好與否。爾可星火回報。無如前日通使也。劉海來見臣等。僭言。今去文書回答之際。若非貴國和事不成。安知貴國不被搶犯之患耶。胡人性毒。若至發怒。悔無所及云。我國軍卒之分處城中。

奴兒哈赤
居城

外村者。太平逃走。不知幾介生還。今此差官之還。不爲許送。軍卒等一時盡逃。聞於中路被捉。見害者甚多。臣等之至今全生者。不是甘心附賊矣。○奴賊設於高陵上築石城。不方不圓。石城三尺排隔長木一件。如是累次高六丈。作門八處。城內有井泉。奴與子孫咸居其中。皆作瓦家。所謂子孫八將之類也。奴僕雜居城中。城濶昌州一般。子城外四面胡家。外城外東去五里許有倉庫。北距五里許。聚爲一區。名曰高麗村。城南北大川橫流。合于西方。直流乎三叉河。西距五息程許。新築山城。兵馬留駐。當初帶甲百萬。步卒二萬。東西戰後。餘存僅五六萬。酋以下八將。日日供辦。各有農所。奴婢自備度日。差官一行。八將收合而供之。如此各處所奪之物。分用於八將。開元陷城之日。餘許部人先以軟灰亂散。次以石塊打殺。奴軍退却。名將逢箭而死。軍卒亦多傷死云。唐將投降李永芳。佟夢真等。與弘立往來。言笑自若。弘立曰。學書之人。豈忍從之。永芳等曰。我等不忠不孝之人也。去後足跡不復來。奴酋黃袍雙蓋。往來無常。八將一老胡姓崔。癸

丑生。二貴永介。奴長子。三多乙舍所吐里。奴弟。小乙可赤長子。或阿未羅古。四亡哥士。奴次子。五弘太住。奴第四子。六豆斗。奴長孫。七所道里。奴侄子。八阿斗。奴從弟。天朝拿誅楊鎬。以熊廷弼爲經略。胡答書以下梁諫持來警報

胡書又志

九月。各道四運軍發送。二十四日。本道監兵使到益山犒軍。凡三千餘名。嶺南自今運赴西。自此資木八結收給○胡差持書又來。其書云。今日之事無他。不事南朝。子子孫孫。永結盟約。踏印國書。使高官入送。則當留其人于此。而亦使我國人直送貴國京城闕內門下。與貴國政丞談話而來。刑白馬謝天。殺烏牛祭地。軟血有盟後。元帥以下軍兵盡送。然後各棄弓兵。只以一鞭往來。如前開市交易云。

姜弘立等狀

十一月。姜弘立等狀啓。去八月十一日夜半。逼臣等留存員役十九人。自老城登途。來置者。片城中圍以木柵。防守甚密。每日只得數升粟米。薪水亦難。凍餒辛苦之狀。有難形言。臣等俱以無狀。受國厚恩。債敗之餘。欲以頰舌緩兵。以圖殞結之報。且念羈之事或成。則庶可復見天日。忍苦苟活。

九朔于茲。此間事情。雖未的知。時時頗聞有將犯我國之言。而恐有謂臣等促成和事。欲圖生還。做出此等說話云。故不敢上達。近觀此賊情形。邊上之憂。已到十分地頭。不得不隨所聞陳達。而今者更送差胡馳往滿浦。的知和與不和。便即回來云者。凶謀叵測。惟在廟堂。相機策應。千萬幸甚。近日所聞奴情。及河世國往來曲折。別紙開錄上送。臣等當初陣上。約以和事。擬紓邊患。而今日事勢。急迫到此。只自痛惋。仍想羈縻之策。廟堂必以講之爛熟。而至今不決者。無乃遼東有詰責之端耶。然一時應變。似難膠守。恐不可遷延歲月。以取噬臍之悔也。此胡之欲和於我國者。不過望其不復助兵。各守封疆。永無侵犯之意。我國旣以更難出兵救遼。則似不可不因其情而羈縻之也。况兵交使在其間。則一時約和。可救燃眉之急。而其於事大之誠。小無所缺。遼東之詰責。亦無其路。妄陳所懷。言不知裁。尤增死罪。臣等一縷殘喘。奄奄待盡。奴騎犯邊之日。乃臣等畢命之時。誓心一死。報謝國恩。所賣密符印信。僅不失墜。隨身佩持。擬於臨死之際。

與之俱碎。決不敢拋擲原野以辱國命。詮次善啓別錄。八月初四日。世國與差胡往滿浦之後。十一月夜半。擁逼臣等一行。來置者。片中堅固守。直莫曉其由。今得聞知。遼人投來者言。朝鮮兵來在遼東云。故如是矣云。八月十九日。酋領軍馬往昭北關。前此胡中聲言。十月望間。將向遼東。而及其出兵。猝向北關。北關原有二城相對。一則金台石所守。一則白羊古所守。城池險固。十倍於元鐵嶺。而酋督軍兵。張牛皮蔽矢石。鑿城以入。前者死傷後者繼之。城中不能支。吾台石自焚死。羊古出降。兩城軍卒。境內部落。盡驅而來。無慮累萬。所得丁壯之兵。分屬八將。九千餘名。日前胡之所患者北關。而今既破滅。大小胡人。無不喜躍。曰。如許關鐵盡破。遼東更何恃乎。鉄嶺之破。蒙古宰賽萬餘騎來救。見敗。宰賽及其二子副將四人。俱被執。副將一人。乃酋之妻。蒙古女也。酋因此誘脅宰賽部落。收合牛羊駝馬。連續道。勢將盡入云。九月十五日。河世國及差胡回來言。我國即當回答和事。而唐官以徵兵事出來。我國一切不許。緣唐官久留。事體非便。

北關有二城也
昭北關
八月十九日

金台石
白羊古

宰賽

未即回答矣。近日唐官將回。不久入送差人。故借差胡轉報此意耳。酋及諸將累次招問。世國曰。遼東人來言。爾國軍兵來在遼東。汝何隱諱乎。世國曰。豈有此理。不信吾言。願與來言者同囚。我兵若來則斬我。不來則斬誤傳者可也。酋曰。差人若來。則可知爾之情實矣。九月二十一日。酋領軍馬及老弱牛驢。關嶺瀋陽之間。故聚在野之穀。或埋或隱。蓋欲誘引遼兵出戰。而遼不出兵。瀋遼城上二堡。各有軍兵三百。據險自守。而胡兵攻陷。廝殺無餘。瀋陽先自空城云。河世國來言。我國差人當入來。胡兵盛言。自牛毛寨萬遮嶺兩路。朝鮮人入來云。酋即送軍馬防守。而其兩路近處老弱。則移入城中。丁壯則在家看守。登山候望云。十月初七日。酋令其婿好里於斗等四將。來問於臣等曰。我國與貴國。本無仇怨。故欲相和好。而貴國不欲相和。但令通事虛報。而更爲助兵南朝。此何理也。關鉄如許之敗。貴國不曾聞知耶。貴國之城。比南朝堅固幾許耶。貴國欲和與不和。必成詳言。明白說破。且多恐喝之言。臣等答曰。兩國本無仇怨。豈有不欲相

和之理乎。今聞世國之言。唐官以徵兵出來。而我國不許。唐官久留。事體非便。而入送差人。則已定方爲治行云。想途遠自然稽緩。助兵遼東。言之者妄也。此國若不得和。先欲用兵。則當初陣上指天之誓。背之在此。不在我國也。且勝敗本所未定。豈必此國之利乎。俺等以兩國和好事。至今生活。若至相戰。則不過一死而已。然終必相和。復何疑乎。好好里等曰。當以此意回報汗前云。阿斗逼臣等所寓木柵之外。呼通事問差人入來之奇。答曰。苦待云。則阿斗曰。兩國相好。則子子孫孫永無戰爭之事。而貴國至今不答。豈不天乎。會寧藩胡阿羅味來傳會寧府使之開諭於酋曰。前日所受祿俸。何至今不受乎。若欲加受。則當啓聞加給云。酋但點頭。而不爲皂白云。近日自遼東投入胡中者。連續不絕。皆言方改守備。而馬軍在城外待變。步兵登城守禦云。酋方與蒙古相通。約與同時共舉。蒙古犯廣寧。酋犯遼東。動兵日期時未的知。酋之二。蒙古太三子紅太是言於其父曰。朝鮮如許宰。賽皆救南朝。宰。賽今已破滅。朝鮮雖以和事爲言。未見的

蒙古相通

報。其實更欲助兵。不可置朝鮮於後。而爲先攻遼東之計。酋聚諸子諸將。逐日謀議。而例甚秘之。但聞牛毛塞萬遮嶺。兩路近處部落。造作長梯云。守直胡人仁必言。胡將日加多。乃北道藩胡而爲酋所親信者。爲言朝鮮之事。我已知之。前日忽溫攻潼關之後。始與之和。優給祿俸。今之和事。非我兵出去。必不成矣。昨日酋招謂世國曰。今送差胡。前往滿浦。爾可偕去。差人來否。的知回來云。守直胡人仁必密告曰。即刻潛聞大海之言。汗以爲世國及汪朱回來言。朝鮮以唐官之故。未即回答。近日唐官將回。差人當入來云。至今無形影。遼人有言。朝鮮兵來在遼東云。必是合兵來攻。而姑爲此瞞我之計。今送差胡。更往滿浦。探取差人入來之奇的。知其和否。然後我有可爲之事。又密言曰。此處軍兵。冬前不向遼東。定向寬酋鎮江等處云云。大槩此奴之出入。聲東擊西。雖未的知。而近日窺覘。則似不在於遼。而牛毛萬遮近處。造作長梯。及將向寬酋鎮江之說。極其叵測。而日加多之言。則凶悖尤極。或不無衝突邊城之虞。言念及此。不勝悶塞。二

十一日。秘密備忘。昨見弘立書狀。伊賊犯我之計。灼然可知矣。造作長梯於牛毛嶺等處。非犯搶我國之計而何。前日下教累度。而一日二日終不善處。坐致宗社之危亡。卿等其果安心乎。今日之計又緩。則彼賊之疑尤甚。一邊具由移咨于經畧。請兵來援。而一邊急急開諭差胡曰。經畧差官久留不還。新經畧差官又爲出來。時無助兵之事。但入送差人。耳目極煩。爾等豈不知之。和之成否。何拘遲速乎。差官回還疾徐。未可知也。爾於二月間。更爲出來。或待其差官之回。差人入送之意。以金完。時爲滿浦僉使之言。善措答送。且曰。爾等若疑之。則由中原地方。密探事情。則差官往還可知云。則差胡亦必信之矣。如是而善過今冬。則解冰前可保無事。若屯兵邊上。劫盟長驅。而此時方講羈縻之策。其辱國必大矣。急急善處。出來差胡。雖欲經歸。善辭再諭。厚待挽留。河世國速爲上送事。言于備局。又備忘記。亟發大兵。堅守寬甸鎮。江東路事。速爲移咨經畧。而入送譯官。別人情優給事。言于備局。又速令姜弘立等母妻叔弟。密通私書。而私書則雖設奇

計。固無所害。女真貪婪。非貨賂亦難行計。弘立家備送無防。弘立等死重。若能欺兵緩禍。亦足可矜。古者石仲龍免死。恐或此也。下詔之事。不爲體行。予意不欲下教。只待賊奴搶犯之日。而不忍見宗社之危亡。敢此諭之。急急詳議善處。言于備局。又李時發某使稱號下送西邊。聽張晚節制。領兵死守宜當。令備局議處。備局啓曰。國事危急。人才可措。正宜拂拭。收用以責其效。故臣等每以收用人才之意。擬爲上聞。而惶恐不敢。今承聖教。極爲允當。李時發贊畫使稱號。隸於體府。急速下送。聽張晚節制。策應軍務。領兵防守爲當。敢啓。答曰。此事係國家安危成敗。右相今夜往領相家。相議善處之策。又此何時乎。兇賊已造長梯。聚會軍兵。長驅之患。迫在朝夕。何暇上號乎。邊憂孔棘。宗社危亡之日。予雖不淑。當以何心。敢受虛號乎。况大臣不體予意。下教備局之事。尙今不爲回啓處置。痛心痛心。答胡事。與議號緩急如何。議號改擇日退行。大臣早會備局。急速議處。言于備局。尊崇都監禮曹。大舉武科。是時邊事日急。咸聚京城。事勢

緩退分送承旨于八道。設場取人。閱汝任湖南。金繳嶺南。朴思齊湖西。二十日開場。凡取萬餘人。榜號萬科。自海科以來。代射出身。不知其數。近年尤無忌憚。至是身不赴試所。而名在榜中者居半。試官亦急於貪多。故不明察。亦可以觀世變矣。試所湖南則潭陽南。則星州湖西則公州。草溪前郡守李大期上疏。申救鄭蘊。因論時事。竄白浪島。

庚申萬曆四十八年

文宗聖王
迎駕

朝廷以萬科為濇。施以初試。更為覆試。覆試益濇。後辛酉盡給科。秋七月二十一日。萬曆皇帝崩。在位四十八年。皇后已於四月崩。太子即位。改元泰昌。未久繼崩。太子立。改元天啓。因天旨。自十一月至十二月晦。用泰昌年號。八月。文希聖李民竄自胡中出來。冬十月。異鳥自日本雲屯風震。漫塞海上。過巨濟至智異山中。交戰累日。死者相接。積峙穢氣。聞于山外。其餘向北飛去。泰昌元年十二月初十日。夜有天變。晦夜彗孛印天。四面進退相搏。東

隙未補。西釁大啓。宮役苦劇。黨禍日甚。民窮財盡。國用蕩竭。賣官鬻爵。人不自由。祖父田民痛哭。反賣金冠玉帶。涕泣懸繫。此時生民。後人想之。

熊經畧差官云。女將秦氏以寡婦。智略出人。能作大霧。着男服率二子。領兵三千。已為過關事。報朝天朝遞廷弼。表應泰代之。除昭聖貞懿王大

妃位號。降稱西宮。幽閉困辱。慘不忍言。後癸亥西人舉義復位西宮之識驗矣

○天啓元年辛酉光海十四年

春正月十八日。彗孛又見。相搏移時。闕中有穰災。指囑於西宮。圖害之術也。登極上天使劉鴻副使楊道演。牌文到京。禮判李爾瞻以遠接使發行。幼學申之益上疏。臣謹按坤之初六曰。履霜。堅冰至。先儒程頤釋之曰。陰之始凝。而為霜。馴致其道。至堅冰也。人主之待小人。亦猶是也。若不制之於始。而馴致其道。至於權勢已成。則雖欲制之不能也。昔唐文宗謂周墀曰。朕何如周赧。漢獻。墀曰。彼亡國之君。豈可比於聖德。文宗曰。赧獻受制於強諸侯。朕受制於家奴。殆不如也。泣下沾襟。夫以文宗唐家之明主也。宦寺宮

中一奴僕也。以明主而御奴僕。進之退之。在於呼蹴之間。而馴致其道。及其權勢已盛。則其制之也極難。至於泣下。而不能却之。非其明不足以察其奸。智不足以退其邪也。權歸於臣。而威奪於下也。彼宦寺之志。不越乎貪權固寵。而其制之極難。猶如此。況如趙高王莽之類。不能制之於始。而乃欲治之於終。不亦難矣乎。臣伏見李爾瞻非向來宦寺之類也。賢愚邪正。固非山野孤蹤所能預知。然國人皆曰。凶狡奸慝。前古無比。則亦可以知其爲人乎。以其現出於政事間者而言之。則締結羣奸。作爲心腹。臺諫侍從。皆出於門下。間或有言其罪者。則輒招兩司群起而攻之。曾經臺侍者。猶被遠竄。階列正卿者。未免下獄。至於儒生及宗室之陳疏者。皆下之於禁府。按之以重律。或死於杖下。或投於荒裔。此則趙高王莽時所未有者也。且禁府王獄也。非有關係。宗社國家。則不得囚於王獄也。臣不敢知言爾瞻之罪者。有何關係。宗社國家。而乃敢治之於王獄乎。臣之惑至此而滋甚矣。臣竊聞爾瞻於頃歲敢爲詐筭。

與凶奴和吁

殿下何嘗有一毫講和之意哉。渠敢倡爲此說。以沽其直。非欲納殿下於無過之地。實有心於彰殿下之惡名。傳播於國中也。渠之意恐或見泄無所逃於聖明之下。則先自大唱。欲爲脅衆免罪之計。豈不凶且慘哉。書傳於中國。而刊行與否。則臣不知也。虛實之間。旣已出於人口。傳於人耳。如鄭之良等疏所云。則人臣負此罪名者。何面目立於天地間乎。大槩爾瞻之縱恣無忌。其所適者漸矣。申景禧爾瞻之家臣也。及其凶謀現發。被捕於爾瞻之家。而人皆畏之。莫敢以一言聞之于殿下。許筠爾瞻之卵育。無異父子。而逆狀旣著。經先殺之以滅其口。而人皆畏之。莫敢以一言聞之。殿下黃廷弼爾瞻之奴隸。國人所知。嚴鞠廷弼則直招必矣。爾瞻慮有患。夜使人潛殺之。結案捧招之時。死已久矣。不能使之著名。乃摸手寸。有若不識一字者之所爲。吁廷弼累度上疏者也。一息尙存。則其不能著名乎。觀於柳希發啓辭可知矣。殿下試出其結案而考之。著名乎着手寸乎。著名則未死之前也。着手寸則已死之後也。此則一國之人。

有耳者皆得以聞之。有口者皆得以言之。昭昭乎不翅若十日之難掩。爾瞻乃敢上筭。欺罔。聖明曰。廷弼臨刑。大呼其妻。欲掩經斃之跡。是可忍也。孰不可忍也。以臣欺君。在法當誅。而人皆畏之。莫敢以一言聞之于殿下。嗚呼。爾瞻行凶之狀。一國之人。耳能聞之。而目不忍見之。目能視之。而口不敢言之。是緘一國之口。而結一國之舌也。一國之舌皆結而不能言。則不測之禍。朝暮且至。而殿下莫得以知之矣。失如是。然後爾瞻始能唾手自訛曰。莫我毒也已。其所以爲凶者。將何所不至乎。然渠之所畏者。殿下聰明過於堯舜。度其終不欺蔽日月。故敢爲趙高指鹿之計。盡招兩司於渠家。而論黃吉男之罪。諫院先之。憲府將繼。幸賴聖明先燭奸狀。遂下嚴批。故嗚呼彼鹿與馬皆獸也。帝王養在九重之內。慮或有不之變也。我國之所以維持者。以其貴賤名分截然不相犯也。微末儒生之有罪當報者。亦使巫女探其家內。不許雜人攔入。所以重士族之規也。不

有偉卿。則吉男之疏何自而至乎。吉男之疏出於訴寃。偉卿之疏出於飾非。以三代立肺石達下情之法案之。則罪在於偉卿。而不在于吉男。欲止其鬪。當得偉卿是非之所在。雖三尺童子皆能知之。爾瞻敢爲變亂黑白之論以試之。要作擁蔽。聖明之赤幟。此則趙高之所不敢者也。夫趙高欲杜天下之口者。豈下於爾瞻哉。然不敢肆然加罪於人。而只能陰中諸言鹿者。是猶有所畏忌也。爾瞻則自謂權勢已重。何事陰中乎。遂肆然指揮三司。無異自己使喚之奴輩。生人殺人。惟意所欲。是趙高而甚者也。不可畏乎。至於妖賊之出入宮禁。欲爲咀呪之變。是宗社之大逆也。不有引者。渠何能入乎。爾瞻身爲禁府長官之日。使此賊魁處於凍地。有似乎欲其徑斃而滅其口者然。雖欲誘獄卒之所爲。而爲長官者。安得辭其責乎。况本府郎廳盡是爾瞻之門生者乎。自十餘年來。非出於爾瞻門下者。不得爲禁府都事。此亦爾瞻之腹心。路人所共知也。及其遞此職也。敢上僞筭。一以爲沽直販君之資。一以爲欺人自免之地。其心所在。明若觀

火。渠雖至均。安能逃於天地之量。日月之明乎。聖批一下。渠無辭矣。然臺諫之默無一言者。皆是卵育於爾瞻之門下者。知有爾瞻而不知有殿下。爾瞻之權。不亦重於殿下乎。伏願殿下。及是時而制之。俾無噬臍之悔也。過乎此。則恐非復爲殿下所制之物。安保其無昔日唐文之泣乎。伏願殿下。爲宗社深思遠慮。嗚呼。王守澄非無翊戴功於唐文。而權勢已重。則終使文宗下泣。韓侂胄非無定策功於宋寧。而權勢已重。則欲受寧宗九錫。李爾瞻非無保護功於殿下。而權勢已重。則縱恣無忌。憚至於如此。自古及今。奸人情狀。如出一轍。豈不爲聖明之龜鑑。嗚呼。好生惡死。人之至情也。生固可好。而生有所不苟。死固可惡。而死有所不避。十餘年來。言爾瞻而被重罪者。前後相望。臣雖至愚。亦曰人也。言之則死。不言則生。固已知之矣。猶且言之而不知避者。其所重在於宗社。而一身生死。有不足慮也。伏願殿下。哀其志。察其忠。則宗社之福也。臣無任披肝瀝血。殞越屏營之至。政院啓曰。遠接使纔出國門。攻擊之疏

至矣。別樣處置事。答曰。別樣處置。將欲何爲。回啓曰。儻接主人。莫重莫大。豈有爲人所攻而晏然行公乎。如不得遞改。則似當下諭察任。答玉堂筭。爾瞻事。自上當爲酌處。實非臺諫所敢指揮於其間也。爾瞻既受命在外。其分義惟當退進而已。渠安得任情直行乎。兩司之經先瀆擾於靜攝之中。大失事體。顛倒非一。而玉堂只請遞大建。可謂識事體乎。兩司之官并遞差。答三司請治妖豎之益之罪曰。原疏未下。三司無乃經發乎。不見疏辭。則尤不可如是。鶻突也。請治言者。殊非美意。申之益再疏。臣伏見兩司合啓之辭。驚惶戰慄。神精飛越。兩司皆是爾瞻之門客也。論啓之必發。固已知之矣。至於合啓。則不亦甚矣。爾瞻權勢之盛。至此之極。臣亦未曾料也。臣之血疏。豈徒然哉。爾瞻曾以渠筭。潛送中朝。要賣殿下。此言誠是也。則擯接之際。安知其必無販君賣國之變乎。宗社之存亡。在此一舉。臣雖知自惜其死。血忱所發。安敢不言乎。况遠接之使。改差。不過爲一政事之間。而今日差出。明日發送。未爲不可。豈有生事國家之理乎。

設或有急遽未備之事。不猶愈於爾瞻之販君賣國乎。兩司以爾瞻既出國門。聞有臣疏。中路去留。生事國家。爲執言之宗旨。此亦脅持之語也。伏願聖明。亟遞爾瞻。改卜他人。俾無意外之變。則實是宗社之福。而臣之至願。且以臣爲妖賊。以臣之言誣罔。此則臣有辭也。自三代迄于宋元。言權奸之罪。而目之爲妖賊者多。臣之一身。固不足惜。而爾瞻之權勢。不識殿下當何以抑之。兩司罪目。亦舉於臣之疏中。揆之國法。則所當先自避嫌。何敢晏然合啓以論陳之人哉。知有爾瞻。不知有殿下。縱恣無忌憚之情狀。吁亦慘矣。諸葛亮漢室之臣也。以亮之去就。占漢室興亡。而費偉論諸葛亮。亮受以爲罪。又從而勸獎之。曰志慮純忠。設使爾瞻忠如諸葛亮。猶受以不之罪。况爾瞻之欺君罔上。專擅威福。現出於政事者。不啻如十日之難掩者乎。且凡所謂誣陷云者。指其攻發陰私人所不知之事。而構誣之謂也。臣之疏中所言。皆爾瞻行事之實情。國人所共知。而殿下之所洞燭者也。寧有一字可誣之語乎。夫如是也。而謂之誣陷。非爲

脅制君父之手段。必不爲此啓也。臣竊聞頃日殿下特下嚴批曰。承望風旨。自不覺凌君蔑上。縱恣不憚之罪。使兩司小知人臣之義。則當惶恐踧踖措身無地。自訟自艾之不暇。兩司安敢自甘於承望爾瞻之風旨。肆然居臺府。糾彈人。爾瞻亦安敢自處於風旨。而受兩司承望乎。惟其自恃權勢已重。其如余何。故不思敬君之道。而反有脅制之心。頓無避嫌之意。而敢發蹙之計。纔見臣疏之入。不待啓下。而合啓遽發。合啓不利。則必且合司。合司不利。則必且加一等。不惟逼乎。伏願聖明。深思處置焉。臣躡躡子子。形影相吊。一言忤世。禍必不測。猶有忠孝一節。生而自許。發憤之極。瀆死何避。爾瞻兇狡之狀。路人皆知。而殿下獨不能知之者。言路杜塞故也。一自郭瑛之死。仗馬不鳴已四年。臣若不言。其誰知之。一封朝奏。合啓夕至。席藁闕門之外。以待斧鉞之至。微臣之命。實在頃刻。臣之一死。自分已久。但恐一國之人。皆以臣爲戒。無復有敢言之者。賊臣之勢。日盛又盛。射天之兵。雖迫至闕下。而殿下必不以知之矣。言至于此。肝摧膽

裂。痛哭之外。不知所言。幼學李擇善疏。伏以銓曹柄用人才之根本也。任官惟賢在乎此。任事惟能在乎此。以之而三司之得其人。在乎此。以之而六卿之得其臣。在乎此。其爲任。顧不重歟。賊臣爾瞻。至於植黨。卵育不逞之徒。陶鎔無賴之子。如任器之洪堯俊。安應魯。徐國禎者。以充銓曹之官。以故銓曹之有爾瞻。而不知有殿下。官人爵人。惟爾瞻之令是從。三司揔是鷹犬之輩。六曹半爲私人之子。四寸相避。著在甲乙。而好官之出不避親昵。而擬望焉。計任遷轉刻之金石。而初入仕路者。假稱叅上。而經出六品。甚至遭喪者。叅望。身死者。被擬。狡計萬狀。以期必中。其欺蔽。聖明。濁亂朝政。其罪極矣。爾瞻權勢。已到難制之地頭。欲制則生變。臣亦不敢請治其罪也。至於么麼銓官。進退之。只在一反手之間。豈難之有。此乃晁錯削縣之意也。伏願聖明。爲宗社垂察焉。天使問安。使承旨朴宗胄西下。

三月。天使渡江至義州。二十日。奴賊攻拔遼東城。義州府尹鄭遵直啓。

沙州遺事
附三月廿日

小通使崔奉傑鎮江探聽。月十九日。奴賊犯遼東三十里地。高麗村云。譯官崔屹胡監軍下人處聞見。遼東受圍。今已三日云。避亂唐人來在中江兩島之說。固難取實。當平明令崔屹壯健武士四名。鎮江衙門進去。則城中男婦。盡數潰散。游擊獨身在城。僅帶家丁三十餘名。屹進前問遼東消息。因呈臣名帖及所呈酒瓶。游擊再三稱謝。游擊雖外視壯氣。而自不覺其歎歎嘆息言。十九日。奴賊進犯遼東。經略及諸將空城出屯。退在三流下。翌日。賊亂入遼東。盡取玉帛。尙今屯結。天下不幸。遼城失守。豈天不助順。有此慘酷之禍。抑人謀之不臧。武畧之不競。畢竟馴致大亂。至於如此。使廷弼尙在。安有虜馬之南牧乎云云。游擊祝世昌所言。中朝之事。已不忍說。若賊乘勝長驅。橫行於寬鎮之郊。則我國防禦甚爲虛疏。緩兵將下。用軍器急速下送。巡邊使病重將死。想必聞變。輿疾入城。已爲轉報。請與協守。大槩我國凡事。每每歇後。不及期限。以今視之。接待天使爲餘事。調兵禦敵爲急務。火速講究。毋使臣枯死於一隅之孤城。事若危急。雖扼腕頓足。

已無及矣。因念進香使臣李必榮、陳慰使臣朴彞叙，在途逢變，未知死生。前日了臣私簡，月二十日約到遼東。奴賊十三日動兵，十六日黑山相戰。十九日橫犯遼東，二十日乃其未到之前。若於三叉等地，得聞賊報，則想必退入廣寧。然則可得生存，其迎逢人馬。十九日調發越江，二十二日到華境頓者介。二十三日聞有遼變，二十四日團練使本府出身尹孝幹告目。到處路塞，不得前進，不得已退來。訓導則登山潛進，聞見云。贊畫使書狀、胡監軍嘉棟預寨寬奠，奴兵四騎馳到寬奠，見潰人民納降事。又義州府尹報避亂唐人，席捲出來，自玉江至麟山上下島歧，扶抱號哭上下事。賊鋒之來，迫鎮江，又不可不慮。義州、昌城孤危難保之形，已著目前。內地軍兵，臣已傳令調徵，而因天使留平壤，列邑守令盡皆逢差，奔走支持。臣之號令，無以得行。凡千策應，朝廷指揮事。天使還差熊廷弼、經略姜弘立等別錄。本月初十日，酋盡率軍兵出宿于十里地。十二日到瀋陽城外結陣。十三日早朝陷城，即與城外援兵相戰，幾盡殺害。賀總兵以下皆

奴賊陷陽城
陽城三月十日

不免云。四日因留，十八日到混河，向遼東。十九日與中路援兵相戰，又殺一陣。進屯遼東城外，又與城下馬軍兵相戰，亦盡殺害。其日夕攻陷遼東城中軍兵極多，不能盡殺。奴兵分守城上城門，翌日將盡屠戮。酋令軍兵之相較者殺之，其餘一切不殺云。海州等處軍兵來言于酋曰：遼瀋敗兵已過三叉河去，將浮橋絕斷。我軍更無生路，生死願聽酋之所為。即削頭以送，往傳各處，使之安居以待云云。守直胡人末介等來言，酋有因據遼東之意，其妻子盡令移往。諸酋妻子亦盡隨去云。此外曲折，事出忙迫，不能一一陳達。原啓即刻酋使其胡將自遼東來，招通事傳言于臣等曰：小弄耳來言，朝鮮差官來滿浦云。若然則或從滿浦之路，或從鎮江之路，從速入來。可知朝鮮與我相和之意云。且今在此通事二人同往，率來云。今月十四日夕，小弄耳自滿浦到，臣等所在處，密言曰：酋每言遼瀋既敗之後，朝鮮差官不須來入云。而今者瀋陽已破，若只以滿浦開諭之說傳之，則必有難處之患。奈何。臣等答曰：我國不為助兵，汝豈不知我國待汝甚

厚。汝當善爲措辭。無令生事。豈不好乎。小胡答曰。雖死敢不盡力云。十七日夕自瀋陽回來。言于臣等曰。住見酋于瀋陽。酋辟左右問曰。汝往朝鮮何爲。如此久留也。汝等何日渡江乎。差官今又不來乎。小胡答稱。等待差官之來。以致日字遷延。差官已到滿浦。而追去差胡傳言。差官入來。則先爲來報云。故只率滿浦下人二名入來。今月初六日過江矣。再三詰問。小胡一樣答說。酋有喜色。以刀劃地曰。朝鮮有信。果有之相好之意。我豈不好之理乎云云。大槩上京必有差官入來之事。汝當留待云云。而其後久無消息。小胡先送差胡來報于酋。酋曰。差官來。則汝當見面先來。何只聽小弄耳之言。經自入來乎。速往滿浦。差官來。則汝當先來以告。我當差人接待云云。而小胡之來。只傳滿浦開諭之說。非但與彥春所言不同。此處事機有異於前。臣等區區過慮。開諭小胡使之盡力繙縫。而小胡以差官已到滿浦。言於其酋。令玆出送通事。專爲欲知。差官已到滿浦。事機至急。伏乞廟堂火速善處。兩司合啓。李偉卿以賊筠腹心。尙保首領。矢志後

如前朝對本相
教小胡言
收子

常懷怨之心。多結不逞之徒。昏夜聚議。人情危懼。莫保朝夕。請絕島圍籬安置。批密封下。校理蔡謙吉疏。獻納成夏衍以悌男腹心。晉善之子。與持平鄭良弼結爲死友。做出虛言。交亂彼此。請並命門外黜送。答曰。本館體面。與兩司自別。爾敢挺身獨筭。攻擊論事臺諫。是何事體。晉善果悌男腹心。則晉善父子擢置臺閣。孰主張是爾。亦謂國無人乎。勿爲煩擾。合啓請謙吉門外黜送。答。徐當發落。

夏四月。天使到京城。上年十二月。小弄耳到滿浦言。北朝南朝。一得一失。猶在于天。三月不違起兵。朝鮮今又助兵乎。吾國之人。非喫乳之兒。以外兒待之之狀。曾已知之。未知其末終如何。終不失信。乃隣國之相厚云。三月初三日起兵。二十日陷遼城。經略袁應泰。摠兵賀世賢等皆遁。遼民自剃其髮。盡爲投入。酋及諸將。各率妻子。爲恒久之計。義州府尹前日所報。賀摠兵率十二將投降云者。皆虛傳也。月初一日。小胡又馳到滿浦。與僉使鄭忠信語曰。遼陽之舉。貴國不助南朝。快知之矣。奴酋自稱後金皇

帝改元天命。朝報胡書。後金國汗致書于朝鮮國。貴國要以先年助兵南朝。以報救倭之功。今或不助南朝。各自保守。則過江漢人。不必納之。盡數驅回。此是我民不殺矣。况全遼等殺剃頭。倘若再助南朝。不必我說。朝鮮乃禮義大邦。何事不知。在貴國定奪。謹心。時賊分屯遼地招集遼人遼人黎家還入者多初六日到義州報。陳差官自聞遼城陷賊。日夜憂慮。斷酒喫蔬。初一日午時。其所送夜役。自鎮江回報。聞於越邊。差官一家。俱為逃脫。云。差官初不信聽。云。必此祝遊擊做出。令我驚喜過去。欲與同降。罵詈不已。其夕騎馬唐人五名。來到江岸。自言差官一家之人。真假未審。不即許渡。有頃差官送帖于臣。犬子陳世忠女婿白宗儉舍人鄢大官等。逃出至江。乞賜過船。臣即遣軍官送船率來。相持痛哭。慘不忍見。第慮各人。既知其父之來在我國。則向此逃來。或有是理。但各乘肥馬。別無憔悴形容。差官便生還去之計。初言陪侍。天使乘船還國。及聞子婿之言。賊雖在城。貪其玉帛。晝夜搬運。不出村屯。間路經走。可達海州衛鍋口。收管文書。依一本數張成帖送

來。俺之所以如是者。恐在途上。或有意外之變。人各持達於廣寧云云。而觀其氣色。便異前日。子婿家人相會如期。飲酒食肉。始自今朝。或者永芳以其切親。乃無送此招降。如我國囚次知督現耶。一本數張之說。亦不可曉。無乃以元數作為剩數。歸納於永芳。嫁禍於我國耶。非我族類。人心難測。設令彼忠義滿腔。在我道不可不預慮。十六日到義州密啓。劉天使帖諭陳一敬周應奎。一敬還去已久。應奎回稟。且以一封書。遞送臣處。使之傳於鎮江。游擊祝世昌棄鎮遁去。于今十餘日。累送人役。探其去處。而至今未得。天使私帖。無緣傳致。時方另差小通事。鎮江海上雙山等處。入送。得不得答。不答間。追于馳啓。計料月十一日午後。鎮江旗鼓官吳仲庫到越邊呼船。自云十分緊急事。臣送船率來。問游擊去處。及遼邊消息。仲庫答。游擊率其家屬。時在雙山。遼東避亂族屬。咸聚于此。所率婦人。日夜號哭。游擊亦不知所處。深以為悶。永芳在遼東。察院衙門。城中主客商賈。莫不知其貧富。有錢財豪富者。歷歷記籍。劫奪貨物。其中有富商李玉山

此以の法對答
吳仲庫の法如
是也
查五遊れり
月小

者財累鉅萬。今日奪幾許。明日奪幾許。徵索無已。玉山者終至自刎。即於袖中出游擊名帖示臣曰。俺昨日往訪游擊。游擊付此帖曰。我欲從往胡道爺收拾敗亡。期復鎮江一帶。但無盤纏不得行。爾須以我意歸報義州節制使。前日原發稻種銀價一百五十兩。百兩則准來稻計五十兩。可還取來。以此委來云。臣答即送管糧分戶曹。時在安州。即欲取去。今日送人。但無游擊官文。況此銀又非游擊所發。奈何。仲庫答。俺亦知無公文。則不給。當歸報取公文來云。臣因饋酒飯。從容問曰。若往來吾邊已四年。義實相親。當此之時。何無一句真話。仲庫答曰。我無非聞。不得向說。何敢隱而不發。因言劉贊畫國召募鄉兵。幾至萬餘。因發復州官倉以給軍食。曰。若朝廷又失復州。則錢穀必與奴賊。我以兵保守此地。何日私發之責我當之。仍請胡嘉棟請為軍主。曰。俺乃此土姓族。今無官守。大人即朝廷所差見任本州兵備。俺以私揭上於大人。大人以公車達請。天子誓心戮力同守。全復海蓋等州。以待天下兵至如何。監軍答。若然則好矣。吾等兵單

明。洋河の役日
從久。相新也
取れ日。是。ふ。と
ふ。

勢弱。敵衆氣勝。必須連結朝鮮。可作聲援。可保一隅。國縉曰。上年朝鮮雖曰助我。而深河之役。舉軍順賊。殺我劉將。今雖請之。不過陽諾陰背。或至臨難。再有前舉。則適足敗我事而已。自守則可。請兵則不可。以此時無一介前來請兵云。臣曰。我國之於天朝。夷險一節。可質神明。兩將疑訝。何至此乎。仲庫以手揮却。咄咄改稱。既有所聞。不得不畢說。又言。寬鎮之民。聞西兵大至。或在山谷。或在海上。日夜延頸待時響應。盤桓城裡。不為永走者。亦為此也。脫兵不至。而賊日逼。則願為朝鮮之一偏氓云。其言之真偽。雖不可知。而自中論議。每每執此。日後事機。尤為可慮。又問。前日君所言水兵之說。何如。答曰。水兵都在旅順口下。時無分守。鴨綠之奇。經略已領十萬。二月二十七日過前屯衛。即今已至廣寧。三叉橋路雖已斷絕。其西岸多置往來船子。彼此軍機。只許相通云。又問。我國陳慰進香兩使。退在廣寧云。欲差兩三人役。前赴海州。要達廣寧。其可得乎。答稱。姑徐姑徐。雖得前往。萬無許渡云。十七日義州報。本月初五日。自募人鎮撫吳大仁

三又揚州紀

接羅堡以西
皆賊日四

別武士盧伸信等。越江進鎮江。把總蔡承恩差人黃守德一同。初六日宿王堡屯。七日宿下涉柵。八日到岫山堤松山寺。其夜往至撥羅堡。居民皆說。此堡以西。人皆髡髮附賊。有吏胥金良者。自詣遼東投謁永芳。承其指揮。督削隣里人頭髮。殺不從者五人。爾等不可前往。守德惶惑曰。莫若速還之為愈也。大仁強言。如是遠來。不見衙門官員。何可輕去。守德問堡人曰。海州叅將今在何處。堡人等不覺冷笑。永芳已遣叅將劉姓人于海州。收拾兵糧。惜其牛馬人丁。胡官時方督促岫山備禦。則永芳亦差李姓人。到堡前備禦。李明德以死自守。軍民府庫。稱以散失。不為出給。賊之偽署者。不得接足云。撥羅堡在蓋州北四十里。蓋州時無一箇真。偽署捕盜。潘姓人方在城裡。誘脅兵民。復州則劉贊畫。胡監軍招集散卒。保守一隅。遼東避亂士民。歸依者甚衆。陳一敬初向海州。到岫山。得逢遼東同里人。問其家眷及鄉井依舊好在。永芳特加存恤。一敬欣然直向遼東。我國馱馬驅人及小通事等。知其順賊之心。欲為逃散。一敬令其家丁亂加鞭扑。

明人筒子島
及威化島日校

迫脅而行。其中一人年少。糧盡還為出來。臣於當初。察言觀色。已知有降附之志。至以何物銅鍋為此禍餌。事馳啓。而今果如此。不幸孰甚。賊得遼之後。不殺一人。盡剃頭髮作農云。義州報二十六日到。義州報。越邊唐人。自二十一日。還復奔波。各持自己馬。商船蔽江。爭渡投我。蘭子島及威化島。云。臣即差旗鼓官出身韓侃。小通事李命福。問其所以。渠等各稱。四月內。永芳差馬端報旗二竿。帶領剃頭。獐子六名。招降到我。玉江越邊古河地方。村屯住民及長酋守堡官王賜爵等。聚衆撲殺。厥後又差掌印陳堯道。執旗帶領剃頭。獐子二十一名。招脅寬鎮古河。義民等。又沒數擊當殺。當日鎮江蔡把總拿獲姦細三名。供云。前日差來馬端。陳堯道等。不見回來。未知他方人歸順與否。本月十五日。差柯汝棟。胡王等。帶領真夷及假獐前來。要殺不順軍民。前差我等打聽。以此來到云。所謂胡王。即鎮江中軍胡顯忠之等。持顯忠降書。首先附賊者也。柯汝棟。即前日曹命英書中。招募多人。想有外合之意云者。許多唐人。各各稱說。我等死生不足顧。

也。一番剃頭。便作獐子。他日官軍。不卜真假。謂之獐賊。而一樣勦滅。死當爲冤鬼。以卜不得不來投頃刻之命云。彼既千百爲群。自投我邊。何待許渡。開諭不行。驅逐非便。從事逐之。較其必死。不得不然。朝廷雖有勿許渡之教。而臣生見如此。未得奉行。朝夕待罪。令廟堂急講制彼不來之策。從速指揮。俾無他日來言之地。二十九日到義州報。小通事金崑等探情。寬酋叅將王紹勳到鎮江。召募鄉兵。梟示賊署等事。已爲馳啓。而當日申時。中江伏兵。譏譽將本府出身張大仁進告。騎馬唐人五六名。自鎮江城。中出來。以其馬尙越江。到宴廳。避亂唐人所在處。言說親持叅將義州了公帖。國王前咨文。天使前揭帖。前在王京。速通義州。調船過涉云。臣意謂。當此兩岸絕咨之時。何如人不時渡來。又不知叅將之誠僞。即親往西炮樓。遣譯學崔屹在鴨江。此邊等候。俄然其人到越邊西岸。臣使小通事乘馬向中流呼問。未知何衙門差官。持何樣文書來。答曰。寬酋王叅將移咨貴國。呈稟天使。行票本府。以此渡來云。臣更令傳言。在前越江。必驗官印。

文書。今行亦果持來否。可以先送。其人即出咨文票文及所持信票送來。臣取考平日往來印信。果爲的實。即招天使所送差官武應弟謂曰。寬酋叅將欲前送人役。往稟老爺。且移咨我國。請兵應援。此時可見者。面難測者心。但文書明白。拒而不受。亦恐後言。但彼專不想大人等方在此處。我且請來。姑避聽其如何。如有詐僞。出而詰之。彼欲瞞我。更無所售。差官諾之。即令許渡。請來就館大門。邀與相見。各人等肌膚衣服。並無完潔。顯有避亂貌樣。原數五人。二人鎮江通事喬世節及前日黃守德也。臣佯若不聞越邊事。却問王叅軍來那邊做甚事。其頭王一寧答。奴酋時在遼城。其獐都不滿二萬。損傷居半。瘡夷未起。此正舉義致討。一靖大亂之時云。說話要不出原恣主意。臣謂大人奉檄遠來。可見釋難急君之意。樊邦兵單力弱。雖不克自守。而君臣上下。志則效死。知所向矣。差官曰。一介儒生。至欲遏奴之暴。况貴國乎。臣曰。凡經畧府文書。雖皇上詔勅。例先開見。俺於大人賚來文書。皆已目擊。但未覩天使前稟帖耳。一寧曾不

留難。即令其下人取皮箱。開出七道文書。四件三角。劉天使。又四件三角。楊天使。又咨文一角。在越邊所送我國咨文。一意兩本。臣問何爲乃爾。一寧曰。事係緊急。恐或遺失。觀其所處。極爲周密。各項文書。並爲謄書先送。大槩王一寧于掄魁等五人。俱拙直不濫言語。亦循法度。一寧則貌雖陋而辯甚敏。且說吾老爺在海上。聞有賊將來我鎮江。欲及羽翼未成之前。敗其奸謀。沮其猖獗。冒死進城。以計誘致賊之中軍劉芳譽。問曰。汝見任遼東城守。城或見陷。亦當潛身匿跡。待罪待死之不暇。而何敢僞受賊官來邊鎮云。芳譽答。初在城中。爲賊所擒。進退不得。遂至于此。初非爲被左袒。叅將即令驅出曰。汝雖我親兄弟骨肉。尙難容貸。况踈遠之族乎。與其從者。並斬梟首云。應弟等頗以爲然。不復出問。一自寬酋奔潰之後。未聞有一兵將出頭於其間。紹勳設施方略。雖不知如何。而亦足音於空谷。但所聚鄉兵。率皆魚駭鳥散之餘。脫有不時緩急。必添我國之一憂。昌城以上所患在奴。臣則防奴應唐節節難處。日夜憂悶。恐負朝廷委遣之意。但

彼之所謂十萬。豈止於十萬。所謂過江者。豈望於過江乎。請兵非真。過江非實。不過慮我之或畏彼賊。破我之或與彼通。遙連聲聞。只播於彼而已。許多說話。不言義理。徒言利害。不信我國。因此可揣。至於張虛聲威賊奴。正如臣之前日啓意。雖知賣我。而亦無可妨。况聞廣寧都禦使爲畫計。指授以送云。早晚登萊水兵。因次繼至。來領鴨江。作爲聲勢。責互援之明旨。勵共殲之大義。此後事機。何以應之。一寧若誘以天使。托以軍機。必欲前進。則當此疑訝之秋。一向防塞。恐有後日來言之地。當與天使差官。密議順付來文。或只送一二令譯學停止。直啓分守遼寬酋叅將王紹勳。爲緊急邊情事。按照本年三月十三日同寬酋監軍道金使胡巡看邊界。於十四日午時據傳報。逆酋違犯瀋陽。即馳赴策應間。隨蒙經畧軍門表諭帖。今本職同義毛兵游擊許定國。各整兵擣巢等因。遵即帶領官兵。於十五日。從靉陽北古河出口。入虜境二百餘里。至董古不出山阿哈等寨。皆荒草空房。並無獐奴蹤跡。十八日。蒙經畧軍門令箭并標。調本職防守。

遼陽。遵即調兵入境。二十一日馳至柳河。相隔遼陽尙四十里。撞遇遼陽逃出軍民報。遼城於二十日申時。已被攻破。官兵逃散等情。又據前哨撥夜報稱。往前總洛口。獐奴已至堵截。勢重難突。遼陽已陷。底報不通等情。本職因策兵前至大石門嶺上。遙見奴勢方張。虐焰難遏。孤軍單弱。徒死無益。只得回守寬酋。思欲團練鄉兵。號召朝鮮舉義恢復。無奈奴衆布滿內地。中途堵絕。聲息不通。孰意軍民驚駭。逃躲四散。禁令不止。倏遺空城。又據監司道下撥夜把摠李玉稟稱。本道胡同水兵都司同義毛兵游擊許定國。從鎮江沿海去訖。又據撥夜許仲同稟稱。鎮江游擊祝世昌并官兵從沿海去訖。本職親往空壘。徒有一腔熱血。付之無可奈何。四月初一日已經稟報。初三日親上險山鳳凰一帶。宣諭團練鄉屯人衆。至西江沿海一帶。收拾人心。一面糾合南衛。轉路傳報河西。一面移檄朝鮮。會兵策應。無論克濟與否。惟竭盡心力。以俟天而已。昨至鎮江團練坐守。專候二位老恩臺至。以懇方略。萬乞垂念疆圉。務求面慰。孤臣曷勝臆切。爲

是具稟。天啓元年四月二十八日稟。翰林院修撰劉。

五月初一日。兩天使發京向西路。因全遼陷塞。該曹預備舟船數十艘。兼整各船格軍及護送官。義州密報。當日早朝。崔屹密語喬豹曰。王叅將雖請兵於我國。兵力單弱。以此爲慮。世豹曰。固知貴國兵少難於助我。但天朝全體也。朝鮮四肢也。有全體無四肢。則不成人。有四肢無全體。則無所傳。况當危急之秋。何得不控于貴國。不徒此也。叅將欲托妻子於貴國島中。數日內當有此請。貴國素稱禮義有同一家。天朝諸將皆欲固結歡心。與同存亡。此時貴國雖示厭色。亦不得離却。天朝。天朝牽挽不已。叅戎之計。蓋出於此云。差官等見。天使下人。送言于臣曰。俺等亦賚天使前文書。欲并作行。願給夫馬。臣答夫馬固難調送。天使差人厭其衆多。何不察此等氣色。一寧等因此少停。然其要請前去。一刻爲急。或欲經走。或欲還去云。臣畧設茶酒。仍邀各人說稱。凡文書到此。驗其緊歇。馳啓主上。歇則留待回下。緊則或可發送。但馳啓未到。王京。差官先入國。

中則守土之臣似不舉職。姑待馳啓約到王京。便即上去。彼此俱得。差官答。掩於先年隨陳監軍出來。貴國事亦嘗窺其一分。以其時較今日。一何事體之大異也。今日患在。天朝若天朝不支。次及本國。况大人啓奏上去。已兩日。即速打發。亦不爲早。且兩使前多有面稟事。非文書所可盡。望大人視兩國如一家。不拘常例。勿爲留挽。且言奴賊不禁。遼人走出。見在兵民驅出北城。自居南城。城外四面列營待變。城中玉帛搬運本巢。此等景象。豈能耐久。願戀巢穴。情形已著。誠及此時。得兵數萬。虛張恐嚇。以奪勇之士。遂思歸之虜。不費區畫。可收卞莊之功。願大人即日啓奏國王。速調馬步。追住鎮江。令我鄉兵爲先鋒。遙逼遼東。潛通廣寧。遠近相應。以示挾攻之形。則不煩多兵。坐見奴騎之宵遁。况遼東各處。所在豪傑。羣聚思復。但無主將。易驚聚。必須速結貴國。恃而無懼云。臣答。叅將冒死進城。斬殺賊署。寬鎮奔竄之人。舉有再生之氣。於此可見人心之未亡。而法令之猶存。奚待我國而成事。况小邦一經壬辰。再覆深河。丁壯盡沒。小弱未長。

縱欲悉賦從政。志大力屈。自守猶不克。卒然過江。恐或未易。然其勤王大節。不以殘弱而自挫。一段盡赤。可質神明。差官唯唯。又問。前日因鎮江避亂人聞。天朝欲以水兵來鎮鴨江。未知是否。差官答。水兵萬餘。尙在旅順口上。不遠胡道。尊領率來住黃骨島。應用云。又密謂臣曰。俺之此行。不但請見。天使請毋還國。姑留平壤等處。以擊遼民之望。以疑奴賊之心。一邊上本皇上。亟發大軍。移揭貴國。催調兵馬。聲勢相連。唇齒相依。以成不世之功。以答。天子之遇。范文正做秀才時。以天下國家爲己任。翰林學士是何官。而不思所以恢復遼東乎。古之大夫出疆。苟利於國。則亦多便宜行事者。叅將之期。天使蓋止此耳云云。說話有大意見。節節當理。不可以口舌沮抑。不得已前送計料。大槩叅將近住我邊。因急請兵。朝廷雖難準副。而遙爲聲勢一欸。則亦無可拒之辭。彼之前往。不在得兵。要在得名。未知朝廷何以應之。此番辭令。係國安危。如示退托遲難之色。則日後雖生獻奴酋。必不見功。只益疑阻。尤爲可慮。若叅將畢竟送其妻子。則何

以應接。敢爲並稟。直啓○初九日。差官到京日迫。有故人使之在家獻議事。傳教○咸鏡監司啓。洪原呈雨雹大作。大如雞卵。飛鳥皆死。人有震死者。朝報 各道調送七運軍。本道十九日礪山犒軍。○初十日辰時。日暈兩珥。自巳時並風大作。飛沙揚塵。朝報 幼學崔益等上疏。請治李爾瞻奸兇誤國之罪。又陳臺諫只舉枝葉之三兇。不論爾瞻。呈政院。三司合啓。李爾瞻專擅之狀。合啓韓纘男李偉卿朴鼎吉等奸兇之罪。批曰。爾瞻非爾瞻之鷹犬乎。奴顏婢膝。舐痔吮癰。亦嘗爲之。今日倒戈請罪。未知何如。中北人 廣寧都御史王咨。西兵共有百萬有餘。西撻在都爺前說。東撻得了爾地方。斷絕我衣食。我當助兵收取遼東。今聞西撻已克瀋陽。今住城裡。協同我兵。將圍遼陽。二十日酋將令箭調鎮江賊。從一路兵馬。不敢喫飯走遼陽云。朝報 進香使李必榮。陳慰使朴彛叙。由水路出來。必榮來泊彌串。彛叙飄風不知去處。姜弘立出來中江。以待朝廷處置。義州 報傳曰。賊向廣寧。兵勢滔天。中原大亂。國事危急。王叅將差官又將上來。

此誠何時。而大臣重臣。相繼引入乎。備局累日不坐。尤爲寒心。奴賊自稱皇帝。我國朝貢事胡書又來。王參將軍馬二百餘名。進捕撻賊歸寬酋事。及于承恩妻子避亂渡入。從達島與唐人多造馬尙船。連日流下。平安 兵使 賊兵到寬酋。唐人越來者莫能禁絕。贊畫 方山萬戶朴春陽報。越邊孫濫梁華人義兵。截殺永酋假撻。同賊退走。義州 十九日。體察使李慶全江華等地出去。看行宮形止。傳曰。先遣從事官可也。李永芳聞知。河東一帶。義兵多殺零賊。發送多兵。搜討賊兵。五百餘騎到越邊。以百餘騎渡江。至玉江搜索。萬戶邊溢遁走。抽出唐人百餘名。盡殺之。二十一日。贊畫使書。玉江渡來之賊。殺戮唐人百餘名。自水口越江。江邊屯結云。當日義州聞變。與巡邊使李箕賓防禦使柳斐同議。發軍五百餘名。差別將元僅。馳赴賊屯處。據山結陣。先遣通事開諭曰。隣好年久。疆場有限。若有追捕人。則當通於守邊官。從容處之可也。而起軍越境。殊非相好之意。欲以干戈從事。而寧人負我。我不負人。故先容譯舌云。則賊還聚一處。渡江而陣。翌

日投書曰。大金國駙馬王李_永諭朝鮮守邊官知道。我大金皇帝收取遼東。諒爾國知之。東邊一帶。前差官安撫。因古何愚民趙希文等。率衆不服。殺我差官二員。故親來招撫。原無殺害之意。我與爾國。原無仇恨。累有通往。昨我親在涇。着通事喚爾不應。與爾諭帖不看。故此過江。勦殺漢人。並不傷爾麗人。以後再有漢人過江。即時送回。方見有唇齒之意。不然致起釁端。爾有故何。玉江萬戶邊溢。變生意外。棄鎮遁避之。故囚禁于義州。查其始末。則本以孤城。且無添軍。雖不能抵敵。所當預爲瞭望。勢若危急。則一邊馳報事。而印信兵符。盡爲闕失。無一番報變於各衙門之罪。贊畫使啓請。以賜送尙方劔。從事梟示警衆。傳教姑爲容貸云。政院啓曰。臣等伏見傳旨。聖上好生之德至矣。但賊兵渡江。殺掠人畜。而以守堡之官。不能臨機善處。棄城遁匿。竟至爲賊所乘。被奪印信。其在軍律。擢髮當誅。今以教意下諭時。發前日尙方劔之請。竟歸虛地。當此與賊對壘之日。悍將擗卒。不思。聖上之仁。徒懷苟活之計。則日後之患。有難勝言云。李時

發違命。斬之。三司請治四凶。不允。儒生丁彥琢疏。伏以。臣等幸而遇

聖明之世。居首善之地。常抱忠君之悃。每勵疾惡之志。優游涵養於我

殿下樂育之化。其亦不幸而見此似忠之大奸。得近於殿下之朝。

殿下之國。危若綴旒。臣等不忍不言而負殿下。初陳論罪之疏。祇承已

悉之教。再上亟誅之章。又下將欲何爲之。批。臣等之惑滋甚焉。爾瞻

每以討逆爲自任云。而至於景禧逆筠之獄。或不舉正刑。或不問經殺。終

始容護。欲免辭連。則爲國討逆者。果如是乎。嗚呼。夷險一節。終始不變。乃

臣子同休戚之義。而爾瞻本以兇狡奸邪。一生事君。惟以欺罔爲事。逮其

奸狀之露。反生掠美之計。敢上斥和之計筭。陰結楊使之歡心。跡其兇謀。

都是負國。與國同休戚之義。果如是乎。臣等沐浴之請。爲宗社也。爲生

民也。平生所願學孔子。而誅少正卯之義。心竊慕焉。嗚呼。言公論。則先正

邦刑。區區血誠。止此而已。批。予意已諭。勿爲煩擾。義州人張懿範等。

告府尹鄭遵逆狀。反鞫。

六月。水路偵探官黃珀離彌串五六日。乘順風而來到光鹿島。馳啓送伺候船。水路雖險。無事前進。島各有人居。給銀十兩。賃向導人。將往登州。天使廿日發船。已離了我國地方。一行舟子二十二艘。過遼界旅順口。夜遇風波。破船十一隻。所載卜物。盡爲滄失云。合啓。臣等伏承 聖批以不允爲教。臣等不勝悶鬱焉。爾瞻巨奸也。平生行事。以飾非欺世爲能。厭然掩惡。假托士論。似忠之奸。亂正之佞。雖唐之林甫。宋之師道。亦不能過也。姑舉其專權植黨。欺君誤國之罪論之。徇私蔑公。好人佞己。直節之士。語或侵犯。則威以嚴刑。阿附之徒。顯然面諛。則福以好爵。及其權勢之極。欲助氣滔之熾。數三子弟。目不知書。而聯竊科第。歷敷清班。猶恐私黨之不繁。巧開科第之邪徑。預出書題。倩人轉述。行私講經。字標相應。七大文通。從自願之句。播於人口。墾鴨島之郊。割據膏腴。楮 陵寢之木。傑構第宅。其他害物之責。亂政之罪。不一而足。前乎爾瞻。未有甚於此者。後乎爾瞻。未有甚於此者。且渠平生自以討逆爲己任云。而科罪輕重。一任詐僞。在

他人則羅織之。在其黨則容護之。景禧之獄。罪關 宗社。而私語於前。曲庇於後。其心所在。斷可知矣。至於逆筠。千古所未有之賊也。萬惡俱備。爲世所棄。未知爾瞻有何可取。而卵育其家。若是其密耶。兇檄構草之言。既發於筠壻之口。南門掛榜之說。又出於河賊之招。凡逆招之雜出者。所當窮問於筠。而不一杖。力主經刑。使通天地。亘萬古窮兇極惡之大逆。終至於緘口就戮。孰使之然哉。此不過恐其辭連於自己也。元凶雖骨。餘孽尙在。元愾亦一筠也。以不問於筠。而當問於愾。而佯爲再論。旋即停啓。玉堂公論。羣起衆攻。其於 榻前。厲聲狙擊。備局諸臣等。前後一手段也。聖明在上。奸狀畢露。天誅鬼戮。自知難遁。詐上斥和之筭。陰售販君之計。其爲設心。極巧且慘。則飛語 天朝。嫁禍我國。特其餘事耳。以 聖上事大之誠。既已被誣於前。又此見賣於今。主辱不死。臣等所耻也。爾瞻使其腹心譯官。私用七百之銀。潛結楊使之心。能令楊使喜。令楊使怒。而爾瞻則喜。 殿下則怒。是非楊使怒 殿下也。爾瞻使之也。爾瞻之罪。至此已極。

討奸之舉。不可不急。遲一日則受一日之禍。惡惡不能去。郭公之所以亡也。豈可使巨奸偃息於私室。行其奸計。無所不至哉。請亟命絕島圍籬安置。合啓。臣等將李偉卿窮兇極惡之狀論列。已踰累月。而聖批一向牢拒。危機益張。中外遑遑。莫保朝夕。國家危急之禍。不待識者而知之。則殿下以此賊爲何如賊也。爲人凶險。百惡俱備。特一天地間。乖氣所鍾也。居家悖倫之行。在國貪暴之狀。言之污口。頃年賊筠謀逆之日。結爲腹心。兇謀秘計。無不與知。至於事發之後。密通其家。文書雜物。預先藏匿。及其中使搜探之際。一無所得。實由於此賊之先泄也。首尾作孽。與筠無異。爲其徒黨曲庇。至今網漏。得保首領。反肆兇焰。少無忌憚。交構士林。傾軋搢紳。使人人不得自安。甚至士夫之家。縱奴作亂。攘奪牛隻。毆打婦人。誣飾陳疏。謂天可欺。禁苑林木。日取爲薪。守直軍士。至被侵責。醮子婚需。懲辦市民。堂湖供億。輸入其家。諂媚權奸。謂他人父。是可忍也。孰不可忍也。一自失意之後。怏怏怨上。無所不至。捐金發財。鳩類集黨。陰結不逞之徒。

昏夜聚會。情跡綢繆。其心所在。有不可測。國言藉藉。莫不危懼。罪惡貫盈。公議益激。而被論之後。小無歛惡之心。白晝街上。偃然橫行。陰圖兇逆。禍將不測。豈可使一日假息於都下。以貽國家之禍。請亟命絕島圍籬安置。臣等將朴鼎吉罪惡論列累月。而聖批牢拒。俞音尙闕。身帶職名。位長玉堂。玉堂是何等地也。儒臣之所在。公論所出。豈可使奸邪一毒物齒跡於儒臣之列。公論之地乎。鼎吉平生用心行事。惟以欺君罔上。反覆陷人爲能事。其所厭避於御史之行。落字於問事之時。挾私圖還於奉命上國之日。莫非無君父蔑朝廷之意也。曾爲悌男家婢夫。欲美史局。叅宴南園。人莫不唾罵。至於家行之穢言奪嫡之悖說。特其餘事耳。初無賊筠結爲腹心。兇謀秘計。無不與知。而奇俊格密疏之時。方在政院。即謄一本。飛報於筠。其所着烏犀金帶。乃賊筠之傳衣鉢也。至今在腰。撫物思人。其心所在。尤不可測。幸而網漏。得保性命。猶不自悛。反恣橫肆。貪權利勢。侮弄朝政。罷榜臺啓。指揮低仰。議號文書。擅自搜出。回邪之跡。昭不可掩。其在今

日也。一面二心。乍出乍沒。鼓其簧舌。交亂彼此。使巨室重臣。互相睚眦。爭端紛紜。朝著不靖。及其奸狀敗露之後。自知難容於公議。日聚私黨。謀害異己。陰喉閔藻之手。構避嫌之草。網打之計。不一而足。跳梁病國。日以益甚。欺罔濁亂之罪。至此而極。則豈可使此奸一日偃息於都下乎。請亟命遠竄。臣等將韓纘男罪惡。論列已盡。聖批牢拒。尙闕俞音。臣等不勝悶鬱焉。纘男一猜險兇暴之人也。逆賊李洪老爲公洪方伯時。以布衣苟且得見。抱琴隨行。行到列邑。作弊多端。及在京家。家近悌男。出入無時。有同子弟。甘作金珪之學長。悌男逆獄之方起也。逐日潛通。爲其家密客。多受厚贈之物。其時知之者。莫不憤惋。其他恃勢貪饕。使氣威脅。掠人財貨。奪人臧獲等事。難以枚舉。而中外之人。不曰纘男。而必曰韓賊。且爲刑房承旨時。欲掩賊筠投書慶運之跡。嗾其姪女夫孫活。誣告安慎言之狀。昭著耳目。逆筠之獄。渠名重出於廷弼之口。而不思席藁暫避。還出。因叅鞫廳。廷弼即承服逆賊也。一舉其名。恐其復出。一夜之間。遽致殞命。衆論皆曰。

纘男滅口也。國言藉藉。爲日已久。而至於數年不發者。畏其勢氣之熾盛。人莫敢開口。請亟命拿鞫。玉堂筭字。凶凶請從公論事入啓。答。已

諭勿煩。幼學蔡得仁。朴重振等連疏大槩。司諫柳瀟承旨。柳浹持平。柳

活等難容之罪。獻納成夏。衍正言奇秀發等陷賢之狀。至是幼學朴嶸皆

北群上疏大槩。瀟浹活一家穢行。兄弟相奸。叔姪相私等事。重振之疏。已

盡言之。不必再掛齒牙。諫院之處置瀟活。敢以縱酒食肉。爲居喪盡禮。以瀆亂倫紀。爲居家行檢。人無間言。或以目爲三忠。過門必唾。或爲之一鄉有譽。若非心瀟活之心。行瀟活之行者。黨惡欺君。至此極乎。李爾瞻之忠。孝清白。文章勳業。爲一世所推重。而即殿下社稷臣也。今瀟活等受喉倒戈。必殺乃己。一介忠直。爲國任怨。幸免於汝淳。幸免於永慶。幸免於悌男。幸免於逆筠。而今將不免於瀟活之兇謀。豈不痛哉。今爲此論者。孰主張是。七十老叟。猶懷傷害之心。不售奇計。退縮江湖。則虎威是假。驢技已盡。至使馬賊皂隸。代投兇疏。瀟等之自稱公議者。果如是耶。伏願 聖明。

洞察凶逆。亟示雷霆。先治瀟活兩賊。作孽蕭牆。嫁禍宮闈。大逆不道之罪。以正王刑。以快輿憤。事呈政院。承旨柳灣啓曰。臣頃被重振構誣。伏藁私室。昧死陳疏。自上以勿辭爲批。牌招累至。臣誠惶恐。及臺諫處置。臣兄弟之後。始趨恩命。供職近密。生死肉骨。感淚先零。茲者朴嶙等投疏。踵武重振。專攻臣兄弟。次及臣身。合司舉國之公議。非兄弟所獨論也。臣兄弟叅論兩司。亦非在政院如臣者所可知。捏造無形之言。指以爲罪目。同驅於不測之地。臣兄弟一再之避。略陳梗槩。臣不須多卞也。至於重振再疏。所謂大瀆及喚承。喉臣等而方在待罪之中。未知厥疏何意。瀆喚何人。昨見李挺元上疏。許喚乃沔川皂隸。果如其言。則臣曾以兵曹叅議。入直內曹。於去月初十日。以皂隸闕番捉致兵曹時。喚自言以士族冒定賤役。臣曰。汝雖冒定賤役。猶未免役。前後價不可不給也。因決杖三十度而囚之。喚之受杖於臣。若是其重。則其初之不相知。可想。重振旣爲其私喉。後聞其受杖。求其說而不得。反謂之奴婢相訟。納奴聽喉。所謂訟者非私

處也。必於公也。在外則其官。在內則某司。必直於此。相訟有其處。受杖有其證。則指喉之說。不亦虛妄乎。目見此疏。所當即爲退去席藁待罪。而方在直所。位亦不齊。不敢擅離直所。惶恐待罪。答曰。勿待罪。柳等中北 義州

人殷軾等上疏大槩。請梟張懿範等三兇。以安邊帥之心。以快邊民之望。秋七月。尹認爲大司憲。啓斥中北柳渼等。申救大北諸奸。新舊出身六十以下。令並赴西邊。本道監兵使。二十五日。益山犒軍。前後資木十五疋。每以八結收給。

胡差又來。請兵精糧。又索黃花紙一千卷。安東進士金是樞等二百餘人上疏。請罪李爾瞻誤國之奸。遼東都司毛文龍得脫於城陷之日。渡來義州。收拾遼民。得兵數千。襲擊鎮江九連城之賊。奴賊憤怨。恐喝本國。大索文龍。

八月。體察使李慶全承命南下。到羅州。檢察行宮形止及南方軍務。設科後向嶺南。滿浦僉使鄭忠信承命往還胡中。受銀除官。橫役侵懲。至是倍甚。宮闕之木。一依價布。三結木。四結木。五結木。名目亦多。人不聊生。

怨呼日深。加以分定宮奴。或稱東宮農所。或稱中殿侍衛農所。三昌大北權勢家屯庄。布列八道。奪占田民。間有舉邑無私之地。

冬十月。安陰進士劉敬甲居昌進士呂後望等百餘人上疏。請治許喚李昌庭金是樞等陷賢之罪。因頌李爾瞻功德。○龍川府使啓目。二十四日夜。毛將管下謂有西來捷音。歡聲四起。臣招哨探人高繼功。詳問消息。則曰。曾入遼城熊老爺設策。令西獍誘致奴將。會于白土場。歃血約誓之際。熊爺縱兵擊之。酋之二子死焉。就擒幾至數萬。溺死三义者亦多。永芳領直獍三千。行到通遠奴營。以遼城孤弱。急令調回寬輿等獍子等。一一咸集。遼東鎮江但有收馬假獍數千而已云。批曰。從當善處。○韓浚謙爲都元帥。

十二月。徵下三道勤王兵。本道三千餘名。十五日。監兵使在全州點發。三道軍皆屯水原。明年二月罷陣。二十七日。韓浚謙發京西下。

大東野乘卷之三十終

大東野乘卷之三十一

亂中雜錄六

趙慶男撰

壬戌大明熹宗天啓二年

春正月。中殿柳氏諺書上疏。翻譯邊方之憂。奴賊與天朝如彼。且與我國爲好者。誠非愛我國之情也。我國與天朝協力征討。則渠之對敵之力分矣。以此於我國無限致誘。而我國亦不欲見憎於彼賊。切不出助天朝。避亂唐人亦不許接。後日見天朝人羞愧矣。今聞毛游擊水兵出來。恢復鎮江。因請兵于我國。我國亦不快諾云。天將等以殘兵出來。忘生討賊者。必特我國協力助戰。敢舉大事。而我國少不顧見。倘賊追逐盡殺。則我國誤天下事矣。豈不痛惜。上意不欲得罪於天朝。亦不欲激怒於彼賊。欲爲兩全。天下事。必須專事於一處。決無兩利之理。不得已彼賊憎怒爲限。君臣上下。期以一死。與天朝合力戰守。雖未蕩滅凶奴。我

不失天下大義。不其可乎。今不欲見憎於彼賊。切不顧見天朝。自以爲幸。終致兩失。不免莫大之患矣。政府大臣備局堂上。不爲極思利害。啓回上意。從其自。上所爲。日復日日。如彼而已。軍中事機。一刻爲急。誠可憫望矣。竊見春秋史記。隣國有患。莫不相救。況於父母之國。至於如彼。追思壬辰。天朝救我之事。則感淚自出矣。歷觀古事。與金講和。怠惰將士之心。而宋終敗亡。常以爲恨。我國循蹈其轍。未知竟作何爲也。古將岳飛以五百殘兵。大敗兀朮。謝玄以八千兵。大破苻堅百萬之師。虞允文大破金主亮。我國雖力疲勢弱。精兵一萬。可以辦出。而朝廷無憂國之臣。邊鎮乏干城之將。自上又無奮義討賊之意。誰能爲國死於戰場乎。且我國兵馬。雖與天朝協力致討。將士竟效金景瑞姜弘立等偷生。必不發一矢而射賊矣。此非如我婦女所當與知。不過無用一張休紙。而情極沓沓。敢此書啓。邊方將帥。以不能討賊。如我憤惋。則必爲疽發背而死。尤增痛哭。水路往來甚危。方物雖未載持。但陪表文而去。聖節使皆可往矣。而

經年不送。痛悶罔極。二百年至誠事大之事。盡爲歸誤。婦女計慮。罔極悲慘。使臣譯官等厭憚。何暇計乎。親覽休紙。回下爲只爲。○南靈草。盛用於世。一名談博怪。四五年前厥種來日。本南方人取以植之。致富者多。

二月初三日。白赤氣橫天四面。移時相搏。以韓明璉爲平安道巡邊使兼龜城府使。天將趙都司來在京城有詩。海按山牢箕子城。衛佗南越樂

昇平。文源都似漢詞賦。武略克詰周戎兵。舞袖通宵搖月色。歌筵選日鬪

春風。祝君寶曆綿千祀。不思懷安永令名。又有清香旨酒千人血。細切珍

羞萬姓膏。燭淚落時人淚落。歌聲高處怨聲高等句。蓋指光海。政亂民困。○二十日。

東南有聲如巨雷。○二十九日。都元帥狀啓。奴兵又向廣寧。

三月胡書又來。大金國汗書與朝鮮國王知道。南朝與朝鮮。父子之邦。國

大兵衆。因此起兵六年。朕何所不知。朕視南朝爲父。朝鮮爲子。相依不離。

朕征爾父南朝。豈不留兵看守地方。而遂輕舉妄動。爾爲何差人探聽消

息。爾來偵探。吾就省倍嚴慎。爾不來暗窺。吾詎肯輕慢怠忽。有我鎮江人

民。爾收太多。爾既稱南朝爲父母。遼東城中兩井之內。血水溜出。北京城

中。河水滾流二次。爾爲何不禱告地土。以止血水。各衙門大樹殿脊獸

大風刮到。爾爲何不祈求天地。以止狂風。朕但凡行事。無不上順天意。爾

朝鮮自恃强大。不視天意。逆天行事。與南朝父母護助何益。致多事耳。

夏四月。天朝遣梁祐監軍于本國。回賜銀二萬兩。以補軍需。佑到京。光海

率百官迎詔。親告于廟社。令八道收民結布以待佑。

秋七月。雷震壽星宮門。即改構。○以金完爲平安道防禦使。

九月。潛送文希賢于奴中。奴酋不受贈餽。不報國書。恐喝多端。希賢見弘

立等而還。○毛文龍入龍川。椒島。設營留鎮。遼民來投者日衆。○命禮曹

祭名山大川。祝冬暖無冰。晦日江水合冰。狀啓入來。○熒惑入南斗。累朔。

○木花大災。

冬十一月。進賀陪臣吳允謙回自京師。帝降勅獎諭。欽賜玉帶金印。

發下三道侍衛軍各數千。湖西水原湖南公州留鎮。又整餘軍。境上待

變。

十二月江原監司白大珩遞歸。與李爾瞻韓纘男等相議曰。西宮若在我輩終無葬地。造訶偉卿曰。噬臍不及。莫如先事。晦夜大珩與偉卿托稱儼戲。多率賊黨。金鼓譟呼。亂入慶運宮。期害慈殿。是夜初昏。慈殿夢宣祖黯然來告曰。賊黨今入。不避則死。慈殿覺而涕泣。宮人問其由。具以告之。宮人曰。聖靈先諭。膺有所以。小婢潛臥御寢以待。慈殿從之。暫避後苑。而賊已入宮。搜而害之。君臣上下。不知慈殿之脫矣。慈殿與他宮人。潛瘞死節宮人于後苑。反正後出而禮葬。時領相朴承宗聞事宮呼唱追逐以此大珩不得窮探慈殿不死實是承宗之功。光海亦以為慈殿真死。反正日先聞。大妃在否。

癸亥天啓三年

春正月。定五道宣諭使。募收米布。投帖民間。人不得自由。有旨教五道臣民。王若曰。嗟爾五道士民。聽予十行宣諭。出粟米事其上。乃古今之通規。先國家後其私。則忠義之大節。食為天莫重。用兵最急於糗糧。生於地而

無窮。守錢孰愈於榮寵。粵自寡躬之臨御。荐遭時事之多艱。因宮禁之不寧。未免土木之經始。屬西北之告警。遂致兵革之方殷。征戍三陲。力已竭於齎送。委輸千里。財亦殫於拮据。懼常存於失宜。事豈出於不得已。矧知天朝諸將。將由水路而來。所領軍卒。必不下數十萬矣。在此策應。未可以一二計焉。越重溟而行師。誰使饗道而相繼。臨我境而望哺。無復軍食之可供。括民餘儲。恐虛實之紛雜。逐畝加賦。慮貧窮之散亡。惟思救急之方。莫若募粟之策。委遣高官重使。俾告賢士大夫。辛勤力田。寧乏蓋藏之穀。夤緣祖業。亦有富樂之鄉。乃積乃倉。宜念紅腐之無益。有財有用。坐待白首而何為。盍追先王休養之至仁。且報上國拯濟之大德。或奮義而捐橐。或竭忠而傾困。勉以納官備糧。期於滅賊振旅。隨才受職。予不惜於厚酬。發軔登朝。汝何憚於兼濟。雖守令重任。不拘履歷之淺深。而金紫之崇班。亦係應募之多寡。昔在漢武之世。乃見卜式之賢。輸財助邊。爵終至於御史。為國破產。名遂顯於當時。莫令斯人專美往代。於戲。足兵足食。必先

取信於民心。于橐于囊。爰方啓行於天討。爾不占怙。予不食言。故茲教示云。○正言韓惟朔等啓曰。李貴金自點等。久蓄扶護西宮之謀。禍將不遠。敢請預圖。光海方與金相宮遊燕後苑。金執光海手大噉曰。外議良可哈。誠之金生寧有此意。回下曰。徐當發落。惟朔等又啓曰。忠言逆耳。大詐似信。他日設有追悔。莫謂臣等不言也。光海問相宮。金呵止之。光海批曰。莫以無形之言語枉害忠良。先時李貴女適金自兼早寡失操浪跡於佛堂從事於阿彌事現被囚臨訊願入宮光海許之及入宮中北常欲相宮約為母女日常言其父及夫兄自點之忠至誠不幸見憎於大光海見惟朔之啓每欲拿鞫金曰誠之貫日之忠况金生員一介寒儒有何權力得為異謀光海笑而頷之絕無疑慮

二月十九日夕。日有薄暈。○二十八日夜二更。蒼赤氣起自坤方向天中相搏。四更東南亦然。

三月十一日午。乾方天地俱動。○十二日。昭聖真懿王大妣復位。今上即位。先是十餘年間。朝廷紊亂。國事混淆。人民失所。上下離心。大妣幽閉西宮。九死十生。大北羣兇。朝暮圖害。熬城在京時。得見西人同知金瑬

密言曰。時事罔極。母亦難保。顧念儕輩中可安。宗社者。惟有君爾。因掩泣嗚咽。瑬知其意而還。熬城痛恨。卒於配所。瑬與文官洪瑞鳳朴東善幼學沈器遠。密謀舉義。交結武將申景禎李興立等。重老等。募聚軍人。瑞鳳作一詩送于申欽云。前日風波畏。風波亦已多。吾人睡足處。夢唱定風波。欽見之。知瑞鳳有安社稷之計。而不敢應。前府使李貴與文臣崔鳴吉幼學沈鳴世宋英望等。亦出萬死計。密結幼學金自點武將李适李曙等。招募壯勇。未久金李相應為一定。為推戴今上之計。以金瑬為大將。措備器械。廣收忠義。來往謀議。事頗彰露。三司累次告變。群奸每請拿鞫。賴尙宮內力得免。允下。時李興立為都監大將。其女適領相朴承宗子。為姻家。承宗聞興立亦與是謀。三司上變。而光海不允。不得已拿致興立于家。方欲誅之。適承宗子自興自外而入。興立趨抱自興之腰。而訴冤曰。首台以余謀逆。拿致欲殺。此必真為逆者。欲除大將。反指余為逆也。自興入告曰。興立逆謀。時未見發。一家之間。經殺非宜。承宗釋之。李貴以李曙圖

于尙宮。爲長湍府使。謀已泄漏。事危急。乃進定師期。是昏奉今。上約會于弘濟院舉事。幼學李斗陽亦知其事。率軍三十餘名。馳赴約所。寂無人形。方憂狼狽。忽見一點火光。明滅於西北山下。趨而候之。李貴以下皆會。獨大將不來。二更初。李曙率長湍軍三百餘名而至。李适曰。事已急矣。不可等待。遂坐超床。分隊整束。而瑩且至矣。即引軍由彰義門而入。是夕約中人李以般恐事不成。告變于政院曰。金瑩李貴謀逆。今方聚軍于弘濟院。即夜犯闕。都監大將李興立爲內應云。政院入啓。即牌招朴承宗李爾瞻。拿鞠興立。義軍已過彰義洞。喊聲震天。承宗爾瞻驚懼奔散。義軍至昌德宮金虎門。守將朴孝立開門迎入。燹火木積延及宮舍。舉義之人告火不起皆走投江云故放火報之光海驚遁。衛士駭散。上坐定于敦化門內。分軍守西宮。令入直臣僚下庭拜賀。兵曹判書權縉以下皆顛倒四拜。伏地聽命。惟承旨李德洄弘文校理尹知敬植立不拜。左右問汝何不拜。德洄曰。身爲人臣。何可不知而遽拜乎。左右曰。綾陽君奉大妣。舉義反正爾。知敬曰。

然則何以焚燒宮舍。曰。軍卒失火而致之。非故放也。二人泫然曰。若是則前王何以處之。曰。厥罪雖重。待以不死。德洄知敬遂行四拜禮。威儀甫定。播告城中。不使驚懼。散遣軍校。逮捕兇黨李爾瞻三父子韓纘男三父子李偉卿白大珩鄭造尹訥朴廷吉李挺元金尙宮等。拿致軍門。陵遲處斬。籍沒家產。依律緣坐。是昏爾瞻自闕還家。率其眷屬及三子等家累踰城出走。到漢江松亭。換看木手草笠耳掩。舉族渡江。至利北峴。日曙各散竄。伏軍校追捕拿來。時自興爲京圻監司。是夕承宗還家。與自興走楊州。令牧使朴安禮起兵赴難。傳令水原防禦使趙有道興兵合勢。○十三日。上拜慈殿于西宮納寶璽。初光海踰墻。適入于喪家。主人看其喪服。喪巾而匿之。來告軍門。即令軍人挈來置軍中。至是慈殿教曰。見逆瑋方知汝等事。即以布巾服白耳掩。入伏于庭。慈殿受璽置坐側。久不黑白。至夕傳授。上即位。○因監司分付朴安禮起軍。進豆險川。趙有道亦領軍。將發軍門。令申景裕馳諭安禮有道。破兵歸順。承宗自興趨墳山。同繩

縊死。承宗臨死書衣曰。不能正君。以致今日。沉淵自死。以謝天地神祇。承宗雖貪濫功實多衛母功○發遣禁府都事宣傳官。拿去鄭仁弘統制使元守慎忠清兵使韓希吉順天府使李元燁等。依律處斬。平安監司朴燁義州府尹鄭遵。各於所在誅之。置正刑者。幾至六七十。查罪輕重。並皆投竄。時朴燁爲平安監司。貪濫暴虐。縱恣無忌。新構翼廊七十餘間。連作長房。合聚道內名唱百餘名。日常同處。晝夜娛樂。長爲風馬之戲。少不如意。鞭笞狼藉。結米收捧。倍數責督。少有違慢。刑殺慘酷。一日需用。六七十石。苛政日甚。人不聊生。流亡相繼。閭境空虛。至是宣傳都事奉密旨。馳到元帥府。時都元帥韓俊謙在中和。以密旨付帥府。使之依旨爲之。馳向義州。帥府猶未詳京中正報。走送人備探實狀。且令別將數人。率軍五百餘名。送平壤。與本城留防別將等相議。令軍中曰。賊兵見形。邊驚甚急。軍卒今當發向義州。即刻皆聚。普通門聽甘結。軍中恟懼。一時齊會。令分左右行軍圍大衙。燁方坐長房。鼓樂酣宴。閤禁至嚴。人不得入。軍卒踰牆擊逐守卒。打破

門鐵。衙奴告變于長房曰。牆外大軍圍匝。餘皆開門而入。燁大怒曰。惟我在。變亂何生。汝其妄矣。乃令退黜。別將等率親兵持弓矢。入立階上。使出身等執下。燁專不動心。坐而不起。出視元帥府傳令。然後緩緩下庭。執出軍官廳。着枷拘留。使妻妾相見。然後又出置城內私家入房。燁曰。我別無大段罪責。未知此何事也。已而穿壁入罟。促令繫頸。衆軍引索。猶不易死。刀手直入房牽足。命乃盡。即出四街行刑。娼妓等出來。旁觀人曰。汝等皆以監司寵姬。臨死不哭。恬然立視。何爲。妓等答曰。使道前聽令來矣。相與歡笑而去。持刀劒者。四面雲集。爭入割肉。別將等不能禁。令本官急急入棺。殮置于衙門外私家。留兵守直。期明日發送。道內仇人。聞聲聚集。數不可量。剖棺出屍。寸寸斬截。頃刻一無點肉。骸骨將盡。庶尹判官極力開諭。少不聽之。僅收殘骨五六節。入櫃藏匿。新監司金蓋國到任。以方伯之令。妻妾持骨櫃無事渡江。及至黃州。州民曾爲燁所暴。奪其櫃投之江。妻妾僅以身步歸京城。宣傳官都事到義州。斬鄭遵。昭聖貞懿王大妃若曰。

天生蒸民。樹之后辟。蓋欲叙彝倫立經紀。上奉宗廟。下安黎庶也。宣廟大王不幸無嫡嗣。因一時之權。越長少之序。以光海爲儲貳。既在東宮。失德彰著。宣廟晚節。頗有悔恨。及至嗣立之後。反道悖理。罔有紀極。姑舉其大者。予雖不德。然受天子之誥命。爲先王之配體。母儀一國。積有年載。夫爲宣廟子也者。不得不以予爲母。而光海信聽讒賊。自生猜隙。刑戮我父母。魚肉我宗族。懷中孺子。奪而殺之。幽閉困辱。無復人理。蓋逞憾於先王。又何有於未亡人。至若戕兄殺弟。屠戮諸姪。暴殺庶母。屢起大獄。毒痛無辜。撤民家數千區。創建兩宮。土木之功。十年未已。先朝者舊。斥逐殆盡。惟姻婭逢惡。縱諛之徒。是崇是信。政以賄成。昏墨盈朝。輦金市官。有同駟僮。賦役煩重。誅求無藝。民不堪命。嗷嗷塗炭。宗社之危。若綴旒然。不惟是也。我國服事天朝。二百餘載。義則君臣。恩猶父子。壬辰再造之惠。萬世不可忘也。先王臨御四十年。至誠事大。平生未嘗背西而坐。光海忘恩背德。罔畏天命。陰懷貳心。輸款奴夷。已未征虜之役。密教

帥臣。觀變向背。卒致全師投虜。流醜四海。王人之來本國。拘囚羈繫。不啻牢狴。皇勅累降。無意濟師。使我三韓禮義之邦。不免夷狄禽獸之歸。痛心疾首。胡可勝言。夫滅天理。斲人倫。上以得罪於宗社。下以結怨於萬姓。罪惡至此。其何以君國子民。居祖宗之王位。奉廟社之神靈乎。茲以廢之。量宜居住。綾陽君倬。宣廟大王之孫。定遠君之第一子也。聰明仁孝。有非常之表。宣廟奇愛之。養之宮中。小字曰天胤。名曰諱。命名之義。厥有微旨。憑几之際。掘手嘘唏。屬意深重。異孫諸孫。今者奮發大計。討手昏亂。脫予囚辱。復予位號。倫紀得正。宗社再安。功德甚懋。神人所歸。可即大位以繼宗廟大王之後。冊夫人韓氏爲王妃。故茲教示云云。天啓三年三月十三日。教中外大小臣僚軍民耆老閑良人等書。王若曰。惟我國家。列聖相承。家法最正。以仁爲政。以孝爲理。重熙累洽之化。至先昭敬王而極矣。昊天不吊。遂值否運。越自十數年來。賊臣爾瞻。憂惑君心。圖竊國柄。因構母子之隙。竟成彝倫之變。幽閉別宮。僇辱備至。秦

昭晋惠之禍。不啻過之。况乃背天朝父母之恩。滅吾東禮義之風。三綱掃地。胡可勝言。至如侈慾之無度。政刑之紊亂。民窮財盡。外潰內訌。足以亡國殄祀。猶是薄物細故。悉具慈教。無容贅舉。予以薄德。承先王餘訓。恪守宗邸。若將終身。幸賴三四忠義之臣。悶宗社之危亡。懼彝倫之數滅。奮發大計。克定內亂。既復位號於慈殿。因願推戴乎寡躬。予下迫群情。上承慈旨。若隕淵谷。其何以堪。爰思履端之初。必舉更始之化。自戊申以來。凡千羅織之獄。株累之坐。及以言事獲罪者。悉皆蕩滌。諸宮建土木興作之役。調度等官。培克聚斂之類。一功革除。其他侵民病國。如戚畹權貴家諸處屯庄。減稅復戶等事。並令查檢括去。內需司大君房被奪田民。一一還給。自今三月十三日昧爽以前。雜犯死罪以下。並皆赦宥。以示維新之意。於戲。有非常之舉。遂推非常之恩。享無疆之休。更思無疆之恤。故茲教示。想宜知悉。○拿致柳希奮。柳希發。柳希亮。柳希顏。沈宗道。全安。正姜燧等。下獄。希奮。希發。處斬。柳皆廢中殿之甥也。奮。小北。發。大北。兄弟一家平生不相容。奮以濁亂朝。

死廷 ○十四日遣承旨鄭竝禮曹叅議睦大欽中使金忠立于濟州。陪還延興夫人。金悌男妻也。癸丑之禍。全家亡。滅丁巳。以咸陽人朴夢俊疏竄濟州為奴。至是陪來。與大妃相見幸矣。大妃殿備忘記逆魁暴瑋。天地間無大逆不道。獲罪於天。大臣朝廷勿以為廢主。上得罪於天。不忠一。不欽於宗社。負罪於宗社二。當君父之病。脅而倏薨。殺父之罪三。誣起兄之逆獄。殺兄之罪四。懷除嫡心。構亂蕭牆。弑嫡之罪五。幽囚母后之罪六。抱藏禍力。協謀奸黨。脅迫母后之罪七。不道之心。日滋月引。欲廢黜母后之罪八。狐猾欺罔君親之罪九。自作百種魘蠱謀術。毒害母后之罪十。水泄不通。嚴威兵衛。欲殺時時。恐喝母后之罪十一。常懷禍心。時時欲殺。追逐鬼魅。入寢病於宮中之罪十二。籍其母后之罪十三。誣飾大逆論。以殺舅滅母后之罪十四。欺天慢天之罪十五。欺罔天子之罪十六。棄禮悖義之罪十七。背恩忘德之罪十八。違天道廢人倫之罪十九。棄善聚惡。恣行悖道之罪二十。違戾祖宗弘制之罪二十一。慢先生之罪二十二。浚民膏血之罪二十三。鬻獄賣官。賄賂公行之罪二十

四。行梟獍之心。食其骨肉。全除。宗支之罪二十五。無辜蔓除。生靈之罪二十六。常役土木。負罪百姓之罪二十七。惑於外戚。背於宗族。罪二十八。布列奸黨。改革法制之罪二十九。亂君之姬。罪三十。殺戮君父之妾。罪三十一。父王母后之宮人。無數殺害。罪三十二。搜捕宮中。使潘女入於寢間。受辱無狀之罪三十三。令重刑罪囚。輿納宮中。賈辱驚駭。罪三十四。褻嫚罪囚。曳父陵堀土。罪三十五。聚乳下赤子。謀殺。罪三十六。親書罪案。伏光海於庭。使呼唱面責。因告罪于廟社。安置光海及妃柳氏世子及妻朴氏于江華。別置東西門內。廢世子。時年二十六。在津舟吟詩。塵寰翻覆。似波瀾。何必憂愁。心自閑。二十六年。真一夢。好須歸去白雲間。○各道調度官如黃海之金淳。全羅之宋敬信。及他貽弊民間者。並令所在誅之。盡削戊申以後功勳。盡釋戊申以後冤獄。及株累竄謫之。惟許賊緣坐不赦。發遣宣諭御史于八道。問民疾苦。盡罷諸道納銀守令。及諸處國屬屯庄之地。蕩滌辛酉以上諸道逋欠物件。南原倉穀自壬子以後連爲典守者所偷有名無實一萬五百餘石守宰

交遞利於解不由消化之數並以散在民間或以畢捧虛○遣禁府都事于張重記以此不與於蕩滌以貽本邑無窮之弊可痛矣

嶺南。拿聚承旨朴宗胄仁同府使池應坤咸安郡守權忠男梁山郡守金忠保于大丘府。誅之。宗胄慶尙道高靈人。父光先兄宗胤。俱以文臣爲仁弘腹心。締結爾瞻。驟登清顯。恣行威欲。無所不至。奪人田民。掠人財寶。紊亂朝庭。斲喪國脉。不但嶺南人民咸被其毒。都中士夫盡受其害。上年以館伴西下至義州。目見美婦之倚門者。實本州鄉吏妻也。招停前導。直入其家。苦喚主婦。持針線來。彼詞其意。牢避不出。移夕大索。竟不得見。怒入客館。令本州搜捕其夫妻。諭以禍福。終不服從。即令羅卒挾害夫妻之舌。夫妻並斃于目前。常在本家。殺人如麻。相訟田民。沒入其家。良家妻子。劫嫁其奴。靈山縣有良家婦。年十八九。其夫戍西未還。胄聞其美。招厥舅問曰。爾子戍西否。今見西報。決有爾子未還之警。其妻年少。必當再嫁。欲妻吾奴之鰥者。於爾意如何。再三懇囑。舅知其不免。唯唯而退。還家涕泣。婦問其由。舅告以實。婦痛哭絕倒。移時收淚而言曰。良人萬里消息如此。雖

欲守信以終餘生。大禍蔓延。舅亦難保。與其殺舅。寧失婦節。吾當往其家。隨便從事。白日照臨。終豈無報。舅大喜。含淚而望送之。婦到朴家。拜伏于庭。曰。靈山縣某人婦也。舅親送我聽命。願承教令。肯招奴許之。婦入其家。歡若舊人。粉面新衣。忻幸自得。奴信其從順。入內使役。未及出。婦投井而死。婦死十六日。夫還。夫還十六日。反正。未十日。禁府都事斬宗胄于大丘。府之南門外。持刀刃割鬻其肉者數百人。應坤等三人俱以奴隸。貳附金相宮得本職。同日一處誅之。光先父子遠竄。是年因本道宣諭御史李景輿狀啓。旌靈山烈女門。全舅全節誠孝誠烈欲譽則贊吾何容說夏四月。拿致濟州牧使梁護誅之。發跡於凶黨賊使延與夫人逆魁爾瞻等正刑。車裂四肢。回示八方。因告廟社。榜示朝堂。頒八道書。王若曰。予荷天地之休。祖宗之靈。平定內亂。祇奉慈殿。剗刮凶穢。掃灑疆土。再安宗祊。復正彝倫。其元惡大憝。助桀爲虐者。今既顯戮。蒿街虔告。廟社屬茲。神人之感。快用敷錫于中外。凡厥在庭。臣僚暨耆老人民。欽聽。予言。逆

魁爾瞻。奸臣之後。市井之徒。妖狐毒螫。種而成性。林甫秦檜。合爲一人。詐術欺世。旌表其門。自以爲孝子。全味文義。剽竊類語。自以爲能文。爰自筮仕之初。已有擅亂之漸。人有佞已者。詔笑而迎譽。士有勝已者。陽慕而陰中。宣廟燭其奸狀。屏黜多年。積怨宣廟。有同私讐。密交仁弘。謀進昏朝。用財結婚。交通宮掖。及其權勢已成。陰懷篡奪。謀起逆獄。以專生殺之權。與賊鈞金。闔無賴之徒。結爲腹心。日夜謀議。始喉申慄於鳳山。誣殺黃赫諸人。遂起晉陵之獄。繼誘鄭浹於北路。廣引一隊士林。捏成永昌之獄。追刑之酷。及於國舅。逼殺之慘。忍於孺子。陰送世曾。猝起海獄。崔沂忠告。片言赤族。株累死徒。殆過數百。及賊筠逆謀之發。乃反換面而告變。要掩其跡。自莅其獄。南門之榜。筠賊自製。耕俊之檄。應旻所作。仁俊之招。狼藉前後。而榻前厲聲。箝制諸臣。一不究問。掩口經殺。天日難欺。路人所知。至於仇景祿。朴景立。卯育門庭。釀成逆謀。聚糧鍊械。諸招昭在。乃使元燁之奴。厚賂獄卒。竊負而逃。事跡既發。法當待命。圓扉而盛氣直啓。自誇忠孝。

王獄罪囚。白日圖出。金吾往捕。拒之不給。古今天下。寧有是乎。久占文衡。把握人材。以科舉爲諭引兇徒。廣植私黨之計。未解蒙之諸子。皆擢巍科。不識字之村氓。驟躋臚仕。七大文講經。預出題及第。舉國奔波。有同歸市。墾鴨島之郊。割占膏腴。斫陵寢之木。云然輸載。兩宮經始之役。過十年而未完。五家僭制之構。彌一洞而連雲。一國工匠。全集其門。四方財寶。山積其庭。怙侈窮奢。富逾李氏。而人反稱下士之儉。侵民奪人。毒如狼羊。而人反稱下士之恭。及其羣心齊激。萬人共指。宗戚陳疏。草野抗章。則言未入闕。白簡隨至。或殺或杖。竄者不知其機。仍指爲某人所嗾。某人所製。恣意彈劾。必欲置死。嶺儒四百。奮義叫閭。則謂之張弓挾矢。謀陷逆獄。秦坑之灰復燃。漢黨之籍將錮。廣招美新之徒。自製頌莽之章。熒惑君心。脅制館學。人皆重足。奠保朝夕。使元老遯荒。賢相流竄。忠良並逐。妖孽布列。納銀除拜。毒害生民。僞占五勳。詔上虛號。蠱昏君之心志。繫昏君之手足。其窮凶極惡之狀。髮擢難悉。至於大倫。則尤不忍言。密嗾凶疏。陰啓昏君。

收議之際。倡說廷臣。脅之以死。誘之以利。至曰唐廟數罪。雖不可爲。漢庭廢黜。盍從寬典。絡乃揚臂數慈殿十罪。使館學通文八道。噫以臣子。數罪國母。是可忍耶。以廢黜尙云寬典。將欲何爲。幽閉之辱。過於十年。神人之痛。至此而極。履霜堅冰。所由者漸矣。食土含血。人得而誅之。逆魁鄭仁弘。蛇蝎之性。鬼蜮之心。始雖盜名於林下。特一豪強品官。中焉托跡於義兵。惟事武斷鄉曲。收聚頑鈍之徒。私倡語怪之學。李彥迪李滉。東方之大賢。而因憾疏斥。不有餘力。鄭蘊李大期。直言被罪。而從而下石。畧不申救。士心咸憤。門徒皆叛。與賊魁爾瞻。表裏聲勢。迭相推薦。塗抹山野。冒據鼎軸。導昏君必以刑獄。倡儕流必以詔佞。私母入廟之議。該曹數年乃寢。而一言贊成。終勸上奏。登筵先薦。施文用風水之說。竟起土木之役。癸丑之獄。陳筭肆虐。指大君爲圈中豨豕。大論之發。首倡先廢後奏之議。至比於哀姜文姜。且以爲不共戴天之讎。幽閉之禍。決於其言。使綱常數絕。人理晦塞。人之爲惡。孰云至於此極。老而不死。天心有待。今日韓纘男鄭造

李偉卿尹認等皆爾瞻之奴隸心腹也。其交通宮掖作弊中外貪虐縱恣之狀與爾瞻無異。海獄之慘。纘男專主。而廢母之論。則或自韋布而抗疏。或自臺閣而首發。同惡相濟。厥罪惟均。茲命李爾瞻鄭仁弘韓纘男李偉卿尹認等。陵遲處斬。傳首四方。籍沒緣坐。破家瀦澤等事。並依律文施行。其餘則或誅止其身。或流放遠裔。並從惟輕之律。務遵罔治之訓。邦有常憲。予豈得私。變推廣蕩之恩。用示勸懲之方。於戲惟其所召。宜思禍福之門。咸與維新。共躋仁壽之域。故茲教示云云。○以李元翼為領議政。李光庭為吏曹判書。時完平在忠原配所。承命還京。光庭以前日大論。收議模稜。呈辭不出。五月。廢世子在圍籬吟曰。本是同根何太薄。理宜相愛亦相哀。緣何脫此樊籠去。綠水青山任去來。同根之歎。嗟已晚矣。○毛文龍陞授都督之職。本國以李尙吉為接伴使。○錄靖社功臣昇平府院君金塗延平府院君李貴等三十餘人。其餘原從各人等。較計功勞。守令邊將。次次錄用。收聚五賊及他亂臣家財物于南別宮。與家舍田民沒入之數。一時分給。

功臣。分財之時爭鬪分亂以報當時士林別宮分財盡破頭之歌詠可恨。○廢世子與妻朴氏在圍籬。夜率從人。

掘地途逃出。為守卒所捉。拿入之際。朴氏在內已縊死。乃祖乃父共縊。側有女從之。三代

直死。江華守圍別將權綵。拿鞠行刑。

六月。韓俊謙以領敦寧府院君入來。以張晚為都元帥。李适為副元帥。

上親餞于慕華館。手賜御刀。推轂以送。晚開府平壤。适鎮寧邊。平兵例兼俊謙

當今。○括出前日凶疏儒生數百餘人。邊遠安置。漏網者亦多。如羅州之國舅。○括出前日凶疏儒生數百餘人。邊遠安置。漏網者亦多。如羅州之疾莫敢指早查括之日。因庇得保與淳昌人。申尚淵。倡言曰。如罪我者。又是廢主一鄉士子。不忍宿憤。又痛此言具。○中北人前叅判柳夢寅等。潛為由呈告。方伯執以囚之。因枚啓邊竄。

異謀。事覺被誅。

秋七月初十日。白虹貫日。西南疊貫。○初五日癸卯。日食。未時。○遣禁府都事李惟馨于江華。賜廢世子死。○令下三道。大發兵赴西。各萬餘名。○

大霖雨。八月設增廣科。各道考官舊習猶存。勢賂因行。一無公道。事

聞。命治其中之甚者。本道左道京試官李屹因翰累朔。會試出榜後還罷。

○遣陪臣李慶全于天朝。奉妃奏聞請封。具由反正實狀。

九月。廢妃柳氏死于圍籬。以禮葬之。○黃玹金義敏李惟林等謀逆伏誅。

○順天府兩處有子女殺父之變。拿致極典。降本府爲縣。

冬十月。熒惑入南斗。○本道大軍。二十日發行。到平安道。屬副元帥。○木綿花又大災。

十二月初九日朝。日暘四五並見。移時相搏。辰時白虹貫日。○初十日傳旨。予自忝位以來。人事多愧於下。天譴宜見於上。而昨日之變。尤極慘酷。靜省咎徵。罪實在予。痛心覩面。罔知攸濟。頃因災譴。求言中外。無一人言之者。此豈非寡昧治國無狀之致乎。雖然。天怒至於如此。讜言終不可無。惟我大小臣僚。勿以予爲無可與言。須念祖宗之積德。盡言無諱。邦國不寧。臣民亦豈獨安乎。予雖不敏。當改過遷善。以答天譴。曉諭中外。使之通知。爲只爲下議政府。因布八道求言。二十七日。白虹貫日。

甲子天啓四年

春正月十四日。文晦李佑等上變。拿致奇自獻。李時言韓汝吉柳公亮李愔等四十餘人下獄。李适韓明璉及适子梅明璉子瀾潤亦在告中。十五日初昏。黑氣布天。白氣如練。割穿東西者數四。十八日。白虹貫日。遣宣傳官金智秀禁府假都事沈大臨高德昌等。拿致梅及瀾潤。都事到安州。分向寧邊龜城。時适手下兵萬二千餘名。降倭一百三十三名。連冬鍊藝。號稱精銳。及都事到門。故遲開鑰。與其屬李守白奇益獻崔德雯李廷培。辟左右謀諸密室曰。我只有子。將伏斧鑕。豈有子拿而父全之理。事已急矣。男兒不死則已。等死。安能俛首就戮。益獻等合口同辭曰。如欲舉事。莫若殺來使威脅軍中。使無異議。議定。适招諸將語其事。如中軍李胤緒別將柳順懋李珣虞侯李慎在坐。适牛提一劍。目視諸將曰。敢有違者死。左右股慄。無一人抗節罵賊以折凶計者。於是布陳城內。開門入都事。都事未及入庭。令軍校斬殺。一軍震怖。莫敢相與語。即下令軍中。期以二

十二日發兵。且傳令近營守令曰。○有急時軍務面議事。罔晝夜馳進。乃二十二日亥時云。時張晚在平壤。中軍南以興。票下軍官南斗傍。適以私往寧邊。造知之。作一書付斗傍。使之故放。翌日到平壤。具道逆狀。又傳其書於南以興。以興不發封。納於帥府。開見。則書中列書南以興。柳孝傑。朴震英之字。其辭曰。聖明在上。羣凶滿朝。清君側之惡。烏可已乎云云。帥府即以其事聞。並上書。蓋此數將。皆適之所忌。欲行間於帥府。動搖其根。抵時元帥病篤。不離床席。聞變以來。策應甚劇。夜不交睫。而精神則不甚衰。征謀治法。出人意慮外。元帥以爲此賊挾副帥之號。擁滿萬之衆。肆意直上。其鋒不可輕犯。我名雖元帥。陳下所屬。不滿數千。逆順雖異。衆寡不同。易以計散。難以力鬪。於是傳令列邑。促兵入平壤。以爲固守計。曉諭軍兵之父母妻子。使之潛通賊中。背逆歸順。又傳令南北兩道監兵使。提兵赴亂。遣軍官于昌義兩鎮。令柳斐金完帶同軍兵。急赴轅門。以軍官姜涌遂安假守李靖。給精炮一哨。且令糾率瑞興遂安等邑軍兵。預防塞垣。以

斷賊路。出西征錄

○二十二日。賊兵發寧邊向价川之路。本道士兵上馬隊帥營

牌等。及全羅大軍并數萬。以降倭爲前後擁護而行。元帥料賊由直路則今日當到安州。將佐皆曰。防禦使鄭忠信與伊賊相善。且有才。本城存亡。在忠信向背。元帥曰。鄭忠信慷慨有死志。且與我情同骨肉。必不背我。從賊力能當賊。則背城一戰。不能必死於賊。及暮。忠信馳到府下。從事金起宗曰。安州重鎮。且兼防禦。固守城池。使賊不敢東者。責在主將。而忠信棄城而來。難免軍律。不可以親切之人而有所饒貸。元帥即拿入庭中。將欲罪之。忠信對曰。此賊意在疾趨。必不由安州。設由安州。兵孤力弱。勢難抵當。與其膠守孤城而死。不若聽府下調用。元帥曰。汝言即是矣。然賊情不可遙度。鎮所不可擅離。汝其急還本州。給精騎百餘名。遂與帥府軍官趙時俊偕。且問忠信曰。此賊有上中下三策。以銀蔘厚結毛將。據有清川以北。部署諸賊。號令一道。上策也。陰結奴酋。倚仗聲勢。中策也。問道疾趨。直向京城。下策也。以汝料之。當出何策。忠信曰。必出下計無疑矣。到順安。聞

賊已向价川路。報帥府曰。安州已在賊後。此時不可坐守空城。以賊遣君父。願還幕府。元帥可其報。方忠信之赴箕城也。到肅川。傳令於府使鄭元翼。入守安州。文翼慨然領諾。略無難色。是夕入安州。以爲守城計。老江僉使李慶禎亦率本鎮土兵。入守安州。平壤所住軍兵甚單。人多危之。聞變翌日。中和府使柳大和悉府中兵一千餘名來會。黃州砲手一千名亦繼至。軍勢稍壯。後一日。成川府使鄭斗源領兵三百餘名。馳入城中。兼管糧餉。慈山郡守安夢尹三和縣令俞大逸。江東縣監崔應一。祥原郡守李琡。龍岡縣令申臨。江西縣令黃瀼。甌山縣令張噉。廣梁僉使張勳。鱗次而至。平安都事金楷方巡往海郡。聞變之日。單騎馳到。同與計事。定州牧使丁好恕以賊适傳令。將赴寧邊。行到嘉山。聞反狀。即還本州。大會軍兵。斬賊使以徇軍中。元帥料賊以下出西征錄○明璉在龜城。亦殺都事。先帶三十餘騎追發。以中軍金孝信別將姜綽領其軍一千二百名。隨後而發。二十四日。元帥狀啓至京。都下凶懼。以李守一爲副元帥發送。急遣宣傳官于各道監

兵使。傳旨。西邊叛將。稱兵構亂。京城不無意外之患。卿其領率道內軍兵。罔晝夜馳來。○帥府從事官李敏求自江邊巡向寧邊。到嘉山聞變。馳入安州。作檄通諭。鎮定人心。送軍官鄭之罕等數人。曉諭金孝信軍中。清州以北之背逆歸順。皆其力也。巡察使李尙吉。自鐵山馳赴安州。令龍川府使李希建。郭山郡守閔汝儉。宣川府使金慶雲。定州牧使丁好恕。宣沙浦僉使李澤。復讎將金良彥。領兵來會。朔州府使閔仁佶。寧郡守安浚亦繼至。德川郡守李厚輿聞變驚惶。棄官不入安平兩鎮。從間路竄身逃匿。直走京城。元帥謂金起宗曰。從事視事寧邊時。必與諸將語。其中不從賊者。可想其爲人耶。起宗曰。知人甚難。雖不可逆料。至於李胤緒。柳舜懋。李愼。則觀其爲人。似不爲逆。元帥曰。李胤緒余雖不與之相接。本來嶺南人。性且良善。柳舜懋。李愼。余相識已久。不從賊。不死於起兵之夕。意者欲有所爲耳。以計挑之。彼必相應。其令諸將各獻行間計。別將朴震英得一蒼頭來。獻金起宗曰。此乃适賊中軍李胤緒之奴。名孝生者也。如欲行

計。此實奇貨。從事即引入房內。饋以酒肉。約曰。汝若歸報一書於中軍。使之領兵投義。當賞汝千金。啓賜中軍爵不計級。遂與南以興柳孝傑朴震英。聯名作書。具陳逆順利害。折縫而藏之。約定。具告元帥。元帥以木綿五十疋給孝生。孝生曰。我主方在賊中。不死則爲慮此鈴下人之所恥也。當冒萬死入賊壘。以此書歸報我主。使就生道。因此而貨之。僕所不忍。固辭不受。見者義之。時賊兵已到慈山。是日孝生及慈山。傳其書。李胤緒柳舜懋李慎李珣。前此已有謀議。見書密與所帶將官約。夜三鼓放砲而散陣。賊甚驚擾。永柔把摠金通可等。且與此謀。頗有功焉。李胤緒柳舜懋李慎李珣等。直到帥府。跪拜庭下。繼之慟哭。元帥亦下床執手。涕泣而言曰。當初被脅。出於倉卒。死固善矣。不死而領兵歸順。亦或一道。即以李胤緒李慎李珣爲別將。柳舜懋爲中軍。任之不疑。一軍皆服元帥弘量。李胤緒以屈膝賊奴爲恥。廢食累日。傳成心恙。遂伏劍而死。既能辦此一死。而不能罵賊於鐵瓮謀叛之日。又不能效死於元戎討賊之時。其死可惜。然

憤恚自決。亦足以愧一世爲人臣懷二心而偷生者矣。慈山之夜。賊兵之潰散者。三千餘人。從李胤緒到平壤者。六百人。樹白旗於西門外。招來降卒。別作一隊。屬於將領。而軍杖之背逆歸順者。元帥引入室中。披襟語之曰。能刺。刺我不能。聽我調用。推心置腹。無間舊部曲。人皆感泣。願以死報。賊募死士八人。四人則送鐵山。欲刺殺巡察。四人則送平壤。刺殺元帥。一人爲羅卒所獲。元帥亦不之罪。厚饋酒肉。故令縱去。其意蓋欲使賊知城中。有備。不敢近耳。元帥病劇。不能跨馬。猶且乘小轎。日三巡城。幕屬恐其添傷。力言不可。元帥曰。此賊所以輕我者。以我病重且暮且死故也。若知我力能巡城。則必不輕犯我也。金起宗金楷作檄文二百餘度。半以諺解。令軍卒易解其意。使慈山郡守安夢尹遣票下人。掛諸前路。賊之先鋒。收拾檄書。一軍傳看曰。吾聞元帥亦與此謀。今見檄文。是給我也。遂逡巡不發。適知軍情驚擾。遂結陣高阜。開誘鎮定。日已昏黑。不得進陣。江東乃捲還慈山。是夜賊兵大潰。四將逃出。投機行間之計。多有賴焉。出西錄○二十五

日。元帥知賊不由平壤路。議出師。是日直星犯七殺。議者以兵家所忌爲難。鄭忠信曰。豈有聞父母之病。擇方而行者乎。師直爲壯。何必拘於孤虛。背向之說乎。元帥然之。以鄭忠信爲前部大將。諸將屬焉。以前府使朴永緒爲先鋒將。精銳屬焉。以柳孝傑爲左協將。上馬隊及北兵屬焉。以趙時俊爲突擊將。上馬隊二哨屬焉。以張噉爲右協將。炮手一千。龍岡縣令申嘯屬焉。以平壤判官陳誠一爲殿後將。騎步兵相半。前萬戶金泰屹屬焉。以慈山郡守安夢尹爲管餉官。以江東縣監崔應一爲餉道將。以定州千總洪沉爲斥候將。軍總共一千八百有贏。二十六日。以中軍南以興爲繼援大將。朴震英爲別將。帥府軍官及騎步兵屬焉。出師之日。諸將皆列跪于庭。新造仗義討逆旗。元帥手自授之曰。賊兵雖多。皆是脅從。忘父母棄妻子。從賊爲逆。豈其本心。臨戰必陳之以逆順。曉之以利害。如有向我者。切勿濫殺。生獲多者爲上功。斬級次之。勉以忠義。言甚激烈。諸將皆收淚而聽。時安玢被繫平壤府。南以興告帥府曰。我素知安玢爲人。萬無與伊

謀叛之理。請貸其死。戴罪討逆。元帥問金起宗。此言如何。對曰。以常道言。則王府罪人。決難輕釋。然用兵有奇正。處事有經權。今日之事。專在奇與權。玄楫以中軍。久總兵務。頗得軍情。觀其形跡。似無可疑。而不幸拿去。自此諸將各自疑懼。以爲拿命繼至。莫有鬪志。舉足彼此勝負可許。今若釋一安玢。得百死力。則可以鎮定軍心。豈但爲安玢地而止哉。元帥曰。吾意亦然。即具聞于朝。乃釋安玢屬先鋒陣下。使之戴罪討賊。於是諸將皆曰。雖有拿命。帥府必當活我。特以無疑。出師數日。自有臬示安玢之命。而繼有因啓聞放釋之旨。玢且在先鋒陣中。是以得免。元帥又令別將朴瑋領兵八百繼緩。賊由江東宿於三登境。元帥募精炮百餘名。以許益福。金天國定將。夜斫賊營。賊兵多潰。金孝信。康綽領其軍。追到价川。孝信給入肅川。斬綽函首。領衆歸順。斬綽之戰。孝信之頸亦半割矣。帥府於狀啓中。有賊勢日削。坐待賊首等語。金起宗曰。今賊兵雖潰。降倭未散。腹心猶在。未可易言。啓辭如此。則恐朝廷不即勦滅。爲當事者之罪也。元帥曰。今日之事。

與外寇不同。其腹心徒黨。潜伏都中。若以賊兵鴟張。勢難抵當。馳啓則內應之徒。必當蝟起。禍有不可測者。此所以鎮定都下之意也。況於狀啓末端。每及自京嚴加防備之說。朝廷必想見其微意耳。出西錄○二十八日。本道監司李溟在全州。傳令列邑發兵赴難。先到恩津。兵使尹璠領軍繼至。溟付其軍上送。因留恩津爲策應計。○帥府從事官李致求。抄帶清州以北牙兵到平壤。出西錄○二十九日。南原府使申竣領軍五百餘名赴京。以完豐君李曙領軍。馳守開城府青石洞。○全州通文。三綱宇宙之棟樑。臣而叛君。猶子之反父。理所不容。人人得以誅之。惟我國家。積德深仁。二百年來。雖或有不逞之徒。構亂之漸。而未常有弄兵竊據如逆臣。适明璉也。主上殿下。躬聖神之德。應天人之助。撥亂反正。復大妃之位。號彝倫既敦而復叙。敵天朝之所愾。大義已晦而再明。使我三韓禮義之邦。不爲夷狄禽獸之歸。秋毫皆聖上之力也。适以無知武夫。幸值際會。粗効微勞。名忝勳籍。所當感恩效力之不暇。而一自邊圉之行。便生逆天之

謀。敢殺王人。據有一城。爲臣子者。孰不欲食其肉而寢其皮乎。鄙等方將叫號義旅。以赴國家之急。欲與列邑諸君子共之。其各奮忠募義。協力入衛。千萬幸甚。前牧使梁克選等。此亦中募兵。則勿論前朝官生進校生。閑良公私賤。從自募。收聚糧械。則隨其列邑募得人數。盡心辦出。來月十五日前。礪山郡期會。共赴事。○平安監司李尙吉領軍到平壤。是日元帥出師。部署將領。整頓軍兵。柳舜懋爲中軍。劉夢龍爲左協將。丁好恕爲右協將。金大乾爲左斥候將。李守敬爲右斥候將。巡察使悉發平壤炮手牙兵一千名。軍皆丁壯。以郭山郡守閔汝儉屬焉。出兵之際。日已昏黑。大軍纔涉大同江。經宿時。督戰御史崔暉到平山。移牒帥府。催兵進戰。而衆寡懸殊。不得交鋒。賊向遂安之路。知姜涌李靖固守塞垣。不敢近。轉入黃州之馬場。官軍躡後。隔野對壘。出西錄

二月初二日卯時。賊先出兵。官軍亦離柵軍於平原。排陣未畢。賊之中營炮手一番虛放之後。即投我陣。許銓宋豈亦帶馬兵。一時歸正。官軍望見

降卒來投。意以爲賊鋒進逼。遂潰散。別將安玠斥候將吳暹爲賊所獲。先鋒將朴永緒陷賊圍中。舍馬半坐。不離一步地。及被脅。罵賊不絕口。曰。汝以府院君兼副元帥。於汝顧何不足。而反生射天之計。以至此耶。終始不屈。亂斫而死。柳孝傑陷賊圍。幾爲賊所殺。孝傑手持鞭棍。左右揮擊。遂開一面。以是脫出。孝傑之奴山水。亦勇力超羣。雖在亂兵中。與其主不相捨。遂死於賊。是夜元帥馳到黃州。點閱軍兵。招集降卒。官軍之陷賊三十餘名。陣亡三十餘人。賊兵之投義一千八百。所得優於所喪。初黃海兵使邊滄未上任。城中無主將。判官鄭良弼爲死守計。規畫頗詳。節制得宜。軍中恃以無懼。悉亦聞變。馳入。與鄭良弼爲死守計。規畫頗詳。節制得宜。軍中恃以無懼。悉發儲穀。運到軍前。鞍峴收復之功。實由於此。薪橋之敗。羣意以爲南以興鄭忠信等有喪敗之罪。當以軍法從事。金起宗曰。此論雖甚正。然官軍少却。而所獲甚多。不可以一敗罪其人。且見將領中無可代者。賊已入鳳山路。今若後賊累日。雖欲追躡。勢不可得。宜領職如舊。立功自効。元帥許之。

出西
錄 ○ 通文。國運不幸。逆賊煽亂。戕殺王人。竊據關峽。凡有血氣。孰不痛惋。惟我湖南一道。素著節義之稱。曾在壬辰外賊之亂。尙且爭奮義旅。忘生赴鬪。況今逆變出於肘腋。其負恩背義。吠主射天之惡。比諸壬辰倭奴之變。豈不萬萬相懸。此正臣子指天誓日。捐軀報國之秋。而傾耳累日。未聞一人首振義聲。爲一道倡言。念及此。氣塞心寒。等竝以不揆駑劣。乃敢出兵通告。伏願道內諸君子。同奮敵愾之義。各勵勤王之節。通文到日。鄉校司馬齋鄉射堂僉君。即聚一鄉之人。廣募向義之徒。月十六日。齊會子潭陽客舍。相與熟議。整飭戎事。千萬幸甚。且聞都元帥張晚進。住平壤。與安州防禦使鄭忠信。把截要衝。體察使李元翼。出鎮開城。副使李時發。傳檄督戰。南兵使申景瑗。率威鏡精銳。自北斷其左臂。副元帥守一領畿甸炮手。自東扼其咽喉。兇徒褫魄。陸續駭散。勢轉窮蹙。進退無據。鬼誅天刑。匪朝即夕。更望並悉此意。鼓動士氣。趁期齊會。毋敢或後。倘有委托徘徊不急國家之難者。齊會誓衆之日。當以軍法從事。並惟僉量。月日

奉常正崔苻生員崔蒞等。○初六日。三道兵到漢濱。糧途不繼。京畿各官輸糧繼援。○賊兵過鳳山。官軍追及之。賊轉向麒麟路。自此山高谷窄。樹木叢密。棧道峻崎。騎不並行。非用武之地。至陵里。募死士衝賊陣。斬降倭二級。賊兵多潰。官軍糧道屢絕。人馬飢乏。皆言帥府在後。必能濟我云。元帥大軍由鳳山路。約與先鋒合擊於猪灘。到瑞興。遇副元帥李守一所領軍兵約可百餘人。元帥以府下將領郭山郡守閔汝儉朔州府使閔仁佶平壤判官陳誠一及其所帶軍兵屬焉。其軍始成軍容。因行軍。夜至葱秀站。元帥病篤。不省人事。金起宗李敏求環坐嗟悶。良久復甦。五更後發行。黎明到平山。又以義州兵馬屬焉。南兵使申景瑗亦帶本道兵八百來會。副體察使李時發從事官金時讓督戰。御史崔峴黃海監司林愔時在平山山城。相議進兵馬灘。約與鄭忠信等夾擊。忽聞炮聲遠到。意謂官軍合戰。將促進援。俄而李重老等敗報至。城中皆震驚。出西征錄初黃海防禦使李重老領軍守江。爲迎戰計。賊兵迫逐之。官軍盡投于江。餘皆降賊。重老

與諸將皆死之。鄭忠信等追賊至馬灘。賊已敗。李重老軍還軍灘上。官軍隔水對陣。或射或炮。酣戰移時。賊以一騎載送李重老等八將之首。眉目宛然。皆素所相識。一軍無不色沮。南以興給衆曰。此皆不識面之人。必軍卒也。元帥炊米六七石作飯。盛以布帛。載送軍前。將士以手掬喫。至有感泣者。平山府使李廓既兼防禦使號。所帶軍兵。非如重老烏合之衆。而既不能戰。又不能死。竄身於積屍中。經夜猶不能起。翌曉南以興送李希善觀戰場。始知其不死。跨馬以來。問昨日陳中事。則都不省記。自謂逢賊棍幾死復生云。而察之則無一點傷痕。賊聞副元帥李曙之兵。緊扼青石洞。以降倭數十。夜亂其軍。官軍少却。賊猶不由青石洞。自狻猊古路過松都西門外。直向臨津。官軍追到長湍。約束軍卒。欲決一死戰於臨津。比至。賊已渡江。問諸津吏。則云。坡州牧使領兵數百。防守灘口。賊使二甲騎先渡。至其軍。不知所言何事。而牧使朴孝立捲兵而走。一人還報。賊一人從東岸直向上流。此則送於李興立者也。興立以水原防禦使領兵守要。興立同潰。自平山以後。凡行

師用兵。多與李時發。崔峴。金世讓。相爲畫規。計定而後行。謀無掣肘。事有便益。師次臨津。江灘甚淺。且無設備。使伊賊長驅經渡。朴孝立誤國之罪。萬死無惜。將士切齒扼腕。卒伍中至有拔劍斫木。欲亟斬兇賊者。可見人心所激。亦出於元戎拊循得力。而賊不足平也。鄭忠信以下西征錄○賊兵日進。自京出戰之將皆潰退。朝廷遂定避賊之計。傳旨全羅監司。兇鋒已迫畿郊。親率戎行。以致天討。而慈殿內殿元子。姑從廟堂之請。暫爲移避之計。言念湖南之地。實倚晉陽之歸。卿其親到境上。凡諸支供。毋致欠闕云云。監司自恩津馳還全州。分定差使員。刻期措置。還歸礪山待候。○出奇自獻。李時言。柳公亮。李愔等四十餘人。于獄中。陵遲處斬。○初八日。兩湖兵渡漢江。結陣于崇禮門外。探報賊兵已到碧蹄。初昏。大駕陪慈殿內殿及元子。出崇禮門到漢江。江人盡遁。舟船未准。上親執炬督船。百官頓足江頭。無路濟涉。哭泣奔走之際。昌慶宮闕烟火燦天。亂民放火上下皆以爲賊兵在後。扶抱家屬。疑投于江。俄得五六小艇。終宵奔涉。下道軍兵及都中

隨。駕大小人未及渡者。分散相失。○初九日。且龍馭駐沙平原。日晏闕膳。南原府使申竣進薏苡粥及乾柿。車駕因奔水原府。午後賊兵三十餘騎。先到京城。呼曰。城中人勿爲驚動。新王即位云云。○初十日。适賊與明璉連轡入城。适弟遠與李忠吉。李時言子煜等。帶募兵數千餘人。至沙羅峴北。迎賊爲先導。又有各寺吏胥肆臺。俱冠服出迎者。坊民治道路鋪黃土而迎之。賊入據慶福宮。推戴興安君璉。宣廟子以忠吉爲大將。護衛逆璉。璉以酒肉犒忠吉軍。都民語曰。推戴逆璉。勢不能久。時元帥病篤。自力行軍。激勵士卒。日沒後。遂渡臨津。先遣南兵使申景瑗。馳赴先鋒。先二日。元帥募軍官金仁等四人。優給帛段。送京城探賊情。回報曰。賊入都城。大駕播遷。忠清道勤。王兵結陣慕華館。而亦已潰散云。一軍聞之皆涕泣。元帥曰。道路雖阻。不可無奔問之舉。卽遣李敏求于。行朝。金起宗與之相訣曰。明日定與賊合戰。我之死生。當以勝敗卜之。願好赴。行朝。以南方爲恢復根柢。李敏求曰。事如不幸。君與我不過死先後異耳。我豈獨

生。前鋒曉發。至惠林嶺。元帥傳令于南以興鄭忠信曰。有會議事皆來會。鄭忠信南以興柳孝傑金浣邊滄申景瑗等齊到。李時發崔峴金時讓李敏求金起宗皆班荆于坡州路上。相議進勦計。元帥曰。今日之策有二。賊入都城。廟社南遷。國之所賴以中興者。其責在我。況今都民未必專附於賊。至有觀望成敗者。若小遲一兩日。則人皆堅意向賊。雖有八道之兵。攻之不易。及此時。決一死戰一也。催李曙兵守東路。申景禎兵守南路。四面把守。絕其餉途。待諸路兵。併力擊之。務出萬全二也。二者何居焉。鄭忠信對曰。諸將不能戮力討賊。賊犯京城。君文播越。罪合萬誅。事已急矣。不可翫寇。無論成敗。城下一戰。烏可已也。况先據北山者勝。官軍據嶺而陣。則其勢當俯壓都城。都民之觀望者。若知元帥大軍已臨鞍嶺。其勢必當內應。且賊不可不出戰。戰必仰攻。得其形便。陣脚甚固。則敗賊必矣。老爺督諸軍。鱗次而進。可於明曉齊到鞍嶺。計無逾於此者。南以興曰。今日之策。忠信之策爲最。願帥府速決。崔峴金時讓李敏求金起宗贊其計。元帥

一言而斷。忠信遂跨馬先出。諸將無異辭。元帥且謂其軍校曰。賊必不出。分兵據南山蚕頭。促李曙林愾兵據駱山鼎足而臨之。互爲犄角。不出一二日。兩賊之頭可致。忠信等亦於道中議此事。將以申景瑗邊滄兵爲分守南山計。謀不相及。而計已暗合矣。 體府曰。督戰專在於斬退。而例以位卑之人定將。無以節制斬退將。元健申東皆位卑。以南兵使申景瑗爲之如何。元帥曰。大將爲斬退。事體不妥。金時讓曰。丁酉島山之戰。李時言以忠清兵使爲斬退。大將爲之。無所不可。巡邊使邊滄請斬敗軍將李寅卿。朴孝立之報。適至。時讓曰。兵有先聲而後實者。滄之此報。軍中必聞知。若以爲斬退。則軍情必憚之也。李敏求亦力言。元帥乃許。遂以邊滄爲斬退大將到坡州。摠督副使崔鳴吉協守將李時白領軍二百餘名。自積城來到。鄭忠信到延曙。使斥候將金良彥帶二十騎到鞍嶺下。棄馬徒步。潛上嶺頭。生獲烽卒。教以舉例烽。蓋欲使賊知無驚報也。大軍由淨土路。進陣鞍嶺。日已昏黑。鄭忠信柳孝傑李希建金慶云趙得俊崔應一申景瑗。

先到嶺上。巡審陣勢。布筭而待之。南以興朴瑋成大勳。李休復。金泰屹。李靖。李澤。李慶禎。安夢尹。安澈。黃瀼。鱗次而至。金完邊滄亦繼至。以朴瑋。李休復。成大勳。李希建。金慶雲。守嶺南爲頭局。皆鄭忠信所屬也。以邊滄軍一半。南以興軍專守嶺內。以金完之兵守嶺西。以申景瑗。李靖。兵守嶺北。以黃瀼。安夢尹。崔應一。李景禎。邊滄。兵一半爲中堅。使李廓給精炮二百名。潛伏裳岩上谷。以防彰義門路。諸軍夜到。人馬喧嘶。時東風大作。城中不知官軍來陣。可見天意之助順。是夜京營庫近處。李葉等八人。至軍前。獻計曰。京營庫有米布甚多。賊四騎來守。令坊民巡警。何不取此資食乎。邊滄曾在延曙。逢自賊中出來者。已得其詳。知其言不虛。即使吳珀帶其軍五十餘騎。襲斬賊將。邊滄送步兵百名。南以興送馬軍數百。盡取其儲。軍中久乏食。得此賴焉。適弟以下
出西征錄○車駕自水原奔天安。三殿隨之。十一日。賊始見嶺上有官軍。兩賊相議出兵。適曰。我國兵法以精銳爲先鋒。元帥在後。其軍必虛。以一支兵。帶同降倭。從彰義門。繞出延曙路。生獲張

晚。以示嶺上諸軍。士氣沮喪。人無鬪志。可以一擊全勝。明璉曰。嶺上之軍。其數我已知之。驅出都民。使之登城觀我戰法。從一路進兵。專力攻之。彼遠來烏合之卒。望見我軍。必氣奪心喪。未及交鋒。而潰散然後。可以鎮服人心。而斷後議也。仍令軍中早辦行厨。曰。剪此朝食。即開門出兵。一支自朴鼎吉家前路。一支自蓮池墻後路。漫山蔽谷。蟻附以上。官軍處於絕頂。歸路已斷。人皆有死志。莫不磨勵以待之。都民觀望者。自曲城至南山。滿堞雜沓。明璉帶降倭數十。炮射精銳手爲前鋒。適在中督戰。且乘順風。直攻頭局。矢丸如雨。人莫敢當戰。南以興拔劍督戰。將士無敢後者。金慶雲。李希建挺身出戰。矢不虛發。慶雲中丸而死。邊滄手自提劍督戰。人皆殊死戰。俄而風勢忽轉。賊在下風。官軍氣倍。自卯至巳。酣戰不已。帥府軍官申東來報曰。賊之初出兵也。副元帥李守一駐兵嶺底。不即進兵。今雖進陣西嶺。亦不相援。元帥曰。軍律至嚴。何敢乃已。金時讓。金起宗。崔暉曰。後至逗遛。當以軍法從事。副帥兵房軍官。即可梟示軍中。以督諸軍。崔鳴吉

曰。此言甚明正。何不即從耶。元帥曰。副帥大將也。不可輕處。更督之。觀其進退處置。未晚也。終不許之。金起宗曰。此賊必空城出戰。及此時。我軍自彰義門入。先立漢幟。又令南以興鄭忠臣自西南兩門入。則賊必進退狼狽。一擊可殲。李時發曰。此奇計也。機不可失。元帥曰。計則善矣。都中地勢。與平原不同。深街曲巷。降倭長於埋伏。萬或一跌。悔無及矣。都民且與賊相雜。兵戈之下。玉石俱焚。死傷必多。不若務出萬全。遂止之。方官軍之鑿戰也。賊將李壤逢丸墜死。明璉中箭退却。其他賊兵之委屍陣前。墜崖落澗者。不可勝記。官軍踴躍追擊。勢若建瓴。柳孝傑所帶北軍。無不一當十。賊求死不暇。或分散逃走。或竄入閭家。都民閉敦義西小兩門。賊不得入。直向崇禮門。或有走向麻浦西江。赴水死者亦多。鄭忠信欲督兵追入。南以興止之曰。今日之事。幸賴天祐。得至於此。不出一日。兩賊之頭可致。不必窮追。忠信曰。疾雷未及掩耳。此正急擊勿失之機。彼韓李褫魄之鬼。奚暇轉敗爲勝。若一力追及。則必不過廣通橋而就捕耳。以興力止之。金起

宗到嶺上。與副元帥對坐。俄頃之間。首級積如丘山。有人斬一僧人頭來獻。面貌如生。金起宗曰。山僧似無來在賊中之理。此人貌類尹哥。無乃尹仁發之頭耶。副元帥曰。我以為然。從事之言是矣。所謂尹仁發者。乃故承旨尹敬立之孽子也。與适子梅陰爲逆謀。交結城中無賴之徒。約爲內應。及爲文晦李祐等所告。自知謀泄。託以路中逢賊被殺。爛斫他人之屍。使人不疑。因削髮爲僧。投入寧邊。及起兵之後。常在賊左右。爲掌書記者也。又有生擒二人來獻者。其人稱冤者。左右不問真假。將斬之。金起宗曰。賊兵與官軍服飾相同。此安知非我軍而都民欲要首功。僞稱賊也。不可不詳問而處之。問之。則乃南原李哨官票下炮手也。遂釋之。玉石俱焚之患。盖如此。金起宗謂副元帥曰。賊兵不由西嶺。令監雖不與之交鋒。對嶺而陣。又送哨官李克敬任灝。以助聲勢。使賊不得犯中堅。幸甚。副帥曰。老將何力之有焉。金起宗因東嶺見金完南以興。則生擒賊數十餘名。置軍中。問曰。擒賊不殺何也。以興曰。平壤出師之日。元帥戒諸將而不妄殺。賊亦

吾民也。何以殺爲。其言頗有古將風。前鋒又報。賊兵五十餘騎。來屯慶會蓮池邊。南以興。即令軍中吹角放炮。整頓以待。都民望見官軍大捷。即入賊營。搥殺火兵。盡取資糧。賊入城不得食。怒殺都民。都民以此背賊向我。至要官軍入城。共殲此賊。而日已暮矣。未及進兵。有人生獲李時言子煜。來獻軍前。體府帥府置諸疑信間。方究問其罪。金時讓曰。出郊迎賊。已出於探聽人之口。而又染駁馬欲諱其跡。從賊之形。明白無疑。不殺何爲。遂令斬徇軍中。臨刑呼曰。安望久使我至此。蓋望久自賊中招去也。申慶瑗朴震英盡帶其兵。進伏東郊。以備賊路。出西錄○夕時兩賊率數百騎。屯于訓鍊院。探報賊兵出京城出漢江。大駕陪慈殿。率宮眷奔公州。窘辱不可忍言。至廣亭站。湖西父老士民。以簞食壺漿。哭泣迎拜。上歎憫之。到公州住蹕。令兩湖兵分守山城錦江。○南原士子等聚鄉。議舉鄉兵。收衆望。以正崔荇爲大將。夜二鼓。兩賊潛從水口門遁。出西錄○十二日。賊兵由三田浦過廣州。殺牧使林檜。因取利北嶺路。元帥令鄭忠信柳孝傑

趙時俊李希建追之。體府留都鎮定人心。即日祇謁宗廟殿宇。都民爭殺賊兵及我軍。來獻首級。以爲免罪之計。或有因嫌而斬殺無辜。稱以賊兵者。元帥患之。即下令軍中。勿錄獻級者。惟以生擒爲首功。因張掛四門。曉諭嚴禁。爭殺之患止。而人多全活。元帥慮賊南奔。從銅雀津渡兵。以爲遮截計。鄭忠信等聞賊駐兵慶安橋。追及之。只柳孝傑趙時俊及軍官中馬健者二十七騎也。賊望見官軍至。疑有大軍在後。一時潰散。逆堤向廣州之照川。廷培向南漢山城。隨兩賊而渡橋者。只益獻等畧千心腹五六十騎而已。日黑馬困。兵且少。不得窮追。甲景瑗金完李希建等。夜後齊渡。方議追擊。南原炮手一人。自賊中逃來。具言賊狀曰。有星州把摠者。與哨官等相議。今夜欲殺兩賊云。翌曉鄭忠信柳孝傑趙時俊李希建等。帶畧千精騎。至利川墨防里。則賊徒已殺适邃梅明璉等九人。益獻守白等作一書。使林大坤傳報帥府。益獻等分路已向。行在所。明璉子潤及其姪子一人。逃命。逆堤到照川。自稱元帥軍官。欲投宿閭家。爲前縣監安士

誠所縛。獻于。體府。囚之軍中。漢南元帥沈器遠都監大將申景禎等。自水原至。以爲琨已僭逆。人得以誅。與體府帥府相議。縊殺于敦化門前。廷培亦被人縛獻。元帥斬之。因取以下○南原士子等聚栗塲。拜將建旗。約日勤。王。先定迎。駕儒生四十餘人發送。○賊賊至。行在。上親告于廟社。設廷試文武科舉。斬朴孝立以徇。罷諸道兵。○十九日。車駕發公州向天安。二十二日還都。三殿隨之。教中外大小臣僚者老軍民閑良人等書。王若曰。時運艱難。大逆猝發於心膂。國威燁燁。羣凶悉就於殲。誅慶懼之衷。綸綍斯在。往屬昏季。寔繁凶徒。三綱並隳。知晉國之將亂。多瘠罔詔。識周民之靡遺。藐茲。寡躬。承此危緒。謠悲萋草。誠肯弛於撫摩。政愧蒲蘆。仁未遍於施措。重因刑網之多漏。因致逆節之潛萌。逆賊李适韓明璉等。跡本蠢微。天賦桀猾。方債帥之熾肆。久稔蛇豕之腥。及會朝之清明。粗展牛羊之力。因緣兵柄。敢生亂階。陰連餘孽。指倉天爲可讐。脅驅邊民。窺內地之無備。創殘我州府。戕害我使臣。寇氛彌於畿甸。兵氣逼

於宮闕。雖知鵠起烏合。終就杞柳之誅。奈此鯨奔豕突。上軫長秋之慮。暫勞幸陝之駕。遂督屯渭之帥。先鋒所加。大憝相剪。清宮振旅。未淹一旬。亂領妖腰。即懸雙闕。茲實神祇之默祐。抑由中外之協扶。無妄之災。轉爲迓祥之日。有畏則警。倘是啓聖之期。宗社之休。寡昧何力。自本月十五日。味爽以前云云。於戲天所助者必順理。無陂而不平。大刑用早兵。豈。予心之所欲。陽春布德。澤暨一邦而維新。故茲。教示云云。○元帥自在西病劇之日。又患左眼浮腫之症。時屬初春。天氣尙寒。苦多大風。晝夜行軍。露處櫛風。殆過半月。賊平之數日。左眼遂至失明。出西征錄三月。錄振武功臣玉城府院君張晚等二十九人。張晚鄭忠信南以興一等李守一金起宗邊滄柳孝傑金慶雲李希建趙時俊朴瑋成大勳二等南以雄申景瑗金完李愼李休復宋德榮崔應一金良彥金泰圻吳珀崔應水池繼灌李珞李慶禎李澤李靖安夢尹三等上變人文晦李祐金光淑等。亦有追錄三等之。命。而副。體察使李時發從事官金時讓督戰御

史崔峴帥府從事官李敏求。均有討平大賊之功。而自上累有封典。宜簡之教。不許並錄。元帥陳達於楊前者再退。又陳疏者二。上終不許。其時陣上終始力戰。而未參勳籍者。別單書啓。安玢黃灑李元老安澈等七十餘人。並加資賞職。出西督修廣州南漢山城。發諸道僧軍赴役。秋七月。以李弘胄爲都元帥。傳曰。前元帥張晚出師之日。推轂以送。待之非不厚也。而殲賊之功。成於廟社淪沒之後。其自京出戰將士之備劣。誠張晚之福也。且元戎之任。所係甚重。而不爲交替。其所受兵符。令軍官偃然上送。欲議軍務。下諭召之。則又托以疾病。不爲上來。是何道理也。予甚驚恠焉。從重推考。以懲慢蔑朝廷之罪。○降光州牧爲光山縣。有賊緣坐人。
 九月。設式年科會試。山西病翁登進士第。○木花又大災。
 乙丑。仁祖三年天啓五年。
 春二月。三旬大霖雨。

三月。三旬霖雨。大風連吹。

夏四月。册封天使由海途出來。留京一朔。徵索不可勝言。該曹收布民結買銀數萬兩而不足。貸毛將銀七兩而用之。其後債米二千○順天大雨山崩。漂沒人家五百餘戶。人畜死者無數。○韓潤亡命投奴。謂弘立等曰。

本國盡戮爾等妻孥。願與我借奴兵復讐云云。回走回人傳朝廷給弘立妾子壽堂上。具儀入送。以示厚恤之意。兼探賊情。路梗不得達。

秋八月。妖熒恒見震方。○慶尙監司書狀。固城地雖雞化爲雄。軍威地牛產一體。兩首犢。兩縣呈。

九月。太白經天。○左遷仁城君琪于江陵。宣廟子也每出賊口。○設號牌都監。令八道計程遠近。限十月十一月十二月。畢成籍上送。丙寅正月初一日。始佩

牌。○毛文龍鎮居椴島。軍捻五六萬。位高力重。目處驕傲。向我國多有不測之態。西關將士。無不置疑。且常使人往來虜中。似有交通之跡。義州府

尹李莞直。啓。本月十三日夜。府尹登城上瞭望。越邊山陂裡有一堆燃

火。慮有大勢賊兵屯伏山外。即發軍。令金起雲等三名。同叅將易承恩軍人一名。乘夜渡江。詳細偵探。同日朝。有毛營將官李尙忠所遣探軍。於水口。名堡越邊。撞遇賊將佟哥。下騎軍佟宗義等四名。宗義自稱吾等投明自來。適遇官軍。可與同歸云。又有真獃三名。被鐵甲帶弓箭。各騎馬。外復有三匹着鞍馬。到乾川。名堡越邊。見有毛營撥幕。隔江叫呼。撥軍等渡江接看同來。自稱投明自來云。令譯學文孝男等問其被拿緣由。則如前所言。各稱寬尊長。奠沿江下來云。昨日青城所報。顯是此兩起之賊。而竊念此賊容貌兵器馬匹。俱非毛營探聽者所可捉拿。而自言投明。不爲相抗。從順而來。其情狀極爲駭異。老賊之所行謀。亦可知矣云云。一時呈同府狀。當日判官馳報都督行次。十四日早朝。自甲崑直向水口。暫爲中火。後雖至夜深而馳往所串止宿。因向鐵山。支持諸事。所串水口兩處分送事牒呈。審如是則都督不入本府。而由水口直向所串。佟哥人帶同真獃。公然越入我境。而毛帥急還蛇浦。情跡極爲可疑云云。十四日。平安監司狀啓投

順真獃渡江事。詳在於李莞狀啓而前。此毛兵捉拿之獃。不過打草打柴。庸下農軍。具軍器騎馬之虜。投順前來者絕無。而都督之行。中途而回。忙遽還去。必有其間事情。妄料我邊自此多事云云。○木綿花又災。

冬十月初六日夜二更。天地俱動。西方星戟。移時鬪亂。○十四日。乾方天動如崩。傳旨。令下三道兵使。率兵馬。解冰前境。上待變。明年二月罷陣○時天

災物。惟疊見層出。白虹之貫日。妖熒之侵斗。不可盡記。而關西有糖竿自柝。中有董旺春三字。人莫曉之。

丙寅天啓六年

春正月初一日。京中及八道大小人民。佩號牌。盜牌者。無牌者。斬。告者免役。一二品牙牌。三品以下角牌。生進黃楊木小牌。此以上後面烙印。品官儒生小木牌。大年號烙印。印前者書年歲居住。印後者只書年榜。軍民大木牌。年住身長疤記。大年號烙印。填色則宗室及文官紅。武青。南黃雜白。僧徒則南漢城立役三朔。受度牒後給牌。○洛有狂兒年滿十五歲者。不

佩牌爲人所告。將按殺之。供曰。誤犯重憲。死固當矣。但頭目別有用處。願斫舌耳而死。人以爲不祥。蓋指曙貴二字而言未詳

二月。號牌廳行移各道。人民當初如有未籍者。限四日追錄。正案已於上年十二月上

送此後稱加成冊

夏五月。奴賊移書于毛文龍云。大金國皇帝致書于毛大將軍麾下。自古國家興亡。皆天運循環。其將亡也。災異必屢降。各處兵起。其將興也。必天默護祐動而成功。昔日伊尹見夏數盡。去夏歸湯。太公見商數盡。棄商歸周。今聞將軍說我何必殺人。若不殺人。何人不歸。遼東原是先王之民。天乃賜我。我甚喜悅。益民益兵。又益錢兩。故南自旅順。北至開原。東自鎮江西至廣寧。皆撫養之。不任我命及兵差人。又有奸細來往逃亡不已。是其自取誅戮。非我誅之也。且自這邊倒爾那邊。將軍不爲自安。乃不分好。反皆入兵伍。逼勒驅來。各處殺死。是的殺邊。我原以誠治國。故自東海各處人民皆悅以來。又北關兀刺捆扒。與我對敵。箭射刀斫。猶不殺他。擒拿撫

養之也。昨征西虜。大興兵。所得不如自來歸順的矣。至今不斷。是亦聞見撫養慕恩來歸。若要殺人。爲何來歸我。我素謂毛將軍明智通達。何其昏然不知天時也。南朝運終。死數未盡。何處不爲殺死。其安邦彥嶠。安南國貴州泗川雲南廣西鄒縣各處。殺人死人。此豈非南朝喪亡之時也。天使喪亡。將軍豈救之乎。昔周運終衰。孔孟之聖。尙不能救。卒至喪亡。將軍悉知之矣。良禽擇木而棲。賢臣擇主而事。韓信陳平棄楚而歸漢。劉整呂文煥棄宋而歸元。此皆默識天時。擇主而事。名垂後世者。人何嘗說此不忠。自古天生帝王。不念仇隙。只念功德。管中桓公之仇也。不殺而相之。遂成霸業。敬德太宗之仇也。不殺相之。以有天下。今將軍竭力辦事。君臣反受禍患。邦有好處。南朝氣數已盡。此各處兵起。又丙辰年風刮防拔樹。及各殿樓脊獸。戊午己未玉河兩流血水。此非天示將亡兆耶。天運循環。賢良改事。將軍豈不知麼。時勢如此。稽欲措置。悔之不及。佟駙馬與遼東廣寧諸將。皆從陣上得的。今皆顯官。將軍若來。又非他將之比也。利害貽思。

量之天命。丙寅正月日。○忠清道結城海邊。古有石碑。今有七大石。自海中出。曳至碑下。○號牌廳行移。限七月初一日。又聽自首。○妖熒見於坤方。○建賊老酋身亡。第四子弘太住繼之。僭號天總。

秋九月。又設軍籍。以號牌廳因帶。限十二月畢役。查出牌案。白徒充軍保。民間極擾。○田穀大無。木花稍稔。○號牌廳行移。十月初一日以前。又有自首者聽。○遼將徐孤臣率數百人來。入昌州山城有年。因探報言于我

國曰。近日虜中。整頓兵馬。措備糧械。定有東槍之計。貴國預知防備云云。遼東今為賊窟。西邊守禦不可頃刻弛心。而今則孤臣族屬之在虜中者。見奴舉動。傳告甚得。我國聞以尋常以龍灣喉舌之鎮付諸無形。將以致明年兩道之全陷痛矣。天朝得袁崇煥為經畧。時年二十七。智慮深遠。用兵如神。

今在廣寧。多設方畧。臨敵策應。發謀千萬。優備火具。以逸待勞。撻奴大舉。累進。連敗而還。○定八道巡按。御史講汰校生。兼察籍軍事。○重建廣寒樓。此樓之設。未知何代。大樓小樓。俠仙堂。蓮堂。梨苑等閣。連雲羅列。復途往來。世稱南方名勝。丁酉之亂。一炬焦土。越二年。己亥。本府兼防禦。元慎。暫構殘樓。今已頽敗。至是。府使申鑑。重建大樓于廣寒舊基。

丁卯天啓七年

春正月初六日。諸道巡按。御史發京分下。○十三日。奴賊渡鴨綠江。進逼義州。先使人登南山呼曰。大金國二王府奉命征討。城中將士解甲出降。南土軍兵悉出歸鄉。不然鐵騎蹂躪。亂殺靡遺。是日府尹李莞被酒。不省人事。城中洶懼。固知所答。○十四日。賊兵陷義州。府尹李莞判官崔夢良死之。先是。莞久失軍心。人多向賊之意。及賊兵渡江。軍卒解體。初昏韓潤變着華衣。潛隨獵騎入城。至曉。賊騎圍薄城下。馳突肉戰。城中竭力防禦。賊潤焚火軍器。一城大亂。反氓開門納賊。城遂陷。李莞等被執。賊令分立南西軍。兵卒未解其意。各聚左右。賊盡殺添防軍。因烹李莞祭天。誘降夢良。夢良奮罵曰。禽獸犬羊。何為至此。隣國之道。果如是乎。賊大怒。亂斫殺之。即剃本土軍人頭髮。編其行伍。以盛其軍容。降卒見姜弘立朴蘭英。吳信男韓潤來在賊中云。吳信男。本道康津人。己未之役。以元帥中軍被虜。未還。○賊酋移書歸曲。曰。汝國有四條罪責。天可汗賓天。不即送使致吊。宣川之役。一不殺戮。不

即送使致謝。文龍我之大仇。而容接內地。給餉護恤。遼民我之赤子。而招亡納叛。一不送還。吾甚恨之云云。○以兵曹判書張晚為都元帥發送。○本道左右 御史到全州。因下康津海南。士民騷動。他道皆然。命諸道勤 王。賊兵自義州長驅而進。龍川府使李希建帶數千兵。守本府龍骨山城。同府座首者有內應之謀。希建棄城出。○十七日。賊兵陷郭山。凌漢山城。同郡守朴惟建定州牧使金禕等降。是日早朝。賊騎大至。巡城呼曰。城中將士棄鎮出降。大軍置而過去。城中答曰。受命守城。當以效死為期。賊麾兵進迫。輸入飛雲長梯。鱗次架城。多造藹人。列立於梯上。衆軍相雜。射矢如雨。城中竭力防禦。酣戰未久。軍卒殆盡。器具已乏。賊登城追逐。亂殺。檣惟建並家屬被執。乞降求生。一時剃髮。賊愛納其妻妾。常置帳中。行軍則使惟建等各牽其妻妾之騎。惟建等責其妻失節。妻妾還責其夫不忠。○賊兵到定州。搜聚倡妓樂工。歌鼓宴飲。○二十日午後。宣傳官過本府。府使申鑑接見于郎廳房。聞知西警。即傳令屬邑。發兵勤 王。本道左營本府為左營故有屬邑。 宣傳官

即向左水營。回舟船于西海。三道水營同然。○賊兵到處詐諭曰。今日之事。專為前王復仇。事或後。各道軍民。十年復戶云。此皆賊潤所為云。○佐郎吳暹檢閱金汝鈺正字辛應望學諭李尙馨。皆本道人在京聞變。通文于本道士子。右文為募軍募粟事。嗚呼國事至此。痛哭之外。夫復何言。此誠臣子竭力盡瘁之秋也。等隻手瑣力。圖報無路。只以一死為決耳。昔在壬辰之變。七路蹂躪。廟社西遷。惟我本道。幸得完全。忠義之士。如金千鎰。高敬命父子。崔慶會諸賢。咸能奮發。糾合義旅。推鋒爭死。通國家之命脉。成恢復之根基。三戶湖南。實是晉陽。至于今日。又遭罔極之變。推踵前人之武。以急 君父之難。豈非吾輩之責乎。念我諸君子。忠憤大節。素所蓄積。固不待人言。而以義相勉。不得不爾。伏願一邊募軍。一邊募粟。同心戮力。共濟艱難。幸甚。○二十一日。賊兵陷安州。副元帥兼平安兵使南以興。牧使兼防禦使金俊死之。前數日。城中聞賊兵日迫。整頓兵械。為死守計。軍總共三萬六千。胡騎先到。宣言曰。城中許多人物。可矜無辜。急速出

降。以圖生活。城中不答。二十日午後。大賊渡青川江。其數無量。列陣于城外數百步之地。使突騎巡城大呼曰。無罪南兵。開城出送。城中將士解甲出降。我且按兵以俟汝降戰之答。先是。諸將相議。城外及一路人家。慮為賊據。盡為焚火。及是賊兵言曰。人家至重。汝何自焚。因脅和甚急。城中以軍官稱中軍出門見賊。俾探賊情。二酋與弘立立坐轎椅。蘭英等平坐。賊酋曰。大金皇帝怒汝所為。遣兵征討。汝國何為號牌侵虐民人。不通信使。不修隣好。况此三里之城。數萬之衆。有何罪辜。而妄欲相抗。自取魚肉之患乎。汝國何不察天時。而敢與大邦為讐乎。急急出降約和。飲酒三盃而還之。諸將慴慄。莫敢言戰。金俊奮臂大言曰。君又待以爵祿。任以干城。為臣子者。所當竭力。捐軀報國不暇。奈何一朝臨亂。舉有偷生之計乎。即以譯舌登城呼曰。我國只知戰與死而已。本無降與和耳。賊曰。明日屠城。汝勿追恨。是日黎明。遠近烟霧不辨咫尺。賊中吹角鳴鼓。吶喊颯旗。萬騎駢進。雲屯雷擊。城中炮射。一時俱發。墜騎落壕。死者山積。前仆後入。左衝

右突。並驅駱駝。輸進長梯。一時登城。長槍短兵。彼此相搏。勢如風火。措手不及。賊滿城中。追逐亂殺。南以興金俊手持焞帛。倚營樓而立。亂射無數。衆賊一時圍抱。俊等無所為計。遂焚焞帛。屋宇騰空。以興及俊父子諸將皆燒死。賊兵之燹斃者。亦不知其數。賊盡殺城中人物。又搜括人于內外。幾數百人。驅至本陣。將盡戮之。適元帥府和書至。乃解而放之。行未百步。急招還之。軍卒惶惑。魂不付體。酋曰。汝何再生不謝退去。當罪無禮。姑置勿問。各還本土。安心生活云。時宣傳官奉命到城中。賊騎已逼。以興曰。奉命之人。不可在此。乃刺血書啓曰。孤城受圍。勢將難支。若有主將。督軍來援。則臣等庶免陷敗之患。而監司尹暄擁兵箕城。一日之程。坐而不救。臣等死而已矣云。宣傳官馳出。以此復命。方中軍自賊回來諸將畏怖皆懷姑息之計有一守令奮言衆中曰臣子之道

如益乎報國之地其在何處金俊聞此痛哭曰以此意激勵士卒還將士因
此益乎報國之地其在何處金俊聞此痛哭曰以此意激勵士卒還將士因
陷城節次而不知伊倅姓名可恨俊等在亂桑之際於解釋人生命雖盡
肌膚尚全賊而後州人認其屍斂而權窳賊退後載送本家而葬之以興
道京中古人本 ○以都監大將申景禎及具宏等領京炮手與畿甸軍卒把

守臨津江。○本道監司閔聖徵在全州。祇受勤。王教旨。分送軍官。督發列邑軍兵。○南原府使申鑑領兵數千向全州。○以沈器遠爲都巡檢使。金長生爲全羅號召使。張顯光爲慶尙號召使。募兵勤。王以戶曹判書李曙聚近邑軍兵。守南漢山城。召還各道巡按。御史罷號牌。焚其成籍。佩牌者罪之。且停籍軍事。去歲既誅無牌者今年旋罪佩牌人誰其尸之盡釋竄謫人。惟大北凶黨不赦。賊兵侵椴島。唐人之出島者多死。文龍移入鐵山身彌島。張晚到平山待變。平安監司尹暄在平壤。聞賊鋒已迫。不爲戒嚴。軍民盡散。朝廷有避敵之意。以金尙容爲留都大將。呂裊吉爲副。管領都城事。○二十四日。命都體察使定平府院君李元翼左議政申欽西平府院君韓俊謙及撫軍司諸宰。奉鶴駕南下。兵曹叅判李敏求巡檢使沈器遠統禦使柳斐東陽尉申翊聖從之。諭下三道兵使。領軍西下。以助臨津之守。諸將皆不用。命。○以金起宗爲平安監司。鄭忠信爲平安兵使。兼副元帥。遣都事拿致尹暄。○全羅兵會礪山。兵使申景裊抄率三千名

向京。其餘留鎮聽調。二十七日。大駕奉廟社主及慈殿中殿。避入于江華。領議政尹昉右議政吳允謙吏曹判書金瑬二相李貴叅判崔鳴吉金自點等朝臣皆從之。論中外大小臣僚耆老軍民閑良人等教書。王若曰。嗚呼。治亂興衰。有國者之所必不免。然究其所以致之。未嘗不由於一人之得失。方其事變之未作也。恬嬉偷安。敗度失德。上怒下叛。愆不省念。馴致禍敗。啜泣無及。循覽前牒。每用傷惕。不圖今日。乃蹈斯愆。予以涼德。遭罹否運。宗國將覆。不忍坐視。祇畏明命。臨莅崇高。夙夜憂懼。思所以保國安民。顧予明不足以燭理。仁不足以澤物。信不足以感人。武不足以制亂。發政圖事。動乖道理。賦煩役重。民困兵疲。甲子之變。逆豎反噬。廟貌顛倒。神鬼阡危。深思召亂。咎實在予。乃予不能懲創。違謬。愼愆舉措。德益日昏。政益日汚。天災物恠。式月斯生。衆謗羣譏。靡所不至。將帥失機。而予不知。隣敵伺釁。而予不覺。以致逆虜大舉。猝犯西陲。龍灣雄鎮。一朝陷敗。武鋒軍實。盡爲賊有。兇燹內侵。已過定州。豨突

之勢莫可沮遏。深惟宗社大計。兼採廟堂羣議。茲奉廟社主及慈殿中殿。入避于江都。倘賊漸逼。則予亦將遷幸。事至於此。更何言哉。嗚呼。播遷之辱。雖使百年一值。猶爲大變。予於四年之間。已再遭焉。昊天仁覆。夫豈酷。予靜言思之。莫非自取。蓋予當鼎革之會。繼大亂之後。不能布德行惠。大庇兆庶。失民之舉。非止一二。卽阼之始。有意民隱。蠲除之令。蓋嘗累布。而奉行不稱。實惠未究。嗷嗷塗炭者。其不謂予罔民乎。此予所以失民之一也。逆節累起。大獄相因。元惡巨魁。固宜伏辜。株連累及。豈無冤枉。一夫抱冤。足傷天和。況不特一夫者乎。此予所以失民之二也。西鄙宿帥。毛鎮督餉。行齎而居。遂斗會而箕歛。民窮財盡。外內繹騷。雖事非得已。而民何堪命。此予所以失民之三也。至於號牌之法。本欲補逃故之缺。除隣族之弊。而猝舉百年廢典。強束許多遊民。急於就緒。未免無漸。拊勒過嚴。程督太密。人皆言其不便。予獨難於中輟。積犯衆怒。誰諒本心。儒生考講。實非創始事。事倣舊典。亦非時宜。志雖有於勸

課。人反疑其苛刻。此予所以失民之四也。書不云乎。一人三失。怨豈在明。况予有此四失。危亡之至。非不幸也。亂如此。臘凶奴荐食。五廟蒙塵。慈殿出舍。無兵可以戰守。無食可以給夫。智者不能爲謀。勇者不能出手。瞻四方而靡騁。涉大水而無涯。永念時事。維其棘矣。雖然。天地有至仁之德。未嘗絕物。君臣有素定之義。豈忍棄予。今予將回心易圖。舍舊從新。召還諸道。御史急罷號牌。焚其成籍。凡前後坐號牌事。囚繫徒配者。悉皆宥除。以與斯民更始維新。括良丁以定諸色軍役者。仍存不改。各道籍軍成案。不在焚燒之中。咨爾中外士民。雖以予爲不君。獨不感列聖覆燾之遺澤乎。即予喪國。雖不足恤。獨不感宗祊之殄祀。八道之魚肉乎。茲以一紙悃悞。敷告多方。其各諒予此心。激仰忠義。奮勵股肱。或召集義旅。來赴行在。或鳩聚糧儲。轉輸軍前。各隨事力之所及。分義之當然。言非騰口。實出由衷。故茲教示云云。○教旨到礪山。監司令都事安獻徵巡讀各陣。以廳軍人。因騰書播告列邑。○都元帥承朝旨。使姜

朴兩家子持國書送賊中。見其父諭退奴兵。因探賊情。弘立答書云。伏承台手帖。慰謝懇切。不勝感激。僕頑命不死。只冀和事。而竟至於此。復何言哉。行間言及此境。一味開陣。以死爭之矣。今見兩家兒子奉國書。冒鋒刃前來。頗有果然之意矣。伏乞令兄穩當力贊。以舒廟堂之憂。幸甚。兵既深入。軍情甚銳。不可徒以口舌爭辨。特講真實好意。厚遺禮物。及賞軍之資。速退其帥。計之上也。至於慶吊一節。隨後講之。未遲。事機至急。想高見有以諒之。差使期於御前。親傳文書。欲知彼此一樣和好。此事亦至緊。可宜熟講善處。賤息一面便回。勢不可留。心焉如割。奈何奈何。伏惟令監云云。○弘立送平安監司書。台前上狀。體察副使麾下。事急除冗。全國二王府。要與我國講和。朝廷連送差官。再受國書。約和垂成。生民之幸也。今聞幕府暫任近邑。俾僕通之。願幕府早還本營。安集散民。大兵還時。秋毫無犯云云之意。甚美也。昂希幕府商量進退如何。伏惟云云。○祥原郡守許銓傳弘立書。伏惟台體萬福。全國無故加兵。恐非交隣之道。今

聞兩國請修舊好。生民之福如何。舊體府以平壤潰城之故。昨已拿去。新使時未致界。台札茲以完璧。不宣云云。○都事通文。比以邦運多艱。孽虜構亂。始潛渡於鴨水。終掩襲於龍灣。烈士繼而喪軀。孤城奄至於失守。國朝二百年所恃者平壤以西。賊騎數萬兵已迫於青川之北。凶鋒所及。列鎮皆空。屠戮我生靈。係累其妻子。蜂屯蟻聚。孰遏長驅。狼性獸心。輒逞深入。窺周有釁。謂秦無人。擒胡之月未期。入郢之日斯迫。慨神都之莫保。奈人心之易搖。惟我聖上。處諒闇之中。上年遭私內喪經逆變之後。啜粥哀疚。痛玉體之難支。當饋憂勤。仰彩眉之長蹙。豈料詬日之賊。敢肆射天之凶。念廟謀之失宜。致有今日。棄世守而奚適。事異前時。姑從周后之去。邠。勉導趙襄之歸晉。計非得已。事豈樂爲。尙賴中外之協心。庶期臣民之戮力。父在子焉往。實同父子之至情。君前臣必隨。蓋思君臣之大義。忍使百年右文之國。變作一朝左袵之邦。命輕鴻毛。甘瞑目於九地。跡寄虎吻。肯靦顏於一天。念我湖南之地方。素稱漢陽之根柢。人民之衆。甲於三

韓士馬之強冠於八道。粵在壬辰之歲亦多忠義之人。高敬命之誓師勤王。金千鎰之服節死敵。名存立石。事在旌閭。惟臣子秉彝之誠。正肝腦塗地之日。惟願諸公。毋替所守。各肩乃心。或發義旅與義糧。或出戰馬與戰具。如熊如虎。詎患勤勤之勢孤。乃積乃倉。可免澠池之糧絕。良弓勁箭。必須禦敵之要。血汗霜蹄。宜思行地之策。誓許國而畢命。指平戎而為期。功業豈不懋哉。爵賞非所論也。獻徵寸心憂國。斗膽愛君。懷五世報漢之恩。只欲許身一死。想七日圍鄭之辱。不忍與賊俱生。恨無能為。惟有慟哭。中流擊楫。徒抱祖士雅之孤忠。下江登舟。竊效溫太真之壯節。丹衷未泯。白髮何謙。故致尺書。毋違寸刻。鶴駕到公州。以沈器遠領兩湖遺軍。守本州山城。○北兵使尹璠南兵使邊滄。領軍進關西界。○都元帥領偏裨數百。退在松都。探警緩急。擬入行在。忠清兵使只率數千兵。屯在銅雀津頭。公州以上寂無一介將卒。號召使巡檢使。以本道列邑士子。分定召募官。募兵募糧。本府則以前察訪房元振為之。○黃海兵使丁好恕

守黃州城。賊報日急。軍卒稍稍亡去。好恕只率親兵數百向箕城。中路潰散。遣都事拿鞫。以李楹代之。○李希建出自龍骨山城。住在近地。埋伏討賊。聞金起宗來在境內。尋往同事。朝廷命削奪白衣從軍。希建常涕泣傷歎。每入賊路。窺覘討捕。期於自効。一日乘醉而出。金起宗力止之。希建曰。罪大功虧。當以一死為限耳。遂策馬而去。至肅川境。為零騎所遮死。其後公安義謂病翁曰。今聞李希建討賊于肅川。為零賊所害。云希建之勇。余所詳知。龍骨之潰。雖出於勢不相敵。而被殺於小賊。決無是理。病翁對曰。兵家勝敗。不可以勇武論之。失勢則雲長死於馬忠之手。令公慄然。移時為之太息。○夜書沈檢察館壁云。檢察威名冠海東。錦江閑臥醉春風。遮嶺掘灘何等事。路中多路路無窮。

二月初一日。本府士子因通文聚會龍館城。議舉鄉兵。累日募括。僅得百餘名。皆是儒生。白徒無用之人。糾義勤王。百爾難形。國事至此。無復所望矣。嗚呼。或把守關防。中與之。此壬辰之亂。官軍雖潰。義旅雲報。或托首勤殺賊。則無以生問巷士民。至有賊犯境。先思姑息。聞招募。則毀謗而譏。至見徵。則有幾人。怒秦瘡。越視廟社。寄避會無一息。聞招募。則毀謗而譏。人之心。非古抑。亦國運之秦瘡。越視廟社。寄避會無一息。聞招募。則毀謗而譏。呼痛哉。國事至此。無復所望矣。

陣。劉海等一時還去。海本遼人。投鋒奴賊。爲二王子之婿者也。撫軍司聞都城潰空。以賊兵已渡臨津。欲離全州。向左水營。仍航海之計。完平以爲如此。則人心離散。終難爲國。姑待賊入都城。以爲移避之舉。未晚也。世子從之。賊兵陷昌城。府使金時若死之。初時若聞變。蒼黃與疊入諸將。措置守禦之具。士卒恟懼。日漸逃潰。偵探之人。去而不還。賊報斷絕。緩急莫知。義州之賊二百餘騎。不意突至。屯于城外。宣言曰。汝國盡爲陷沒。國王亦不知去處。汝以一隅孤城。數少殘卒。敢拒大國之衆乎。急急出降。以活人民。城中不答。胡騎又到門外。督令出降。城中納之。厚待以送。因以軍官出門。權辭答之。賊亦饋酒還之。是夜軍卒縋城走出。時若令軍戒嚴團束。城中一時倒戈。時若無如之何。謂諸將曰。老夫守土。當死封疆。汝輩任意去留。零星將卒。踰城盡散。賊兵追奔亂殺。馳突入城。時若及他守令。被執者多。賊解縛誘降。時若終始不屈。生致義州。殺之。二子即日剃髮爲奴。本府入防軍三千名。見賊百餘騎。惓惓自敗。天耶人耶。尤可痛矣。○

十二日。余與房元震同宿南門外冶匠漢雲家。商議軍機。期以明曉發鄉兵向全州。夜半城中謬呼騷動。急令探問。鶴駕今發全州。明過任實南原向順天云。翌日閤境人民。以賊兵已迫。恟懼奔走。埋藏家蓄。避入山僻。因監司分付南原客舍。排造假家百餘間。修理閤家數百戶。督捧烟家乾草。順天一路。發差修途。繼聞賊兵時在平山。胡差出入江都。鶴駕因留甄城云。○大風雨。江都舟船。撞破無數。漂失者亦多。人或有淪死者。○十六日。臬示尹暄于江都市。丁好恕鏡城安置。○十八日。小朝設庭試。只許兩湖人。取文四武六百。在家而參榜。居喪而登第者。亦多矣。○二十日。劉海又自平山入江都。索見天顏。親開文書。上不得已從之。行揖禮。來胡一人。乃鐘城投民朴仲男也。一樣他奴。恬然對揖。知之者曰。汝以本國之人。甘受上禮。是可忍乎。答曰。今不可以臣民之道責我。少無難懼之態。劉海書示云。不佞漢人也。暫處夷地。心原無傷。學雖賤陋。大義不忘。豈以一時之流離。而失持危扶顛之大義。今貴國民遭塗炭。少有人心。無不痛

淚。況不佞素懷慈悲者乎。智不能救貴國之急。而言語文字之間。用力多矣。貴國何以知不佞之此心乎。今來要講數款語。以完和事。竊効古人解難息紛之義。捨身命而不顧。意以貴國王知我也。詎知執一見而不權變。信少節而不時務。似非豪傑之遇亂也。吾聞貴國王明見萬里。獨斷衆論。若能屈一時之辱。必申長久之策。是得強而避之之道也。豈不美哉。今者農節在邇。民或逃躲於山林。或潛藏於海島。或家業失散。或兄弟被擄。日皆引領望一和字。今貴國王爲一接見之禮。而不念少民之塗炭。獨何忍哉。吾恐金人心術不正。再爲一激。勢必下。王京。王京一下。危若累卵。不惟就近四部道受害。八部道民生亦不安矣。機會一錯。禍不忍言。不佞身處微賤。寄栖他邦。自愧不暇。何敢與貴國王講禮節哉。若以此爲常規。慮不佞必爲貴國謀之。不通隻字。冒瀆乞三思之。倘不我信。於今告辭。胡差魯去。天啓年號。且要。王子爲質。朝廷答以。王子年幼不得赴約。以宗室原昌令。義信都正備之子也爲君稱王弟。李弘望爲通信使。禮單木綿三百。

同。白苧布三百疋。虎皮百令。豹皮百令。以牛峯縣監李祥龍爲差使員。發金浦通津。等官人馬。載送賊陣。○兩西軍兵。或因城陷。或以鎮潰。已盡逃散。尙未招集。南北兵使領率兵馬。來在關西。亦無戰守之地。江原京畿兩道軍兵數千。潛伏於瑞興平山之間。亦未出頭。賊在平山等處。四散搶掠。回答使入去後。亦無黑白。弘立因留。行在。蘭英還賊探聽。賊宣言和事雖完。如留平壤。待草長後回去云。有旨。統營船艘。姑勿上送。各道號召使所募軍兵。勿爲發送。皆以糧餉代納。朝廷和議已定。人皆痛恨。司諫尹煌啓曰。我國無名之和。請於賊。是果不降乎。傳曰。尹煌發啓恟慘。降字問啓。惶回啓曰。臣言不是。請斬臣頭。傳曰。削奪官職。兩司爭之。還爲復職。咸鏡監司南以興。以永興府使李穰。領兵勤。王穰未至。朝廷責以恭不赴國難。觀望成敗。以恭誘於穰。論啓處斷。○黃海兵使與海州判官李翻。文化縣令慶信。後鳳山郡守羅德憲。新溪縣令李以省。率軍三千餘名。屯聚新溪。賊騎數百。不意突至。軍卒一時潰散。李楹以下俱被執。信

後獨當射賊。力屈被害。德憲不知去處。○尹璠等在關西僻邑。啓請討賊。傳曰。定和間停打。○唐船來泊殷栗海洋者甚多。意者毛營老弱之避賊者。○黃海防禦使趙悅狀啓。當日探報。賊兵一陣平山地長所毘。一陣平山鳳山載寧三邑地境。青石豆等處指向去。○摠戎使尹履之狀啓。當日探報。賊兵一屯平山地長所毘。大陣平山地秃豆冬乙。一屯瑞興館坪。分三留屯。遊騎或五六十。或二三十。僅出一息內。閤閤掠取牛馬穀食及女人。怯掠時不射。則不殺人。係累驅去。滅壓山人多避入。數三胡騎出來。押一女強姦。其夫射殺二賊。一賊生還本陣。舉兵環繞其山焚之。戮盡其中之人。且搜搶平山瑞興等處小兒。以弓弦貫掌。所見極慘。○平安監司狀啓。卽見价川假守金雲龍馳報。安州附賊人金德鄉處。姜弘立分付云。兵勢堂堂所向無敵。一邊開諭奴民。一邊春牟還上。斯速分給云。初九日。德鄉還上分給。聞其所爲。極爲痛駭。昨日傳令于金完。帶同所領牙兵。斬殺德鄉後。其餘百姓。並爲治罪事分付矣。此賊謂關西己。八道內所經各

官。皆以我人定將留守。平壤則前萬戶姜貴龍。安州則僉知金德鄉。定州則時任座首稱名人。宣川則將官鄭士良。義州則千摠崔孝一。皆以賊之假將。信聽降將復讐輕徭之說。聚會人衆。專以殺掠漢人。劫奪民財爲事。封閉倉庫。守護賊物。以此愚民爭相投入。德鄉時方行用牧使印信。號令一邑。受令旗於弘立。張諸城上。往來之賊。永不入城。偵探之人。親自目覩。諸處文報。如出一口。極爲痛惋。平壤三縣人心。自貴龍之臬示。稍似鎮定。德鄉亦可及時臬示。以明附賊之罪。此賊懸軍深入。後無連營。乘勝長驅之勢。必能不久。所掠婦人玉帛。運入凌漢山城。設威退兵。其意似在割據。青川以北。而凌漢之賊。其數亦不滿千。若以騎兵襲擊。則大賊撤還。其勢尤易。而自此相去。非但道里遙遠。凌漢城堅地險。拔之甚難。加以道內人心極惡。陣中之事。卽通賊中。萬無四五日行師潛襲之理。十餘年勞民動衆。築城備器之功。反爲今日賊兵入據之堅壘。可勝痛哉。遮截江灘。使賊不得來往。相機勦殺。則後兵不至。賊勢日孤。庶有大賊撤兵之理。且使祥

原郡守許銓別將安夢尹把截江口。又別將安澈助防將崔應一領將丁大全平壤庶尹柳秩持官方敬男李忠白江西哨官李時說等皆自願出戰。其誠可嘉。使之各帶牙兵。或據險阻。或遮江灘。以爲勦殺之計云云。行在所糧餉不周。人馬飢乏。將有所不忍言者。五六日四道運糧相繼至。西湖則各於稅倉輸納因船運而去○江都設科。只取江華喬桐豐德之人。○二十二日。劉海又來。決言退軍。而海州延安白川等地。擄掠日甚。且脅去天啓年號。累日爭詰。海曰。如中原揭帖。元不書大年號如何。我國不得已如其言。不書年號於國書。海持來胡書。大金國二王府致書于朝鮮。國王麾下和好兩國之言無盟誓。何其信其和。貴國王慳滯不誓。是言和而實不欲和也。吾豈不知也。近日兵器有備。士卒有鍊。必欲相戰。以較勝負。若然大丈夫之事也。即還令弟與大臣約日會戰。或勝或負。再定盟約。亦不遲會。倘貴國王意欲真和。請速爲盟約。兩家罷兵。生民之幸也云云。翌曉胡差接待宰臣啓曰。天明劉海招張禮忠。要言莅盟之事。以臣等所指教之言答曰。

既送王弟。無王子莅盟。自此又爲國書。以約和事。此外有何莅盟之事。而又爲此言也。海言於郎胡。郎胡艷然曰。如此則和事不可成云。彼若陽爲肆語。以爲試我之計則已。一向牢執。則臣等以大義斥之爲計。即刻郎胡使朴冲男偕胡差請見臣等。臣等雖見之。此不過莅盟一事故。臣等以不可從之意。痛說於朴冲男。使之開陳於郎胡矣。且昨日揭帖事。劉海始密言於張禮忠。昨日席上見小紙後。又潛言於張禮忠。臨罷又發端。臣等見之無益。但當以義絕之而已。令廟堂急速議處。且胡差等求見弘立。弘立即即起送何如。傳曰依啓。備邊司啓曰。以接待宰臣啓辭。胡差所言莅盟事。令廟堂急速議處事。傳教矣。莅盟一欸。既非二王子書中所言。胡差來到。初不言及。今乃提起。必有所以。今當以既送王弟與二王子同盟。差官之來。又要蒞盟。必無是理。使接待宰臣據理斥絕。雖和事不成。斷不可從之意。答之爲當。傳曰依啓。二十四日。體府別將李繼先平山探報。賊兵三營移陣同府西峯向二十里。再昨平山大陣及原昌君一

行。與大臣禮單差使員等。並由西峯間路。轉向平山西北面禿里等處。一枝兵自西峯向麒麟。一枝兵昨日自平山向朱岩。平山留鎮賊。盡撤去云。差胡欲與姜弘立同往賊陣。與二王子相別。故當日一時發行。○二十六日。元帥狀啓。出身任得平山探報。本月二十二日。賊兵已撤。蕩然無遺。只少女人七人病棄。通津金浦人。胡中贈物載去。二十一日。大賊到鳳山。南面草丘結陣。捧其卜物人馬。放送大路。芻糧已盡。由間路漸次退去。臣昨到開城府五里許村家。劉海尙未還去。此賊前所要臣相見。到此別無可接之事。待其還去。前進計料。○平安監司狀啓。鐵山府使安景深。妾子得只其父推尋事。往鐵山回來。到龜城云。屯兵據青龍山城。義州及凌漢之賊。合數千。進攻青龍。炮聲終日不止。俄而賊兵大敗。僅餘數百退走。元無戰守之地。此必鄭鳳壽之龍骨城。而得只所聞誤也。慈山郡守李廓馳報。昌城衙前崔確言內。天兵已與遼東賊接戰云。平壤衙前姜貴龍言內。遼陽有大事。賊兵不久撤去。私相語之云。○忠州牧使申竣探報。平山留鎮賊兵。盡爲退去。而取

路麒麟。不待江都入去。差胡之來云。○兩西贊畫使成俊裔狀啓。軍糧一千八百七十一石。人蓼六十斤。上送云。從事官雀惠吉押領其所載船。同日江都入來。○原昌君在賊營病重。朝廷遣中使羅山業問安。兼探賊情。○劉海與姜弘立還本陣。途中回書云。昨不佞以和事必完結。欣慰而來。誰想來到開城府北。遇見前日差去二名金人。回來說。國王既不發誓。就是不願講和之意。等何糊塗。以了事塞責。叫不佞速回。則國王處當面立誓。方纔完定。不然送還。王弟。竟到王京。如此無禮之說。怎麼回去。復有何面目以見貴國之人。不佞連夜差人。將國人委曲之情。傳達二王子。未知如何。但此國之人。人面獸心。難爲憑信。預知。貴國王。撤原谷城村館。速將糧草。轉送于空地。處理窖。人與馬。逃躲于深山遠島。在將草束燒燬如此。馬無所秣。人無所掠。不去半月。勢必回兵無疑。若二王子依我所言。回兵三四日。另有和字。此盡心之言。乞。國王裁處。勿爲細故慮也。○摠戎使狀啓。二十八日。出身金弘男。隨問安中使往虜營。即夜還來言。

賊兵大陣。時在平山地。秃丘先鋒三百餘騎在鳳山。劉海姜弘立今又再入江都云。平山近處賊屯處。顧見則閭閻屋舍。盡燬炊飯。無餘一間。被擄大小女人。赤脫裙衣而棄之。乳下赤子。匍匐空地。哭不絕聲。殞命者亦多。又常漢出入秃兵賊陣。奠云欲往延安白川。延白有何所產。程途幾何。答曰。道遠地薄。馳馬不便。但有穀食。無他寶貨。酋曰。不必強往。此處亦留六七日云。○備邊司啓。即見弘立飛通劉海之書。其爲變詐凶狡之狀。有難測之。而不無兩差復來之患。尤極慘痛。武士中解事二人。急急馳送于弘立。問其再來之由。爲先馳來。以憑預處宜當。傳曰。依啓。○金自點尹知敬等不叅於議和。願守臨津決死一戰。崔鳴吉等以爲量敵料已。兵勢既不相敵。又念將領無一介可與賊相抗。與其挑怨。無寧許和。滿朝蹙蹙莫敢言其得失。○胡書又來。劉將幹事去後。意謂和好已成。更無他意。來使又將書到。大與初意相違。是貴國實是誠心講盡無端。殊用訝歎云。答書。我國事皇朝二百年受思深重。義不可背負。前書已盡道了。今不

容他話。惟貴國諒悉。○二十八日。姜弘立劉海與胡差十三人。又入江都脅盟。

三月初三日。命宰臣與奴講盟。築壇于江都西門外。夜半彼此會于壇上。刑白馬殺烏牛。祭天約誓。先講國誓。金國誓文曰。朝鮮國王與大金國二王子立誓。我兩國已講和美。今後同心合意。朝鮮若與金國計仇。整理兵馬。新建城堡。存心不善。皇天降禍。若二王子因起不良之心。亦皇天降禍。若兩國二王同心同德。道公偕處。龍天保佑。獲福萬萬。丁卯三月初三日立誓。我國誓文曰。朝鮮國以今丁卯年甲辰月庚午日。與金國立誓。我兩國已講定和好。今後兩國各遵約誓。各守封疆。若我國與金國計仇。違背和好。興兵侵伐。則皇天降禍。若金國因起不良之心。違背和好。興兵侵我。則亦皇天降禍。兩國君臣各守善心。共享太平。皇天后土。嶽瀆神祇。鑑聽此誓。賓廳製進又講私誓。朝鮮三閣老六尙書。與大金國八大臣南木太。大沉漢河世兔。狐山太托承。害且二革康胡金薄二斗。朝鮮大臣等。若與金

國計仇。一毫不善之心。如此血出白骨現。天就死。若金國大臣等。無故因起不良之心。亦如此血出白骨現。天就死。二國大臣。各行公道。毫無欺罔。歡飲此酒。樂食此肉。皇天保佑。獲福萬萬。胡差行彖。朝鮮與金國既已講完和事。自今以後。兩國各守封疆。不許計仇。永世相好。有違此約。皇天降禍云云。是日辰時。海歡喜回歸。弘立亦與同往。刷還被虜男婦。毋令所過搶掠。然後還來。先是萬曆壬午癸未。間有里謠亂國者。東人亡國者。西人爲國而辱人。無乃是耶。○平安監司狀啓。李廓安澈。李元吉等。合軍渡江。擊安州之賊。賊兵計窮。驅馬入水。溺死者五六名。左斥候李忠白射殺一賊。奪馬而來。七賊又溺水死之。自此以後。安州平壤。連營相絕。大賊時留鳳山地。以餘騎出掠百里之外云云。○義州留屯之賊。以其州民定督農官。五家給一牛。使之耕種云云。○平安一道。全無保守之地。只成川一府。距賊稍遠。列邑新舊守令大小將士。皆會于此。朝廷以姜弘立勸賊渡江。賊稱平安一道。戰而得之。乃是天與之。天與不受。反受其殃。和事雖完。大同以西。

決不可還給云。故其在海西。搶掠不已。至於關西。不甚侵掠。使其民人安居作農。箕城留賊三萬一千五百餘名。各帶美婦女三四。大作農事。其他各邑屯據之賊。有徒寔繁。似無面巢之意。至念後箕城之賊。燒蕩官舍。撤歸安州云。○嶺南士人李惕然入行在。痛哭陳疏。願斬主和之奸。書三上不報。迺命東班叙用。除受別提。惕然辭還。○對馬島聞我國有胡亂。貢獻烏銳三百箇。長劍三百柄。焰焰三百斤。因請赴援。○賊兵退向安州。鄭忠信尹璠等結陣示威。賊先以突騎馳繞我陣。招陣中大將璠等不敢拒。進旗下。酋曰。約和退去。汝是何人。勒兵相對。答曰。守土之將。不得離境。姑待命令。豈敢爲戰。酋曰。雖已定和。汝兵甚盛。兩軍一交。以決雌雄可乎。答以不敢。酋盡釋之而去云。○鐵山前縣監鄭鳳壽聚軍討賊。初諸城瓦解。士民波散。父母妻孥。人皆不保。鳳壽招募散卒。聲言復讐。聞者樂從。願効一死。遂整軍埋伏討捕。前後斬殺。幾至累百。事聞。陞堂上除授嘉山郡守。自後應募日衆。軍勢漸盛。備糧繕械。入據龍骨山城。義安諸陣之賊。累

進累却死者無數。一日各處之賊合勢大進。圍而攻之。連日未決。賊中三將率數萬兵。潛從城後險處。擬攀登攔入。鳳壽先知其謀。令精砲三十。秘出城外。埋伏草間。教不窺軍卒。只候三將各放十砲。三酋果立馬岩上。督軍緣城。三十精砲各向所指。一時俱發。三酋墜馬轉崖而死。所率軍卒。驚駭散走。四合之賊。棄曳亂潰。鳳壽料賊雖敗遁。必不遠去。以瞰我軍。令軍毋動。使之經宿後收級。援賊兵六千。果在五里之外。鳳壽夜發輕騎數百。掩襲亂殺。賊求死不暇。四散而走。死者相接。三酋以下酋死者亦多。翌日詳探賊蹤。放軍收馘幾百級。即遣幕下士張逸。陳疏獻馘。上大喜。賜鳳壽爵嘉善。陞受龍川府使。兼本道防禦使。金完以下諸將皆受節制。問張逸身役時在甲士。除受堂上而還。金景瑞在虜中未死三日。謂諸酋曰。汝等欲往我國。若有鄭鳳壽爲人爲將之處。則切勿侵犯云。景瑞龍崗人。必曾知鳳壽之有將才也。○初七日。罷公州陣。令軍歸農。○胡書。大金國二王府通告于朝鮮國王麾下。昨日來書札內云。三路分兵。擄掠我民。前因

各處殺差往人役。故此報復三云。既已盟誓。又散兵搶掠。天地神明。亦豈不致怪于貴國乎。天爲何怪我。我要親蒞盟以後。不遵盟約。天必恠我。貴國蒞盟之後。先就背盟。殺我差人。天誰恠歟。我不想如此。與我天賜王京與八道。有意于我。在此爲王。我不肯居。還留與貴國。只說外呼我爲兄弟。內感爲父母。如此呪罵。有是禮乎。貴國莫說。我已在島中。其奈我何。我一到王京。八道蓋屬于我。雖在海島。水能爲田。魚能爲民乎。跟隨大臣以我兵速回。故暫時共離。倘我效箕子在此爲王。所跟大臣各戀房產。豈不說王來降乎。聞說國王多知事之人。我如此相待。如何不以好念我。况前送來禮物。又不如數。又不是值錢的物件。我只說不拘怎麼完了事就罷。把我當做卞不知道世事的。我怎莫不知道。年年進貢南朝。其欺數與不得我。說邊也不腦了。既差人遠來。已十五日。平壤地安州一帶地方。僅如命矣。此後賊兵盡渡青川江。○熒惑守巽方。○十三日。鶴駕發全州向江都。扈從諸臣或是置家眷而去者。○二十一日。罷臨津防守

軍。各道之兵及自江都分付而來者

夏四月初六日。放各道勤王兵。○初十日。大駕發江都。渡江宿通津。十一日次金浦。祭先陵。十二日還都。○三司合啓。張晚既帶都元帥之任。手下雖無軍卒。所當身先賊頭。指授諸將。以效一死。而賊在數日之程。先自逃竄。深入山谷。有若婦人女子避亂者然。累次下諭督戰。一未常與賊對壘。窺回謀避。猶恐不密。元戎之職。果如是乎。請命削職遠竄。不允。又合啓再三。乃命奪職。中途付處。命甲子年逆獄冤死人查覈申雪。領相奇自獻叅判柳公亮李愔僉知玄楫等十餘人。還授職帖。盡釋家累。○賊兵圍龍骨。累戰連敗。乃退去。鳳壽出兵進擊。及於義州境。斬殺百餘級。奪馬五十餘匹。收兵還鎮。論功馳啓。爲邏胡所獲捷書未達。○撻奴送差恐喝曰。講和之後。渝盟用兵。是何道理。答曰。講和後金兵不即渡江。留在我國。搶掠不已。本道之人。奮發復讐。既非命令。又難禁抑云云。奴與護送官李弘望相議。刷還被虜男婦萬二千餘名。金楮朴惟達等夫妻。並與於

此。胡差押來求索倭刀五百柄。金楮等降賊論罪。六鎮充軍。朝廷密諭鄭鳳壽。賊奴含憤。必欲攻陷。大舉專力。事極危難。姑暫移避。以待大賊過去可也。回啓曰。添兵繼糧。可保無虞。金起宗從而陳啓。命添補糧兵。俾壯軍勢。○安州募兵等。生獲真獐一名。上送。朝議以爲一賊有無。不關勝敗。還送賊中。以示和好之意。若賊兵已去。則追送可也。○副元帥啓。今聞探報。賊兵未久渡江。以蒙古兵數萬。留守義州。日後毛將有夾攻之請。則何以答之。敢稟備邊司答。毛將必無是請。後果有之。以我國新敗塗地。瘡痍未起。勢難整頓。隨征。然何不爲聲援之勢乎云云。答之似當。○大霖雨。○二十八日。血雨。草木皆染。○奴賊又圍龍骨城。初賊兵之留義州者數萬。橫行於宣郭之間者亦多。合攻龍骨城。連日戰敗。猶彌漫不去。龍骨西南。距海二十餘里。鳳壽令人乘夜縋城。告急于毛營。毛將密以舟船。繼援糧械。山城賴以支保。我國諸將之觀望於要關者。亦欲助援兵糧。而陸路遮隔。無因傳致。朝廷亦無一人出師聲援。噫。今之龍骨。昔日襄陽。雖至

六年無如之何。城中健兒七八千。老弱男女元數數萬。設若彼賊久圍不解。我國兵勢既不能及。毛營繼援亦不可恃。則城中之人何以爲之。舉一國專力進援。則我軍豈獨盡死。而虜兵豈能獨生乎。乾綱解紐。國體無形。主和之人不貴戰。猜功之人不喜勝。靜言思之。誠可痛哭。○大賊渡鴨綠江。留在義州。侵攻龍骨山城者。蒙兵三四萬騎云。○姜弘立朴蘭英代質其子。因在本國。兩人母死在數年之前。告哀追喪。吳信男無子。不得代還去。我國願留韓潤。賊不聽。天朝遣太監胡良輔等四人。或提督。或稱總督。各帶軍兵。已爲辭。朝出來。牌文到境。本國以李尙吉爲迎慰使。送檄島。蓋天朝聞我國事。送來近臣。俾詳實狀。兼探賊情。○義州校生白光宗告曰。賊兵二千餘名。又自鎮江渡來。入義州。○副元帥書曰。賊兵數千。自義州由嘉山定州即還。蓋嘉山地有海倉米太餘存。此賊輸運而去。五月。遣陪臣權怙。將奴賊陷沒二道。國王播越海島。因脅和等情。奏聞于帝。○毛鎮軍卒乘彼賊有無之隙。縱恣殺害。剃頭作獐。以要功賞。我

人被害。不知其數。女人及老弱。益不保生。朝廷使接伴使諭之。文龍托以不知。下令嚴禁。○初三日。三殿發自江都。翌日還宮。○大霖雨。○劉海領數千兵。與昌原君出自胡中。渡鴨綠江。列置軍兵于一路。率家丁數百。直到京城。吳信男亦來。命宰臣迎接門外。海以自上不爲親臨。怒詬痛憤之狀。目不忍見。留都累日。羣胡馳馬橫行。蔑如之態。莫有限量。上不得已接見。設爵酒酣。海願與天顏相接適口。上問弘立。對曰。胡人大盟也。一適則平生不負。上曰。然不可從。使弘立諭之。海請與上扣背。又問弘立。對曰。此亦一誓也。上從之。弘立蘭英在虜中娶女。皆劉海妻弟也。本以遼人三兄弟。曾投建州。爲貴榮介之養女。所謂二王子之婿者此也。及出遼東。酋各給遼民五百餘名。以備使用。至是海率兩女出來。前給遼人男女皆從。京中無給餉之路。乃分送各道大官。南原來者二十名。姜朴兩女此時皆言劉海妻弟其後海出。毛鎮軍將擇一女給海云。前言誣矣。天朝聞劉海本以遼人投奴助桀構亂天下。謂下列國設賞購捕。獲劉海者。勿論中外人。即除荊州刺

使加銀百兩。胡毛諸將調探海出來。分路偵候。且密帖我國。尋其去處。六月。賊兵回巢。龍馭還都。國儲燒蕩。軍需無形。玉堂啓請。民結收布。以補需用。上以亂離中民亦瘼矣。不允。備邊司通文于京外借布。其文曰。目今賊兵雖退。而留屯境上。毛將挑釁。勢將渝盟。危亡之禍。迫在朝夕。此時治兵繕甲之計。有同臨渴掘井。雖不可及。而亦不已也。經亂之後。國儲蕩竭。譬如貧窶之家。粥飯難繼。尙何望其意外之需哉。欲治兵則無糧。繕甲則無財。顧瞻四方。靡所着手。儒臣之建策。本司之准請。蓋出於不得已也。當今之勢。君臣上下。內外遠近。同陷胥溺。必須賢者死於邊。有財者輸之官。然後此賊可滅也。朝士大夫受國厚恩。雖有貧富之差。而隨力出布。寧有怨苦之心哉。雖非朝士。而儒生兩班之不爲負羽從軍者。誰非國家之恩澤哉。聖上之不允此請者。實出於悶念羣下之至意。而臣子之義。國家危急之日。亦豈得晏然而已乎。臣等私相通諭於京外朝官士大夫。隨力出布。以補萬一之意。敢啓。答曰。知道。諸卿憂國之誠至。

此。予甚嘉之。事傳教矣。今此出布不得已之意。已具於啓辭中。不必文言。是在果。京中時任宗親文武官。則依定式出布爲乎矣。如有加出之勢。則不必拘於定式。如無準備之路。則亦不必須盡其數。至於前御儒生兩班之不爲兵者。及百姓商賈胥吏中自願出布者。亦不限其數。隨力所及爲齊。外方則監兵水使守令邊將。毋論職之高下。惟視力之厚薄。勿爲侵及民間。自官中隨便措備。勿拘多小。上送爲齊。諸道內。前朝官儒生兩班之不爲兵者。及百姓商賈胥吏。亦一依京中例。各其守令以本司啓辭之意。通諭施行。各其所納人職姓名成冊。以其所納之布。給價雇馬。官人別定。上送爲齊。此事稍有知識者。所當爭先辦出之不暇。而如有不肯出者。切勿勒定致有怨言。事關是置。國家休養生靈。二百餘年。不幸至于今日。王室板蕩。寇奴憑陵。國家豈不知按給收布以爲之用。而聖上悶念羣下有此舉措。其情感矣。是置。凡在大小臣民。一依關內辭緣施行。胡良輔與毛將率數千兵。覬賊于灣上。賊騎數十。揮劍追殺。毛兵敗走。

入船之際。淹死者多。○設各道各營營將。○義州留後之賊。卷兵渡江入遼東。

秋七月十三日。大風雨。禾穀損傷殆盡。過三日見之。禾穗似經霜雪。○方賊兵寇西之日。大賊充斥廣寧。廣寧等鎮。又爲袁經略所敗而退。○姜弘立還土之後。漢女又來。所率亦多。轉成心恙。因致殞命。毛將聞之。推其女而去。○遣朴蘭英于胡中。探賊情。○以嚴愧爲義州府尹。○獐奴以講和之名。姑盡撤去。而托以開市。往來不絕。八月天啓皇帝崩。弟信王即位。改元崇禎。

九月。大無年。以七月風災。百穀不稔。因此凶荒。以致明年春夏莫大之饑。○妖星又見。終夜流彩。光芒日新。累月不滅。○毛營探報。胡太監詳探奴情。及本國脅和實狀。還中原。二十八日。江原道橫城人李仁居。聚徒黨百餘名。突入本縣。結轉主倖。發出軍器諸具。爲犯京之奇。原州牧使洪震直疏上變。因發兵措捕。

冬十月初二日。洪震發原州。分三路進攻。仁居四父子及黨類俱被執。事聞。朝中慮其寔繁。徵發近地軍兵。分守要害。督京城戒嚴。發遣宣傳官于三南。整軍機械。以待警報。江原監司崔峴。當初聽仁居。面陳逆謀。置而不察。橫城之變。亦不馳啓。自知所失。竄身逃匿。發遣三廳衛士距捕。方仁居作亂之日。上疏大槩。臣有精兵數千。請先斬主和之奸。以清君側之惡。因奉 聖旨。往征虜穴。以雪國恥。因朝旨三南兵使。領兵境上待變。○崔峴被拿囚鞫。仁居等陵遲處斬。錄昭武功臣豐寧君洪震等四人。○十四日。天動雨雹。○毛營接伴使元綽狀啓。九月二十九日夕。都督急招張大秋言曰。唐人王之喬。自瀋陽逃來。說得賊狀詳盡。爾不信俺言。更聞之。喬所言也。因與大秋反覆詳問。則獐奴地方。今歲不至凶荒。但西犯累敗。又謀入寇。期在二十九日間。發兵西向云。而渠以八月出來。不爲親見云。又合冰後。定爲東搶之計。其言曰。安州以北。蕩敗無形。去無所掠。必須深入兩南。然後方可得食。來時當從北路云。此實丁寧打聽云。故都督言爾

國從前不信俺說。致令生民一敗塗地。前日所言可戒也。今宜清野待變。避亂保民。切勿與之爭鋒。毋如前日之陷敗。陪臣將此意啓知。國王。俺亦親修揭帖云。○瀋陽人王子登當初入賊。僞署副總之職。乘遼奴西犯。率真奴三千餘名。投來毛鎮。之喬乃子登之屬也。同地人柴萬樹亦率真奴數千。投降廣寧。崇煥曰。爾因爾國饑荒。投來上國。饋養一月。使之還歸。奴固辭不去。崇煥聞于朝。入送中原。○肅川出身走回言。遼奴九月二十九日。領十五萬騎往西遼。西遼清野。及至都城。出兵拒戰。奴兵連日大敗。退屯請和。西遼曰。遠方之兵。無爲而來。無爲而去。因爾國凶荒而來。乃給犒軍之資。米數十斛。牛數十頭。奴將稱誓而退。與子登所傳相孚

十一月。還設軍籍。令八道歲前畢役。以鄭鳳壽爲价川郡守兼防禦使。十二月十九日。日有赤暈。又如人形者二。○二十日夜。四方天動。火光閃爍。二十一日。天又動。○近日京中多有恠變。進封山獐來自外方。臨屠招逸入腹。松枝介介散落。又血滾出井中。鵠鳴功臣屋樑。鬼哭元老室中。虎

入禁范。法鍾流汗。當時所聞如此故記之

崇禎元年戊辰。今上六年

春正月元日。天動。○朴蘭英還自胡中。奴賊辛酉移都瀋陽胡中是也○胡差龍骨大朴其乃。率麾從五千餘騎。一時出來。胡書大槩。我國不必借糧於爾國。只緣近日蒙古人民盡爲歸順。因借糧餉。欲爲賑救之計。爾國雖托以蕩敗。而平安一線之區。黃海半隅之邑。因大兵出入。暫似殘燹。其餘六道。按堵如故。有何難備之理。一依相約之數。或由鎮江。或由水路。輸送云。○初三日。竹山居前府使許禰上變告。許道等期明日犯關。備局發軍卒。與上變人許選等。潛守東南門。是夕。逆徒分入各門。盡被捕縛。崔山輝亦告柳孝立等逆狀。分遣都事並拿鞫。各人等皆承服。招辭或云。受哀痛密書于江華。使仁城舉義。或云。受慈殿密旨。傳仁城並爲正刑。教中外大小臣民書。王若曰。國家不幸。逆節屢起於封疆。君親無將。大變幾生於肘腋。刑章昭舉。慶澤旁流。粵予眇躬。承茲亂緒。奉母妃而復位。彝倫式明。黜罪

人以正名。大義以揭。凡於刑政之際。每以寬大爲心。自非大憝元凶。負犯倫紀。莫不同仁一視。曲加生全。豈料凶孽之餘。敢稔逆亂之計。逆賊柳孝立。鄭沁。尹繼倫等。以天賦之梟獍。爲向日之廉來。或付托權奸。以廢母教。倫爲己任。或攀緣肺腑。以逢君誤國。爲事功。惡貫已盈。罪難遣於誅殛。寬恩荐被。身自放於田廬。罔念戴天。翻懷吠主。謂神祇可以欺罔。謂宗社可以覬覦。交關廢人。傳密書而相應。連結王子。聚家僮以爲兵。託讖緯而煽動人心。通宦侍而狙伺禁掖。擬逆豎於諸葛。指巨魁爲聖人。宮中行鳩之計。吁已慘矣。太廟放火之說。是可忍乎。計議已成。部分略定。造謀實自前歲。舉事期在翌朝。危哉禍機。迫於片餉。幸賴天地之默祐。遂有忠良之柄幾。發其陰謀。醜類悉就擒縛。加以嚴刑。情款應時供輸。國有常刑。予敢容貸。已將逆賊柳孝立。裴希度。許迥。柳宗善。柳斗立。安集中。李友明。鄭遴。許達。鄭振。趙憲立。李惕。裴允。金應虎。金應彪。金應獅。金世益。金永起。玉石。金男。貴希等。並依正刑。遣官昭告于太廟。亂臣賊子。何代而

無。極惡窮凶。莫甚於此。既快臣民之憤。爰推雷雨之恩。自本月十一日昧爽以前云云。於戲順吉逆凶。是爲常理。陽舒陰慘。莫非至仁。故茲云云。○崔覲以其子山輝之功。釋其罪。鐘城安置。山輝參寧社功臣後八○毛差等方在都中。願南下。刷還姜朴所率之移置者。適胡差亦來。備局慮有意外之變。許之。至兩湖披覓。各官聞見藏匿。○三司合啓。珙之名屢出於曩日諸賊之招。而殿下欲爲保全。諸臣亦爲將順者。誠以賊徒只以珙爲奇貨。而逆狀之昭著。不至如今日故也。今則凶徒數十輩。同辭伏罪。皆以相應現招。至於圍籬通書。家僮調發等語。極其狼藉。凶跡敗露。明若觀火。則殿下又爲之曲貸乎。况矯誣慈旨。誑誘群兇。締結內豎。欲逞不測之計。則自古亂逆之凶慘。亦有如珙者乎。臣等伏見慈教。有曰。密旨假托之罪。烏得無乎。又曰。窮訊言根可也。珙之罪。至此而更無所逃。請勿留難。亟令按法。答曰。予意盡諭。須勿更煩。合啓庭請至六慈殿下翰廳諺教。該曹翻譯。國運不幸。逆獄累出之中。今番逆獄之事。尤極凶惡。所

不忍聞。癸丑禍亂。自李朴賊來爲姻親時。丙午年大君生後。包藏禍心。得勢煽出。而代以李朴賊者耳。柳賊等不通情勢。不叅廢論。故外人意其奸謀未盡。癸亥年末滅其罪。全其子枝。罔極之讎。報之未快。惟冀蒙被天殃矣。今日乃自作凶逆之禍。天道昭昭。畢報予父兄之讐。窃自喜幸。而略聞賊魁孝立作爲凶慘之言。問于主上。則其言似是。此賊竟發怨心。其將作亂於兩宮之計耶。抑必誑誘欲成凶謀之計耶。密旨假托之罪。烏得無乎。琪則於予得罪之人。廢揮乃不共戴天之讎也。密旨之事。雖乳下之兒。非所疑慮之事。不必掛齒發明。而其言極凶。卿等窮訊言根可也。合啓。以舉國之公論。陳討逆之大義。以子而請廢母后。倫紀之罪人也。以臣而主謀不軌。天下之極惡也。始爲諸賊之奇貨。終作逆孽之窩主。內外相應之狀。不啻若觀火。矯誣慈旨。誑誘凶徒。約日舉事。禍機不測。而凶謀敗露。羣孽就伏。祖宗在天之靈。默祐於冥冥。欲使殿下除元惡轉危爲安也。殿下何可忽。宗社之大計。屈春秋之正法。貽萬世失刑之譏。

啓後日無窮之禍哉。公義所在。私恩難掩。若曰勿煩。副元帥書目。探報。撻奴大軍。初四日入寇中原。又真撻五千。投降毛營云。○百官啓。琪之所犯。非止一再。而賴上曲庇。獲保首領。則所當撫躬啣恩。感激懲創之不暇。而反肆凶逆。至此益甚。罪惡貫盈。覆載難容。寧使一刻容息於天日之下乎。許迺呈疏辭職。答曰。今當逆變。無前凶慘。爾能發告。使宗社危而復安。予甚嘉歎。爾其安心察職。○合啓。三司叫闈。百僚盈庭。齊聲合辭。日三籲呼。殿下安可拂其公論。忽其大計乎。琪爲諸賊之謀主。交通圍籬。締結內外。羣凶所供。若合符契。負此罪惡。何可一刻容息。拿致任昭媛正刑。廢主所率也。○合啓。聖明之所欲。曲全者私恩。臣等之所欲。必伸者公議。今日所爭。只在兩端。但能就此。而辨其孰輕孰重。則國家之所以處琪者。無甚難矣。公議私恩。迭爲輕重。此春秋之所以大義滅親爲貴也。此賊之經營締結。極其凶慘。聖明雖欲曲庇。其如天討至嚴。屬籍當絕何哉。頃日聖批有達宵不寢之教。至情所在。孰不感激。而恐非

聖人中節之發也。珙之自絕于天。獲罪神人。一至此極。則惟當斷以大義。亟正王法。答曰。仁城前後有罪而曲貸。如非木石。豈不感激。此後必不爲逆矣。○合啓。珙之窮凶極惡之狀。歷歷昭著。禍機之發。只在呼吸。殿下不念宗社之阡危乎。答曰。斷以大義。予所不忍。須勿復言。○鄭蘊疏曰。臣之愚見。略陳於榻前。而天威咫尺。辭不達意。不得不演其說焉。臣親承聖教。感淚自零。有君如此。而不能將順其美乎。前車既覆。後車不戒。試以前後較之。弟與叔孰輕孰重。永昌之蒙無知識。而出於賊口。仁城之跡無疑似。而出於賊招。孰冤孰不冤乎。曩時之請殺永昌。今日之請罪仁城。果孰是孰非乎。若不問義理之當否。形跡之虛實。而一以賊招而已乎。則逆獄之興。殆無虛歲。仁城雖除。豈無仁城。先王之子。噫盡之矣。若然。則倫紀之紊。孰與曩時。君德之失。孰與曩時。倫紀明則宗社安。君德得則宗社安。不然而敗倫失德。則宗社危亡。可立而待。臣實未知三司所謂爲宗社大計者何謂也。殷鑑不遠。只在廢朝。若使廢朝雖

有昏亂之政。而不殺同氣。不廢母妃。則雖以殿下之至仁盛德。不能一朝居此位也。以此觀之。三司之請。適足以爲奸人藉口之資。而非宗社長遠之計也。後之視今。亦猶今之視前。可不懼哉。臣之愚心。斷斷無他。只欲納吾君於堯舜之域。竊自附於愛君以德之義矣。今日合司。臣直陳所見。而人微言淺。不能取信。臣何敢自是守株之見。強顏因冒乎。請命罷斥臣職。時蘊爲大司諫答曰。卿忠直之論。予甚嘉悅。卿其勿辭。百官啓。殿下處變。其失有三。廢母之論。倫紀之罪。而反正之初。特屈刑章。失之一也。前後謀逆。皆指於珙。而殿下動於倫紀。孰紊之悖語。惑於陷君不測之邪說。纔焉出置。旋復輦下。罔極之禍。垂發於一夜之間。失之二也。締結凶徒。潛謀密議。通書江華。矯誣慈旨。禍機之發。朝不謀夕。殿下牽於私情。復欲容之。若至三失。國家之亂。寧有可救之地也。請勿留難。亟正王法。答曰。凶徒幾盡。伏辜似無後患。鄉等須臾。予意勿爲瀆擾。宗室啓曰。珙之罪惡。廷臣備陳。論列。臣等不必容喙。宗社大計。一日爲急。不敢舍